



Presented to the
LIBRARY *of the*
UNIVERSITY OF TORONTO
by
John F. Flinn

LES CLASSIQUES FRANÇAIS DU MOYEN ÂGE

publiés sous la direction de MARIO ROQUES

GERBERT DE MONTREUIL

LA CONTINUATION

DE

PERCEVAL

ÉDITÉE PAR

MARY WILLIAMS

TOME II — VERS 7021-14078



PARIS

LIBRAIRIE ANCIENNE HONORÉ CHAMPION, ÉDITEUR

LIBRAIRE DE LA SOCIÉTÉ DES ANCIENS TEXTES FRANÇAIS

5, QUAI MALAQUAIS (VI^e)

—
1925

50

LES CLASSIQUES FRANÇAIS

DU

MOYEN AGE

COLLECTION DE TEXTES FRANÇAIS ET PROVENÇAUX
ANTÉRIEURS A 1500

FONDÉE EN 1910 PAR

Mario ROQUES

- 1^{**}. — LA CHASTELAINE DE VERGI, poème du XIII^e siècle, éd. par GASTON RAYNAUD, 3^e éd. revue, par LUCIEN FOULET; VII-35 pages 2 fr. »
- 2^{**}. — François Villon, ŒUVRES, éd. par AUGUSTE LONGNON, 3^e éd. revue par LUCIEN FOULET; XXIII-136 pages. 8 fr. »
- 3^{*}. — COURTOIS D'ARRAS, jeu du XIII^e siècle, 2^e éd. revue, par EDMOND FARAL; VII-37 pages. 2 fr. »
- 4^{***}. — LA VIE DE SAINT ALEXIS, poème du XI^e siècle, texte critique de GASTON PARIS, 6^e éd.; VI-50 pages. 3 fr. 50
- 5^{*}. — LE GARÇON ET L'AVEUGLE, jeu du XIII^e siècle, 2^e éd. revue, par MARIO ROQUES; VII-18 pages. 1 fr. 50
- 6^{*}. — Adam le Bossu, trouvère artésien du XIII^e siècle, LE JEU DE LA FEUILLÉE, 2^e éd. revue, par ERNEST LANGLOIS; XXII-82 pages. 4 fr. 50
7. — LES CHANSONS DE Colin Muset, éd. par JOSEPH BÉDIER, avec la transcription des mélodies par JEAN BECK; XIII-44 pages.
- 8^{*}. — Huon le Roi, LE VAIR PALEFROI, avec deux versions de LA MALE HONTE, par Huon de Cambrai et par Guillaume, fabliaux du XIII^e siècle, 2^e éd. revue, par ARTHUR LANGFORS, XV-68 pages. 3 fr. 50
9. — LES CHANSONS DE Guillaume IX, duc d'Aquitaine (1071-1127), éd. par ALFRED JEANROY; XIX-46 pages.
10. — Philippe de Novare, MÉMOIRES (1218-1243), éd. par CHARLES KOHLER; XXVI-173 pages avec 2 cartes. 5 fr. 25
- 11^{*}. — LES POÉSIES DE Peire Vidal, 2^e éd. revue, par JOSEPH ANGLADE; XII-191 pages. 9 fr. 50
- 12^{*}. — Bérout, LE ROMAN DE TRISTAN, poème du XII^e siècle, 2^e éd. revue, par ERNEST MURET; XIV-164 pages. 7 fr. »
- 13^{*}. — Huon le Roi de Cambrai, ŒUVRES, t. I, 2^e éd. revue, par ARTHUR LANGFORS; XVII-48 pages. 3 fr. 25

LES CLASSIQUES FRANÇAIS DU MOYEN ÂGE

publiés sous la direction de MARIO ROQUES

GERBERT DE MONTREUIL

LA CONTINUATION

DE

PERCEVAL

ÉDITÉ PAR

MARY WILLIAMS

TOME II — VERS 7021-14078




PARIS

LIBRAIRIE ANCIENNE HONORÉ CHAMPION, ÉDITEUR

LIBRAIRE DE LA SOCIÉTÉ DES ANCIENS TEXTES FRANÇAIS

5, QUAI MALAQUAIS (VI^e)

1925



LIBRARY

SEP
18
1986

OF TORONTO

UNIVERSITY

LA CONTINUATION
DE
P E R C E V A L

PAR
GERBERT DE MONTREUIL

* *

Li contes dist que Perchevaus
Li preus, li sages, li loiaus,
A fait ses armes demander,
Plus ne se volra deporter 7024
Qu'il ne voist querre le Graal.
Sor une coute de cendal
L'armerent li fil Gornumant,
A son bon et a son comant. 7028
Et que que li baron l'armoient,
Tenrement pleurent et larmoient
Et les dames et les puceles ;
Iluec en franchi les anceles 7032
Perchevaus et toz servitumes
Et toutes vilainnes costumes
Abat et a quite clamé.
Quant a son bon l'orent armé, 7036
Perchevaus mie ne demeure ;
Sor un cheval plus noir que meure
Est montés, si se met a voie.

Li barnez plorant le convoie 7040
 Et Blancheflors sovent se pasme.
 Perchevaus oblie son basme :
 Tant est de l'aler desirreus
 Que il oblie ses bareus ; 7044
 Ch'a fait pechiez et anemis.
 Lors est de l'errer entremis
 Et chevalche toute sa voie.
 Ainchois mais que le Graal voie 7048
 Avra tels plaies, ce m'est vis,
 Qu'a paines eschapera vis.
 Mestier aroit de ses bareus,
 Car, se il n'est garis par eus, 7052
 Ja mais n'en avra garison.
 Assez en sarez l'achoisson
 Con faitement les recovra
 Et le liu ou il les trova, 7056
 Mais ainçois ot molt de travaus.
 Toute jor oirre Perchevaus
 Treschi après eure de none,
 Et sa feme arriere retourne, 7060
 Molt dolente et molt esmarie.
 « Ha ! fait ele, sainte Marie,
 Or quidoie en joie manoir
 Et qu'o moi deüst remanoir 7064
 Mes dols sire, mes dols amis,
 En cui je ai tot mon cuer mis ;
 Et or s'en va le Graal querre,
 Si ne sot ou ne en quel terre. 7068
 Ne sai se le verrai ja mais. »
 Perchevaus s'en vait a eslais
 Par mi une forest soutaine,
 Tant qu'il trova une fontaine 7072

Et une capele petite
 Et le maison a un hermite
 Qui estoit joste le mostier.
 Perchevaus, qui eüst mestier 7076
 D'ostel, est cele part venus.
 Li hermites, viels et kenus,
 Estoit a l'uis de sa chapele ;
 Perchevaus belement l'apele, 7080
 Si le salue et puis li prie
 Por amour Dieu que il li die
 S'il set vile, chastel, ne tor
 A chevalier iluec entor, 7084
 Ou il puist hebergier anuit.
 « Sire, fait il, ne vous anuit,
 Demorez hui mais avec moi.
 Par cele foi que je vous doi 7088
 Je ne sai dongon ne chité,
 Tour ne rechet ne fermeté,
 Ne maison n'a franc n'a vilain,
 La avant dusque al Port Molain, 7092
 Ou il a vingt liues al mains.
 Cheüs est en molt males mains ;
 Cui li sire puet atraper
 Nus ne puet de lui eschaper, 7096
 Sachiez, que honte ne li face.
 Si voie je Dieu en la face,
 Nus n'i va qui en recort liez ;
 Mais, s'il vous plaist et vous voliez, 7100
 Anuit mais vous hebergerai. »
 Dist Perchevaus : « J'abregerai
 Nos paroles, je ne sai tel.
 Je prendrai anuit mais l'ostel. » 7104
 Dont n'i ot plus, si descendi

Et li preudom le main tendi,
 Si prist maintenant le cheval,
 Puis si en maine Percheval 7108
 Dedens son toit par mi la porte.
 Li saint hom au cheval aporte
 Herbe fenée, si li done,
 N'ot autre blé ne autre avone. 7112
 Et Perchevaus ses armes hoste,
 A garder les baille son hoste ;
 Et li preudom les prist en garde,
 Puis prent garde au cheval de garde, 7116
 La sele oste et si le conroie.
 Che qu'il ot assouper aroie,
 Fontaine, cresson et pain d'orge
 Qui Percheval colpast la gorge, 7120
 N'en peüst une mie user ;
 Cele nuit li covint passer
 Molt a malaise et sanz delit :
 Poi a mengier et molt dur lit 7124
 Ot cele nuit et ses chevaus.
 Et quant le jor vit Perchevaus,
 Si se lieve hastievement,
 Et l'ermite isnelement 7128
 Maine Percheval al mostier.
 L'ermite aporte un saltier,
 Car Perchevaus molt le hasta :
 Li preudom matines chanta 7132
 Et tierche et prime et mäedi,
 Et Perchevaus les entendi
 De bon cuer ententievement.
 Et l'ermite isnelement 7136
 S'est des armes Dieu revestus,
 Devant l'autel s'est arestus

Por dire son confiteor.
 A tant vint sor un cheval sor 7140
 Uns chevaliers molt bien armés
 Et si estoit bien acesmés
 D'armeüre fresche et novele,
 Et si amaine une pucele 7144
 Batant durement d'un baston.
 Et cele s'escrie a haut ton :
 « Ha ! lasse ! fait ele, je muir,
 Rompu m'a les os et le quir 7148
 Cil traîtres, chil desloiaus,
 Qui est et traîtres et faus,
 Si m'ochist a si grant martyre ;
 Mais por noient me bat et tire 7152
 Que ja nul jor n'ere sa mie. »
 La pucele pleure et larmie,
 Ses chaveus trait et ses mains tort :
 « Lasse ! fait ele, a con grant tort 7156
 M'a de mon ami departie,
 Mais je li faz une partie
 Que, s'il me prent, je m'ocirrai,
 Ja nuit avec lui ne jerrai : 7160
 Mius volroie qu'il m'oceïst
 Que ses cors avec moi jesist,
 Car ocis m'a ce que j'amoie.
 — Certes, fait il, vous serez moie, 7164
 Ou vous morrez a mes deus mains.
 — Par Deu, fait ele, c'est du mains
 Car ançois me lairoie pendre
 Que vous volsisse a mari prendre. » 7168
 Cil l'ot, a poi de doel ne criève,
 Le baston encontre mont lieve,
 Molt malement le bat et roille,

De sanc toute la char li moille ;	7172
Et ele pleure, a vois s'escrie :	
« Ahi ! dame sainte Marie,	
Car secorez ceste chaitive :	
Ce poise moi que tant sui vive,	7176
Mius volsisse morir assez. »	
Li vassaus est avant passez,	
Si descent et celi descent	
Et li done cops plus de cent.	7180
Sanz sejour entre en la chapele,	
A haute vois l'ermite apele,	
Come outrageus estoltement :	
« Danz prestres, fait il, erranment	7184
Venez me espouser ceste dame,	
Ou, se ce non, se Deus ait m'ame,	
Vous le conperrez ja molt chier. »	
Quant l'ermites s'ot manechier,	7188
Si respont dolcement : « Biaux sire,	
Foi que je doi al cors saint Sire	
Je le ferai sanz detriier,	
Mais qu'ele le weille otroier.	7192
— Naie, fait ele, par saint Pol,	
Ains me lairoie par le col	
Pendre et les membres esracier. »	
A tant le comenche a sachier	7196
Li chevaliers par mi la treche,	
Si le tient en si grant destreche	
A poi que ne li tolt l'alaine ;	
Et cele, qui blonde est con laine,	7200
Pleure et gemist et crie et brait:	
Et Perchevaus avant se trait,	
Le chevalier araisona	
En qui molt peu de raison a :	7204

- « Chevalier, par Jesu le roi,
 Folie faites et desroi
 Qui la damoisele batez.
 En folie vous embatez 7208
 Qui a force le volez prendre
 A moillier. Bien vous veil aprendre
 Que cil qui par lor bons les ont
 Et les servent et bien lor font 7212
 Et se penent de les atraire
 En ont sovent doel et contraire,
 Et vous qui le volez avoir
 A force, sachiez bien de voir 7216
 Que ja n'en serez bien servis :
 Foi que doi Dieu de paradis,
 De folie vous voi meller.
 — Coment en volez vous parler ? 7220
 Fait cil ; qu'en aiert il a vous ? »
 Dist Perchevaus : « Biaus amis dols,
 Ne devez mie desdaignier,
 Se le bien vous weil ensaignier. 7224
 Qui le bien set, s'il ne l'aprent,
 A Dieu et al siecle mesprent ;
 La vilonnie doit blasmer
 Qui Dieu velt servir et amer, 7228
 Et le bien ensaignier et faire.
 Vilains est et de mal afaire
 Li hom qui feme deshoneure :
 Par feme fut dedens une eure 7232
 Recovrez toz li biens del mont ;
 Feme fu le premerain pont
 Par cui Dieus en enfer passa,
 Qui toz ses amis respassa 7236
 D'infer et traist fors de la porte ;

Par li fu la mors d'infer morte.
 Ki fame fait lait ne hontage,
 Il meïsmes fait son damage. 7240
 Li preudom dist et drois le prove
 Qui en son proverbe le trove,
 Que vilains cuers devient gentius
 Quant il est al bien ententius. 7244
 Sire vassal, se Dieus me salt,
 Li hom fait molt anïeus salt
 Qui change savoir por folie
 Et done honor por vilenie. 7248
 Laissez la damoisele en pais. »
 Cil dist : « Se vous en parlez mais,
 Vous le conperrez, par saint Pierre. »
 Dist Perchevaus : « Plus dur que pierre 7252
 Vous truis, je n'en quier plus parler.
 Ne me puis ore a vous meller
 Car vous estes trop bien armés. »
 Cil respont : « Se vous tant l'amez 7256
 Que vers moi le weilliez desfendre,
 Si alez tost vos armes prendre,
 Si comencerons le mestier
 Par devant l'uis de cest mostier. » 7260
 Dist Perchevaus : « Par saint Amant,
 Et je mius mie ne demant. »
 A tant issi de la chapele,
 Le saint hermite od soi apele, 7264
 Ses armes rove appareillier.
 Et l'ermites li cort baillier,
 Et Perchevaus les va saisir.
 La damoisele a son plaisir 7268
 L'aida a armer volentiers.
 Puis sont monté sor les destriers,

Dont prent chascuns del champ sa part :
 Ainchois que li estors depart 7272
 Aroient mestier de respas.
 Lors s'en vienent plus que le pas
 Sor les chevaus qui tost randonent ;
 Des lances grans cops s'entredonent 7276
 Sor les escus a or burnis :
 Cuir et ais et taint et vernis
 Perchent ausi con deus buriaus.
 Malement tornast li meriaus : 7280
 Se li hauberc si fort ne fuissent,
 Ja de la mort garant n'eüssent.
 Et si lor avint uns tels poins
 Que les lances desi es poins 7284
 Froissent, mais quant vint al outrer
 Si fort les covint rencontrer
 Que li escu froissent et fendent ;
 Sor les estriers si fort s'estendent 7288
 Que les corioies en rompirent ;
 D'ire et d'orgueil andoi sozpirent,
 Outre passent et font lor tor.
 Perchevaus, qui en maint estour 7292
 Avoit esté, l'espee trait,
 Envers son compaignon se trait,
 Et cil vers lui molt fierement ;
 Si s'entrefierent durement 7296
 Des espees trenchans et dures ;
 Tant sont engréz et plain d'ardures
 Qu'il n'ont cure de reposer,
 N'onques ne volrent adeser 7300
 Lor chevaus, car il ne daignierent,
 Mais lor cors mie n'espargnient,
 Ainz se sont fierement requis.

Mais sachiez que poi ont conquis 7304
 Li uns sor l'autre en molt grant pieche.
 N'i a hiaume qui ne depieche,
 Ne hauberc dont mailles ne volent.
 A bien petit que ne s'afolent 7308
 Que l'uns l'autre el visage esteche.
 Perchevaus ot une tel teche,
 Quant plus se combat et se paine,
 Tant li croist plus force et alaine ; 7312
 Force et alaine a requueillie,
 Celui requiert a l'escremie
 Si fort et de si grant ravine
 Que tout arriere le sovine 7316
 Par desor l'archon de la sele ;
 Par le col l'estraint soz l'aissele,
 Le hiaume del chief li errache,
 Del poing le fiert en mi la face, 7320
 Le cuir li ront et la char froisse.
 Et cil sent dolor et angoisse,
 Qui n'a pooir de lui rescorre,
 Et li sanz li comence a corre 7324
 Sor le vis que tout le covri.
 « Ha ! gentius chevaliers, merci,
 Fait cil ; certes je sui outrez.
 Vostre pitié, por Dieu, mostrez, 7328
 Se il en a point en vo cuer,
 Car por Dieu merci vous requier ;
 Si me devez bien escouter,
 Car bien avez oï conter 7332
 Que cil qui pardone mesfait
 Sa cortoisie et son preu fait,
 Car s'onor i salve et le sien ;
 Et s'avez oï dire bien 7336

Che que tesmoigne li escriis :
 Dieus nostre pere Jesu Cris
 A Longis sa mort pardona,
 Quant merchi quist, et li dona 7340
 Veüe, lumiere et clarté.
 S'en toi a merchi et pité
 J'avrai merchi, se tu prens garde
 A Celui qui tot le mont garde. » 7344
 Quant Perchevaus celui entent,
 Qui ses mains jointes li estent
 Et si dolcement merchi prie
 Et de priier ne se detriie, 7348
 Lors li sovint de Gornumant,
 Qui li pria et fist comant
 K'il n'oceïst ja chevalier
 Qui la merchi osast priier, 7352
 Se li a dit : « Merchi aras
 Par tel covent con ja orras,
 Ke ja mais a jor de ta vie
 N'ert pucele par toi ravie 7356
 Ne damoisele destorbee. »
 Et cil, qui merchi avoir bee,
 Respont qu'il fera la fianche.
 Tout maintenant sanz demorance 7360
 L'a mené a l'uis del mostier.
 L'ermite aporte un saltier ;
 Cil jura sus de la main destre
 Quanques Perchevaus et le prestre 7364
 Deviserent tot sanz contendre.
 « Or me faites vo non entendre,
 Dist Perchevaus, savoir le weil,
 Et puis en irez a Cardueil 7368
 Au roi Artu prison tenir,

Cui Dieus gart et puist maintenir.
 Dites que cil vous i envoie
 Qui toz armez se mist a voie 7372
 Après la dame qui faisoit
 Le grand doel et les pres passoit.
 — Sire, fait il, et je irai
 Et le mien non vous nomerai : 7376
 J'ai non Dragoniaus li cruels. »
 A tant a pris congié a eus,
 Lors s'en part que plus n'atendi.
 Et Perchevaus si descendi, 7380
 Puis si est entrez el mostier.
 Et l'ermite fait son mestier,
 Qui molt fu dols et prescieus,
 Si fu d'un martir glorieus. 7384
 Et quant chanté ot li ermites
 Et il ot ses oroisons dites
 Et son service plainement,
 Desvestus est hastievement, 7388
 Puis est issus de la chapele,
 Percheval et la dame apele,
 Si les en maine en sa maison.
 Pain d'orge et fontaine et cresson 7392
 Aporté por desjeüner,
 Puis a dit : « Maint meillor disgner
 Avez eü que cist n'est ore,
 Et avrez, se Dieu plaist, encore ; 7396
 Mais, se de chi vous eslongiez,
 Il n'i a liu ou vous mengiez,
 Car il n'i a fors bos et plaignes
 Et grans valees et montaignes. » 7400
 Perchevaus, quant l'ermite entent
 Mengüe, que plus n'i atent,

Et la dame avec lui mengüe
 Qui ne se gabe, ne ne jue. 7404
 Quand ele sainti le pain d'orge,
 « Hé ! las ! or me riffe la gorge,
 Ainc mais ne mengai de son per.
 Dieus nous envoit meillor souper 7408
 Que nous n'avons digner eü,
 Car povrement somes peü. »
 Dist Perchevaus : » Ma douce dame,
 Cist hermites doit meillor ame 7412
 Rendre a Dieu que nous ne devons,
 Car par aventure vivons :
 Viandes volons a sozhait,
 Car le cors ne chaut fors qu'il ait 7416
 Assez por soutenir sa vie.
 Cist a mius gloire deservie,
 Ce m'est avis, que molt de gent,
 Qui ne vivent ne bel ne gent, 7420
 Ains beent tot, c'est mes recors,
 Qu'il puissent aesier lor cors,
 Que des ames ne lor sovient
 Devant iche que la mors vient. » 7424
 Dist la dame : « Vous dites voir ;
 Sire, il est bien tans de movoir,
 Prenons congié et si montons
 Et a la voie nous metons. » 7428
 Perchevaus bonement otroie
 Ce que la pucele li proie :
 Entre ses bras prist la damzele
 Si l'a mise desor sa sele, 7432
 Puis monte et le congié demande.
 Et li hermites les comande
 A Dieu qui joie lor envoit

Et a bon hostel les convoit, 7436
 Si come il en est poestis.
 A tant s'en ist fors del postis.

Perchevaus au chemin se met.
 La dame, qui de doel remet 7440
 Por son ami que mort quidoit,
 Après lui d'errer entendoit.

De chevalchier molt s'esforcha.
 « Sire, fait ele, venez cha 7444

Cel grant chemin qui va a destre,
 Por Dieu le glorieus celestre,
 Tant que le mien ami revoie,
 Se je en vie le trovoie 7448

Tant que a lui parlé eüsse,
 Car molt tres volontiers seüsse
 S'il est en vie ou s'il est mors ;
 Ja mais ne quier partir del cors : 7452
 S'il est mors, je demoerrai

Avec lui tant que je morrai. »
 Perchevaus l'ot, pitié en a,
 La damoisele tant mena 7456

Que celui trovent soz un arbre
 Qui gist a terre sor un marbre,
 Navrez et plaiez durement.
 Et la pucele isnelement 7460

Descent et son palefroi laisse,
 A son ami vient, si le baise
 Plus de vint fois ens en la boche
 Tant qu'il senti l'alaine douce ; 7464

Les oeus ovri, puis si parla :
 « Hé ! Deus ! fait il, qui est ce la,
 Qui a ma boche a adésé

Tant dolcement et si soé?	7468
— Je sui, fait ele, dols amis, Vostre amie, qui tot a mis Son cuer en vous, se Dius me saut. »	
Quant cil l'ot, de joie tressaut,	7472
Le chief dreche et voit Percheval Qui sist armez sor le cheval, Paor a grant, nel connoist mie.	
Molt bien s'en aperchut s'amie Que de Percheval se redoute.	7476
Lors li dist la verité tote Que Dragonel conquis avoit Li chevaliers qu'a ses œus voit.	7480
Quant cil l'ot, plains fu de leeche, De joie en son estant se dreche. Ouant Perchevaus drechié le voit Et voit les plaies qu'il avoit	7484
Un petit plus pres de lui vient : De ses bariels li resovient C'oublié ot ; si est maris, Car ja fust li vassaus garis,	7488
Mais nul n'en ot, dont molt li grieve. Une plaie ot qui li escrieve Cil el costé dont ot doutance, Mais la damoisele l'estanche	7492
D'une ametiste et puis le bende Tres par mi les flans d'une bende Qui molt fu blanche et deliie Dont la pucele estoit liee.	7496
Li chevaliers s'esforce tant Qu'il est levez en son estant, Puis si a priié Percheval Qu'il li amenast son cheval,	7500

- Que Dragoniaus avoit chachié
 Dedens le bos et atachié.
 Perchevaus va por le destrier,
 Si l'amaine et par son estrier 7504
 I fait le chevalier monter.
 « Vassal, fait il, sanz arester
 Vous en irez a Biaurepaire,
 A Blanche flor la debonaire, 7508
 Qui est et ma dame et m'amie
 Si li dites, nel celez mie,
 Que de mes bariels li soviegne
 Et bien les gart tant que reviegne 7512
 Si chier come a moi et m'amour,
 Et li dites que sanz demour
 Vous doinst de che qu'il a dedens
 A boire : ainz qu'en aiez vos dens 7516
 Passez, serez vous toz garis,
 Ja mar en soiez esmaris.
 Alez a Dieu, car j'ai grant haste :
 Malvés fait estre en païs gaste, 7520
 Ainz s'en doit on tantost partir ;
 Mais or me dites sanz mentir
 Vostre non et le vostre amie.
 — Sire, ne vous mentirai mie : 7524
 J'ai non Arguisiaus de Carhais,
 Et m'amie a a non Rohais. »

 A tant a Dieu s'entrecomandent,
 Rien nule plus ne se demandent. 7528
 A Biaurepair va Arguissiaus
 Et Perchevaus li preus, li biaux,
 S'en va par la forest antieue :
 Une estroite voie soutieue 7532

Chevalche tote jor pensant
 Tressi vers soleil esconsant
 Qu'il est issus de la forest.
 Devant lui gardé sanz arest, 7536
 Vit un chastel trop bien assis :
 Il i avoit todeles sis
 Et une haut, grant et pleniére,
 Et si coroit une riviere, 7540
 Bele et grans, qui porte navile.
 Soz le chastel estoit la vile,
 Fremee de murs et de tours,
 N'ot mieus assise jusque a Tors 7544
 De murs, de viviers, de fossez,
 Trop par estoit bien compassez
 Desor la roche li donjons :
 Je ne quit pas que uns bojons 7548
 Que uns archers d'un arc traisist
 Tressi as crestiaus atainsist,
 Tant par estoit haute la roche.
 Perchevaus vers la vile aproche ; 7552
 Quant il ot la forest oltree,
 S'a une pucele encontree,
 Qui de la porte estoit issue ;
 Ses oeus a son bliaut eschue, 7556
 Forment pleure, molt fu marie.
 « Ha ! fait ele, sainte Marie,
 Con je sui dolente en mon cuer !
 Ja mais n'avrai joie a nul fuer, 7560
 Car ce ne porroit avenir
 Que joie me peüst venir,
 Quant mes amis en cest jor d'ui
 Soffre tant de honte et d'anui 7564
 A tort et tot sans forfaiture.

Li cors ait hui male aventure
 Qu'a la vile mist tel usage.
 — Ha ! pucele, or me faites sage, 7568
 Fait Perchevaus, s'il vous est bel,
 Quel usage ont en cel chastel,
 Car durement vous en oi plaindre. »
 Et cele, qui ne se sot faindre 7572
 De son doel, ains pleure et sozpire :
 « Sire, fait ele, tot c'est pire.
 Vous lo bien que vous retournez
 Et vo grant honte destornez, 7576
 Car chevaliers n'entre en la porte,
 Se riens nule la dedens porte,
 Que point cha fors riens en ramaint,
 Car li sires qui laiens maint 7580
 Lor fait tot lor harnois tolir,
 A che ne puent il faillir.
 Mais tant i a, s'il velt desfendre
 Ses armes que ne les laist prendre, 7584
 Si le covient adont joster,
 Bien le vous puis por voir conter,
 A quatre chevaliers trop preus.
 A tout che ne li est nus preus ; 7588
 S'il les pooit toz quatre abatre
 Sel recovenroit il combatre
 Au seignor trestot de rechief ;
 Mais nus ne puet venir a chief 7592
 De lui ne mater ne abatre.
 Il en a bien quarante quatre
 En son escrit trestot par conte
 Cui il a fait anui et honte, 7596
 Du mains ce est, de lor harnois.
 Mais la honte et li grans anois

Que il lor fait de lor cors traire
 Lor torne si a grant contraire 7600
 Que nus hom ne porroit penser
 La honte qu'il ont appasser.
 Mes amis, qui mal ne pensoit,
 Par mi la ville orains passoit ; 7604
 As quatre joster le covint,
 Mais au joster si li avint
 Que des quatre abati les trois,
 Mais al quart fu il si destrois 7608
 Que ses chevaus soz lui chospa
 Et sa regne li eschapa.
 Ensi mon ami meschaï
 Que ses chevaus soz lui chaï, 7612
 Lors le corurent desarmer.
 Et je, qui tant le dui amer,
 Ne weil de mon ami vcoir
 L'anui c'on li fera avoir, 7616
 Si m'en parti dolante et morne.
 Ha ! gentius chevaliers, retourne,
 Se tu ne vels anui avoir :
 Del retourner feras savoir. 7620
 — Pucele, ce dist Perchevaus,
 Certes et je et mes chevaus
 Avons trait jornee greveuse
 Et laiens a gent anïeuse 7624
 Einsî con je vous oi conter ;
 Et chascuns hom doit redouter,
 Ce sachiez, vilonnie a faire :
 Et se je arriere repaire, 7628
 Ne me savrai ou aesier,
 Car mes chevaus ne hui ne hier
 Ne menja c'un petit de fain,

Et je meïsmes ai tel faim 7632
 Que de la destreche baaille,
 Ne ja por crieme de bataille
 Ne lairai que laiens ne voise. »
 A tant a oï une noise 7636
 En la vile et molt grant tumulte,
 Et Perchevaus sor le pont monte,
 Si est dedens la porte entrez.
 Les premiers qu'il a encontrez 7640
 Trova assez vilains parliers :
 « Ahi ! font il, danz paltoniers,
 Con vous serez ja mal venus,
 Car a pié en irez et nus. 7644
 Bien estes or venus a point ;
 Anemis vous peteille et point,
 Qui cest chemin vous fist torner.
 A paines puet on destorner 7648
 Son anui ne sa mescheance.
 On vous contera vo chaance
 Au departir vilainement,
 On vous donra tel paiement 7652
 Qui molt ert dolens et hontels. »
 Perchevaus s'est tot adés teus,
 Ainc ne dist mot, oltre s'en va.
 Tres par mi les rues trova 7656
 De gens molt tres grans assemblees
 Qui par reñs estoient doublees :
 Chascuns tiënt polmon ou chavalte,
 Torquillon ou pieche de nate 7660
 Qui de boe furent loees
 Et laidement enpaluees.
 Tuit s'escrient : « Or cha ! or cha ! »
 Et Perchevaus tant chevalcha 7664

Qu'il est venus dusque al chastel.
 Iluec trova en un prael
 Un char petit et atorné,
 Onques ne vit nul mieus torné, 7668
 Qu'il estoit sor quatre roés :
 Trop par estoit biaus li charrés
 Et bien cloez et bien covers,
 Et cinc escu d'armes divers 7672
 Pendent au char de riche atour.
 Un arbre avoit desoz la tour
 Ou cinc destriers ot aresnez,
 Bien covers et bien conraez, 7676
 Et de joste un grant fais de lances,
 Grosses et fors, roides et blanches.
 Perchevaus vers le charroi va,
 Et sachiez bien qu'il i trova 7680
 Asteles et colers et trais ;
 Et par dedens gist uns contrais
 Qui molt fu fel et de put aire ;
 Nus ne le pooit faire taire : 7684
 Tant avoit en lui felonnie,
 Orgueil, outrage et vilonnie,
 Qu'adez velt jangler et tenchier.
 Quant voit Percheval aprochier, 7688
 Si a saisie sa buisine,
 C'on apeloit Male Voisine,
 Dont li bout sont richement paint ;
 Met le a sa bouche, si l'enpaint, 7692
 Si sone si tres hautement
 C'on l'ot el chastel clerement
 Et par la vile et par les rues.
 Toutes les gens i sont venues, 7696
 Tantost con la buisine entendent,

A tant jus del chastel descendent
 Cinc chevalier molt bien armé
 Et molt noblement acesmé. 7700
 Dames et puceles de pres
 Les venoient sivant après
 Qui lor helmes lor apportoient,
 Et de tost venir se hastoient ; 7704
 S'amenoient un chevalier,
 Qu'il avoient fait despoillier
 En chemise et si fu deschaus.
 Entor lui avoit grans enchaus 7708
 De garçons et de vilonnaille
 Qu'il ne lor chaut coment il aille.
 Sovent li dient par eschar :
 « Vez chi le chevalier du char ! » 7712
 Vilainement l'ont demené,
 Desi au char l'ont amené.
 « Or cha ! sire, dist li contrais,
 Ja vous meterai en teus trais 7716
 Ou vous avez molt de contraire :
 Moi et mon char vous covient traire
 Par les rues, se Dieus me saut,
 Et si arois ja un assaut 7720
 De chavates et de polmons,
 Car al corner les ai semons,
 Et s'ai chi ma grande vessie
 De buef bien sofflee et tesie 7724
 Dont je vous donrai les la joe,
 Se bien ne traiez par la boe
 Et par les flos et par les tais. »
 A ceste parole s'est tais 7728
 Li contrais, si prent le coler :
 Le chevalier velt encoler,

Car metre le voloit es trais,
 Quant Perchevaus s'est avant trais, 7732
 Si dist : « Contrais, tous cois estez,
 Vostre gorrel en sus ostez,
 Que li cors ait male aventure,
 Car trop est de male nature, 7736
 Qu'en la vilè mist tel usage.
 Par Dieu, je ne tiegn mie a sage
 Chevalier qui autre fait honte.
 — Sire vassal, a vous que monte, 7740
 Fait li sires qui avant vient,
 Autel jeu soffrir vous covient
 Ainçois que vous partez de chi :
 N'en menrez cheval ne ronchin, 7744
 N'arme nule n'emporterez
 Quant vous de moi departirez.
 Et neporquant dire vous weil
 Que, s'il a en vous tant d'orgueil 7748
 Et de valor et de hauteche
 Que vous par force et par proece
 Quatre chevaliers abatez
 Et puis a moi vous combatez, 7752
 Et se vous me poez conquerre,
 Comander poez et requerre
 Tout vo plaisir outreement :
 Tout feront vo comandement. 7756
 Mais se ce faire ne poez,
 Laidement serez enboés
 De polmons, de chavetes viez.
 Et se vous cent chevaus aviez 7760
 Ses volriez vous avoir donez,
 Si vous fust quites pardonez
 Li maïs, et l'anuis et la honte, »

Dist Perchevaus : « Trop lonc aconté 7764
 Me faites, car je desfendrai
 Mes armes ; ja nes vous rendrai
 Tant con je les porrai desfendre.
 Chevaliers se doit garde prendre 7768
 Qui il est et quel non il porte.
 Vilenie doit estre morte
 En lui, puis que il est baigniez,
 Il doit estre desconpaigniez 7772
 De trestoute vilaine teche ;
 Et se la vilonnie esteche
 El cuer, qui le fait esmouvoir
 A vilain estre por avoir, 7776
 Ne son cuer n'en puet desamordre,
 Cil trespasse, ce m'est vis, l'ordre
 De chevalerie. Por coi ?
 Car dolç et debonere et coi 7780
 Doit chevaliers estre as hostéls ;
 Et avec che doit estre teus
 Que il soit al besoing hardis,
 Plains de proece et de bons dis. 7784
 Tout ensi doit chevaliers faire,
 Si doit estre de tel affaire
 Que il ne penst ja felonnie ;
 Car trop par fait grant vilennie 7788
 Chevaliers qu'autre deshonneur.
 Ne devez estre jor ne eure
 Honorez par ceste raison,
 Qui desfendez vostre maison 7792
 As trespassans, fait Perchevaus,
 Et tolez armes et chevaus
 Et lor faites tant de contraire
 Que vous a force faites traire 7796

Et le charete et le contrait.
 Fols est qui entor vous se trait,
 Car vous vivez de rouberie ;
 N'avez droit en chevalerie : 7800
 Vous en avez a tort le non.
 Mais qui que soit lait ne qui non,
 Je josterai. Faites monter
 Un chevalier, car al joster 7804
 Ne puet il falir, par mon chief.
 Mais, se des jostes vieng a chief,
 Abatre volrai cest usage,
 Car trop i a felon passage. » 7808
 A cest mot uns chevaliers monte
 Qui molt d'anui et molt de honte
 Manache a faire Percheval.
 Quant montez fu sor son cheval, 7812
 L'elme lache sor la ventaille.
 Li contrais son escu li baille,
 Qui d'or et d'azur fu bendés
 Et si fu de gueles broudez ; 7816
 Un lion i avoit d'ermine.
 Il ne fist mie lonc termine,
 As lances vient, si en prent une.
 Toute la gens entor s'aüne 7820
 Por les jostes que veoir welent,
 Tout ensement con veoir suelent.
 Et li chevaliers qui fu nus
 S'en est vers les lances venus : 7824
 Cinc en eslit, roides et fortes,
 Qui ne sont ne grailles ne tortes.
 A Percheval vient, plus n'atent,
 Toute la plus grosse li tent, 7828
 Puis li dist : « Sire, honors vous viegne ;

Por amour Dieu or vous soviegne
 Des chavates et des polmons,
 Des nates et des torquillons, 7832
 Qui sont en la boe moilliés
 Et por geter appareilliés.
 Molt fait cis mes a redouter ;
 Por Dieu pensez du bien joster. » 7836
 Dist Perchevaus : « Or n'aiez doute.
 Se la vilaine gent estolte
 Ne me font tort, je nes dout point. »
 Lors metent les escus a point 7840
 Et les lances desor le fautre ;
 Lors point li uns encontre l'autre,
 Si sont affichié es estriers
 Et laissent corre les destriers, 7844
 Qu'il ont corans de grant ravine,
 Si se fierent de tel querine
 Que l'uns quide l'autre confondre.
 Cil fiert Percheval qu'il esfondre 7848
 Son escu que tot le porfent,
 Mais li bons haubers le desfent
 Qui richement estoit ovrez.
 Ne fu ne plaiez ne navrés 7852
 Perchevaus, n'ainc n'en guerpi sele.
 De sa lance fist mainte astele
 Li chevaliers qui molt fu fors.
 Et Perchevaus par teus esfors 7856
 Le fiert que l'escu li percha ;
 Son cop contremont adrecha,
 En mi le pis l'a enferré
 Si que il l'a jus aterré 7860
 Par mi le crupe del cheval
 Jambes levees contreval,

A poi que li cops ne li froisse.
 Trois fois se pasme de l'angoisse, 864
 Car brisiie avoit la canole ;
 Li sans a grant raidon li vole.
 Dist Perchevaus qui le regarde :
 « Hui mais n'arai je de vous garde 7868
 Coment que des autres aviegne,
 Et qui volra joster si viegne,
 Car il me trovera tost prest.
 — Et Dieus force et vertu vous prest, » 7872
 Dist li chevaliers qui l'anui
 Atent, s'il n'a secors de lui.
 Dist Perchevaus : « Ne vous doutez
 Car Dieus et fois et loiautez 7876
 Nous aidera et nostre drois.
 S'es autres n'a plus de defois
 Que en cestui, c'est chose certe,
 Moi et vous en irons sanz perte. » 7880
 Quant li sires du chastel voit
 Celui que Perchevaus avoit
 Abatu a terre estendu,
 Il n'i a gaires atendu : 7884
 Monter fait un des autres trois.
 Cil monte, qui molt fu destrois
 De son compaignon qui blechiez
 Estoit ; au char s'est adrechiez, 7888
 S'a erranment son escu pris,
 D'ire et de maltalent espris
 Si que li sans li muet et lance ;
 Saisi a une grosse lance, 7892
 Car il a le hiaume lachié.
 Lors ont les chevaux adrecié
 Li uns vers l'autre sans plus dire,

- Que molt sont plain d'orgueil et d'ire, 7896
 Et li cheval tost lor randonent.
 Sor les escus grans cops se donent
 Tout sanz espargnier et sanz faindre.
 En tronchons fait sa lance fraindre 7900
 Li chevaliers, mais Perchevaus
 Le fiert si qu'il et ses chevaus
 Chiet en une mare parfonde
 Si que l'iaue sor lui soronde. 7904
 Noiez fust, mais on l'en cort traire.
 Perchevaus li dist par contraire :
 « Dans chevaliers, beü avez ;
 Or me dites se vous savez 7908
 Liquels valt mieus, ou eaue ou vins :
 En l'eaue avez geü souvins,
 Beü en avez a long trais.
 Par vous n'iere mais mis en trais, 7912
 N'en coler de cuir ne de toile,
 S'autres de vous ne m'i atoile :
 Hui mais avons de vous respit. »
 Li sires tint a grant despit 7916
 Ce qu'il ot dire Percheval ;
 Il fait monter sor un cheval
 Le tierç chevalier erranment.
 Cil jure et monte molt forment 7920
 Que Perchevaus le comperra.
 Dist li sires : « Ore i parra
 Con faitement vous le ferez.
 Haut sor le menton le ferez 7924
 S'en iront les jambes amont,
 Car, par Celui qui fist le mont,
 S'il vous abat, ja mais n'arez
 M'amour, mais perdue l'arez. » 7928

Dist cil : « Se nel faz trebuchier,
 Ma teste vous doins a trenchier. »
 Au char vient, si prent son escu,
 Car molt tost quide avoir vencu 7932
 Percheval, qui poi le resoigne.
 A tant l'uns de l'autre s'esloigne,
 Si ont les escus enbrachiez.
 Li uns s'est vers l'autre adreciez, 7936
 Quanque li cheval püent rendre.
 Cil fiert si Percheval que fendre
 Fait de l'escu la penne autaine ;
 Ausi con sor une quintaine 7940
 Fiert sor mon seignor Percheval,
 Mais onques lui ne le cheval
 Ne remua plus c'une tour.
 Perchevaus, qui bien sot le tour 7944
 De joster, car bien l'ot apris,
 L'a par desoz la gorge pris,
 Si l'enpaint de si grant eslais
 Qu'en un palu qui molt fu lais 7948
 L'abat tout envers et tot plat.
 Au chaoir done un si grant flat
 Que les esclates de la boe
 Donent le seignor lez le joe, 7952
 Et les dames en sont moillies
 Et lor vesteüres soillies,
 Dont eles n'ont ne ris ne feste.
 « Dans chevaliers, le vostre teste, 7956
 Dist Perchevaus, perdue avez
 Par vostre dit, bien le savez,
 Se vo sire le daigne prendre.
 Bien poez savoir et aprendre 7960
 Que fols est qui autrui pramet

Ne qui en gageüre met
 Ne pié, ne poing, ne braç, ne chief,
 Quant ne set s'il venra a chief 7964
 De faire che qu'il a pramis.
 Une aütre fois, biaux dols amis,
 Ne prometez pas chose a faire
 Dont vous ne puissiez a chief traire. 7968
 Cil ne fait mie molt son preu
 Qui par parole se fait preu.
 Mius que parole valt bien fais,
 Mais a paines est nus parfais. 7972
 Par vous n'iere hui mais atelés
 Au char, mais ore pestelez
 En cele boe par loisir,
 Et tant i puissiez vös gesir 7976
 Que je vous en irai hoster.
 Or viegne vos conpains joster
 Et vous prenez vostre gaaing,
 C'or avez vous vostre droit baing, 7980
 Car l'autre baing a tort eüstes
 Quant vous primes chevaliers fustes ;
 Malvaisement gardé l'avez.
 Chevaliers doit estre lavez 7984
 De toutes vilaines costumes ;
 Il ne doit avoir amertumes
 En son cüer, par quoi felonie
 Face ne laide vilonnie. 7988
 Qui a tort vilonnie fait
 Autrui, sachiez il se mesfait.
 Qui autrui fait honte et laidure,
 N'est merveille se il endure 7992
 Alcune fois anui et perte.
 De vostre vilonnie aperte

Avez vous vo loier eü :
 Vous en avez souvins jeü, 7996
 Ce m'est avis, en la longaigne. »
 Li quars l'ot, s'en ot tele engaigne
 Que por un poi de doel ne crieve.
 Maintenant en estant se lieve, 8000
 Si est sor son cheval montez :
 Grans fu et fiers de grans fiertez ;
 L'elme lace, l'escu a pris.
 Li chevaliers qui entrepris 8004
 Trova Percheval au chastel
 Saisi Percheval au chantel
 De l'escu, et si li ensaigne
 Que de bien joster ne se faigne, 8008
 « Car certes j'ai oï conter
 Que cil qui vient a vous joster
 Ne chaï por chevalier onques. »
 Dist Perchevaus : « Or charra donques 8012
 Une fois, si ert la premiere,
 Se ma lance remaint entiere. »
 Li chevaliers qui fu engrés
 De joster ot non Aligrés. 8016
 Il prent une lance pleniere,
 Grosse et forte de grant maniere,
 De Percheval s'est eslongiez :
 Ja mais ses doels n'ert alegiés, 8020
 Ce dist, s'il n'abat Percheval.
 A tant point chascuns le cheval
 Et molt cointement se jamboie.
 Es escus ou l'ors reflamboie 8024
 Se fierent si tres durement
 Que tout oltre legierement
 Font passer les fers et les fus ;

Si se heurtent si que li fus De lor elmes estinchela.	8028
Chascuns des chevaus chancela Et bransla des garez derriere ; N'i a lance tant soit entiere	8032
Qui ne soit volee en tronchons. Li vassaus vide les archons, Car Perchevaus si bien l'empaint Et du cors et de l'escu paint	8036
Qu'a terre du cheval l'envoie. Ni a celui qui ne le voie De lui les talons contremont Que jesir le vit en un mont.	8040
Li chevaliers qui despoilliez Estoit forment en devint liez, Onques mais n'ot joie greignor. Perchevaus a dit au seignor :	8044
« Sire vassal, venez combattre, Car abatu en sont li quatre. Hastez vous, tans est de souper :	8048
Se de vos mains puis eschaper, Se Dieu plaist, j'avrai a mengier, Voire a plenté et sanz dangier.	
— Se vous pooiez mengier un buef, On vous saoleroit d'un oef,	8052
Quant de mes mains eschaperez. — Voire ensi con vous esperez, Dist Perchevaus, mais aparmain, Se Dieus salve ma destre main,	8056
Sarez vous con m'espee taille. » Parsamans, qui velt la bataille, Est saillis sor un vair destrier, Si s'afiche que li estrier	8060

En ploient, que li cuirs estent.
 L'elme lacié, que plus n'atent,
 Vint au char, son escu saisi,
 Une fort lance prent ausi ; 8064
 Et Perchevaus une autre en prent.
 Li sires qui d'aïr esprent
 Fait un eslais, puis s'i retourne.
 Chascuns de bien joster s'atorne, 8068
 Si laissent les chevaux aler,
 Plus tost c'oisiaus ne puet voler
 Corurent andoi li cheval.
 Li chevaliers fiert Percheval 8072
 Isi tres angoisseusement,
 Et Perchevaus lui ensement,
 Que li escu fendent et croissent
 Et les lancés en pieces froissent. 8076
 Molt se sont bien entrencontré.
 Ainçois qu'il se soient outré,
 Se hurtent de cors et de pis.
 Je ne sai qui en ot le pis 8080
 De la joste, mais trestot quatre
 Chaïrent jus, et por combatre
 Saillirent li chevalier sus.
 Il ne se traient pas en sus, 8084
 Ains ont sachiez les brans forbis ;
 Chascuns a mis son escu bis
 Sor son chief et puis s'entrevient.
 Hé ! Dieus ! con bel il lor avient 8088
 Li brant d'acier es destres mains !
 Je ne sai liquels feri mains
 Ne liquels plus ne plus sovent,
 Mais l'uns l'autre chierement vent 8092
 Son mautalent et son corrous.

Il n'ont hauberc ne soit derrous,
 Escu qui ne soit dehachiez,
 Ne hiaume qui ne soit trenchiez 8096
 Et molt durement enbarrez.
 Li cop les ont si esbarrez
 Que il n'ont de dormir talent,
 N'il ne sont perreceus ne lent 8100
 De lor cors grever ne confondre.
 Parsamans quide de doel fondre
 Quant Percheval ne puet conquerre :
 Hardïement le va requerre 8104
 Par grant ire a l'espee nue ;
 Et Perchevaus en sa venue
 Li recort sore maintenant.
 Plus de cinc cops en un tenant 8108
 Li a doné par mi le chief,
 Et puis le hurte de rechief
 Si fort que cil toz en chancele ;
 Il n'a oeil ne li estincele 8112
 Des cops que Perchevaus li done.
 Et cil al guenchir s'abandone
 Qu'il ne se set ou garandir,
 N'il ne set cele part gandir 8116
 Que Perchevaus ne le consive
 Et que sovent ne le porsive ;
 De bien ferir n'est mie las.
 Ne remest corioie ne las 8120
 Entor le coler a desrompre.
 Perchevaus, quanqu'il puet desrompre,
 Le fiert si qu'a terre l'abat ;
 De l'espee tant le debat 8124
 Que le visage li noirchi.
 « Ha ! fait il, chevaliers, merci,

Car tu m'as conquis et outré,
 Se j'ai ma cruauté mostré 8128
 As trespasans, mais en ma vie
 N'averai de mal faire envie,
 Mais volentiers m'amenderai.
 — Voire ensi come je dirai, 8132
 Fait Perchevaus, se vous volez
 Avoir merchi, que ne tolez
 Ja mais a chevalier harnois,
 Ne ne ferez maus ne anois, 8136
 Ne ja mais jor n'ert escondis
 Vostre hosteus, ainz sera tozdis
 A chevaliers abandonnez,
 Et a cest chevalier donez 8140
 Son harnois que vous li tolistes,
 Et a toz jors mais sera quites
 Li passages et delivrez,
 Ou vous ja mais plus ne vivrez. » 8144
 Dist Parsamans qui la mort doute :
 « Sire, vostre volenté toute
 Ferai et quanques demandez. »
 Perchevaus a les sains mandez, 8148
 Puis a fait jurer Parsamant
 Desor les sains de saint Amant
 Qu'il toz les jors de son eage
 Clamera quite le passage. 8152
 Li chevalier après jurerent,
 Qui onques ne s'en parjurerent,
 Et li borgois ont fait autel.
 Percheval maintenant a l'ostel ; 8156
 Desarmé l'ont isnelement,
 Puis après l'ont molt noblement
 Et atorné et affublé,

Puis ont son cheval establé	8160
Que bien ot deservi provende,	
Coment c'on chierement le vende.	
Bien fu aesiez li chevaus,	
Et si vous di que Perchevaus	8164
Fu plus honorez que uns rois.	
Il a fait rendre les conrois	
Au chevalier que il trova	
Si entrepris, et si rova	8168
A la porte aler por s'amie.	
Li sires nel delaie mie,	
Ainz fait tantost ce qu'il comande.	
Li sires la pucele mande	8172
Maintenant par deus chevaliers,	
Qui sage sont et bel parliers.	
La pucele trovent dolente,	
Qui de doel faire ne s'alente ;	8176
Molt s'est durement dementee.	
Li chevalier l'ont confortee :	
« Dame, font il, laissez ester	
Le doel et tout sanz arester	8180
Cest liu guerpissiez et voidiez,	
Car molt est que vous ne quidiez,	
Car vostre ami tot quite arez	
Sanz anui, qui est delivrez	8184
Par le chevalier qui or vint.	
Ainc tels aventure n'avint	
Con vostre ami est avenue. »	
Cele est si lie devenue	8188
Que ele ne set que ele face ;	
Ses oeüs essua et sa face,	
N'onques por ce ne se recroit	
De plorer c'a paines les croit,	8192

Neporquant avec als s'en va.
 Molt fu lie quant el trova
 Son ami qui fait grant leece.
 Li vassaus contre li se drece 8196
 Et vient vers li brache estendue,
 Si l'a a terre descendue,
 Puis fait son cheval establer.
 Li sires fait desassambler 8200
 Les gens qui par les rues furent.
 Escuier et serjant corurent
 Por les tables appareillier ;
 Dames, puceles, chevalier 8204
 Levent-lor mains isnelement ;
 Assis se sont melleement.
 Molt fu li soupers de chier pris.
 Perchevaus l'a par talent pris, 8208
 Car il en avoit grant mestier :
 Les braons d'un lardé entier
 Menja d'un cherf a un chaut poivre.
 Molt a mengier et molt a boivre 8212
 Ot chascuns tout a son devis.
 Molt fu Perchevaus bien servis
 Et li chevaliers et s'amie.
 Après souper ne targent mie 8216
 Li vallés des lis aprester,
 Car de couchier se velt haster
 Perchevaus por matin movoir.
 Cors et chastel, terre et avoir 8220
 Li a li sire a bandon mis.
 La damoisele et ses amis
 Servent Percheval al mengier
 Come celui que molt ont chier, 8224
 Car ostez les avoit d'anui ;

- Puis sont couchié par devant lui
 En deus lis soés et bien fais.
- Molt s'est bien de dormir refais 8228
 Perchevaus qui mestier en ot,
 Et quant la gaite corner ot
 Le jor, si se lieve erranment,
 Et li chevaliers ensement 8232
 Et s'amie qui se hastoit,
 Car la vilenaille dotoit
 Qu'il ne lor feïssent anui,
 S'il demorassent après lui. 8236
 Mais bien sachent que non feront :
 Ja mais nul jor ne soffriront
 Que on face a chevalier honte.
 Perchevaus et li vassaus monte 8240
 Et la pucele, car lor seles
 Furent mises ; les damoiseles
 Montent et tout li chevalier
 Et ensement li escuier : 8244
 Fors de la vile les convoient
 Et a un chemin les avoient.
 Congié ont pris, si s'en retornent.
 Perchevaus et cil se ratornent 8248
 D'aler grant aleüre ensamble,
 Mais n'orent mie, ce me samble,
 Plus d'une lieue chevalchié,
 Quant trovent un chemin forchié. 8252
 Une crois ot sor un chemin
 Et un brieve de parchemin
 Ou il avoit letres escriptes
 De fin or, et grans et petites : 8256
 A la crois estoit atachiez.
 Li briés dist : « Vous qui chevalchiez,

- Tornés le grant chemin a destre :
 C'est la voie de Durecestre · 8260
 Qui la gent maine asseürté ;
 L'autre voie est par verité
 Par non la Voie Aventureuse :
 Molt est a errer perilleuse. » 8264
 Perchevaus les letres regarde,
 Puis s'en perchoit et s'en prent garde
 De che que les letres disoient
 A chiaus qui par iluec passoient, 8268
 Car il avoit a lire apris.
 Perchevaus a par le main pris
 Le chevalier, si dist : « Estez,
 Car mains yvers et mains estez ' 8272
 Sui por le Graal traveilliez,
 Et sovent matin esveilliez,
 Quant de dormir desir avoie :
 Aler me covient ceste voie, 8276
 Car c'est la voie d'aventure.
 Et vous en irez a droiture,
 Cel droit chemin de Durecestre,
 Mais tant me dites de vostre estre, 8280
 Le vo non et le vostre amie
 Me dites, nel me celez mie,
 Puis vous en irez cel chemin.
 — Sire, j'ai non Semiramin, 8284
 Ne vous en doi faire celee ;
 M'amie est par non apelee
 Roseamonde de Nobles Vals.
 -- « Biaus dols amis, dist Perchevaus, 8288
 Alés a Dieu. » A tant s'en part.
 Et cil s'en vait de l'autre part

Qui s'amie avec lui en maine.
 Et Perchevaus cele semaine 8292
 Erra et ot molt de grietez,
 Car li païs fu desertez,
 Si ot sovent et faim et soi.
 Einsi chevalcha tot par foi 8296
 Tant que venir vit deux puceles.
 Perchevaus vit molt bien que celes
 Molt tres grant dolor demenoient,
 Car un chevalier amenoient 8300
 En une litiere couchié.
 Quant Perchevaus ot approchié
 La litiere, si aperchut
 Que cil qui par dedens se jut 8304
 Ot ars les jambes ambesdeus
 Et les quisses, de c'est li duels
 Que les deus damoiseles font,
 Car en larmes chascune font. 8308
 Et Perchevaus les esgarda
 Qui les salue, et demanda
 Qui cil estoit que iluec voit
 Et qui si malbaillis estoit : 8312
 Mais celes sont si plaines d'ire
 C'ainc un sol mot ne porent dire,
 Car chascune a son doel pensa.
 Et Perchevaus outre passa 8316
 Que riens plus ne lor velt enquerre,
 Ainz pense au Graal qu'il va querre.
 A tant a un val avalé,
 Mais n'a mie granment alé, 8320
 Quant il encontra de rechief
 Un chevalier qui ot le chief
 Tot ars et le col ensemment ;

- Uns escuiers molt durement 8324
 Plorant l'emporte devant lui.
 Perchevaus salue celui,
 Si li demande l'achoisson,
 Coment et par quele raison 8328
 Estoit cil si mal atornez.
 A tant s'en est plorant tornez
 Li escuiers sanz dire mot.
 Perchevaus grant merveille en ot 8332
 De ces gens qu'il a encontrez.
 Il est en cel chemin entrez
 Ou onques chevaliers n'ala
 Qui peüst revenir de la 8336
 Sanz mort ou sanz estre affolez.
 Li chemins n'est pas desfoulez,
 Ce m'est avis, ne molt batus.
 Lors s'est Perchevaus enbatus 8340
 Par mi une lande molt bele.
 Lors vit dalez une combele
 Une crois molt bele de fust :
 Ne quit c'onques mius faite fust. 8344
 Deus hermites vit a le crois :
 Li uns maine molt grant escrois
 Qui plain poing de vergues tenoit
 Dont molt sovent grans cops donoit 8348
 La crois, tot ausi durement
 Et ausi vigoureusement
 Con se il le volsist abatre,
 N'onques ne le finoit de batre 8352
 Tant con l'alaine li duroit.
 L'autres hermites aroit
 La crois a jenols, jointes mains,
 En un randon a tout le mains 8356

Cent fois ainçois qu'il se repose.
 Perchevaus esgarde grant pose
 Les hermites, si s'en merveille
 Que l'uns de batre se traveille 8360
 Et li autres de l'aourer,
 Et de Dieu proier et ourer.
 Et Perchevaus avant passa
 Qui en son corage pensa 8364
 Qu'il demanderoit la raison
 Por coi et quele entention
 Avoit cil qui le crois feroit ;
 De che que l'autres l'aoroit 8368
 Ne s'est il esmerveilliez pas.
 Vers als s'en vint isnel le pas,
 Si lor a dit qu'il velt savoir
 S'est par folie ou par savoir 8372
 Qu'aloit cil la crois debatant.
 Ja li eüst conté a tant
 Li ermites sanz nule atente,
 Mais d'autre chose ara entente 8376
 Perchevaus a poi de saison,
 Car salir voit fors d'un buisson
 Une beste grant a merveille.
 Perchevaus toz s'en esmerveille 8380
 Que de demander est refrains,
 Car la beste, qui tote est prains,
 S'en va par devant lui fuiant,
 Et dedens li vont abaiant 8384
 Si faon, con chien qui glatissent,
 Ne de crier ne se tapissent,
 Ains les ot on, mien escïentre,
 Ausi cler con hors de son ventre 8388
 Fuissent issu et le chachassent

Et de li prendre s'esforchassent.
 La beste fuit quanqu'ele puet
 Et Perchevaus après s'esmuet 8392
 Quanqu'il puet, cheval eslaissié,
 Si a le demander laissié
 Des hermites que il trova.
 Après cele beste s'en va 8396
 Toute jor tant qu'il l'a atainte,
 Car de corre fu si atainte
 Et tant l'ont si faon grevee
 Qu'en deus est partie et sevreë ; 8400
 Et si faon fors de li salent
 Qui la deveurent et assalent :
 Sa char ont dusqu'as os mengié.
 Et tantost sont tot erragié, 8404
 Et tant se sont esvertué
 Que tot se sont entretué.
 Quant Perchevaus la merveille a
 Veüe, molt se merveilla, 8408
 C'onques mais ne vit sa pareille.
 Perchevaus d'errer s'apareille,
 Car il n'a cure d'arester.
 La nuit vint, si se volt haster 8412
 Se il venroit a nul manoir
 Ou la nuit peüst remanoir
 Et ou il hebergier peüst
 Et d'aucun bien se repeüst, 8416
 Car il en aroit bon mestier.
 Lors comencha a anuitier
 Et si fist molt grant oscurté.
 Perchevaus, qui mainte durté 8420
 Avoit enduree et veüe,
 A une grant clarté veüe,

- Si s'est adreciez cele part :
 D'alcun bien quide avoir sa part. 8424
 Tant a cele part chevalchié
 Ou la clartez l'ot adrechíé
 Qu'il trova une porte overte
 Qui de genés estoit coverte 8428
 Et la cors close de palis.
 Treize hermites molt enpalis
 Trova dedens une maison ;
 N'avoient mie grant foison 8432
 De viandes a lor souper,
 Ains orent fait un pain colper
 En treize, s'en ot une piece
 Chascuns que devant soi depiece. 8436
 Devant le maistre ot un serjant
 Qui tint une chandoile argant :
 Devant lui a servir comence,
 Et uns autres son pain li trenche 8440
 Qui n'estoit mie de forment.
 Molt se merveillierent forment
 Quant il ont veü Percheval
 Qui sist armez sor son cheval. 8444
 Et Perchevaus les salua,
 Et puis après le salu a
 L'ostel par charité requis :
 « Assez ai et cerchié et quis 8448
 Hostel, mais trover ne le poi. »
 Dist uns serjans : « Vous arez poi
 A mengier, et vostre chevaus.
 — Ce poise moi », dist Perchevaus. 8452
 Et cil qui d'aus fu sire et mestre
 Et qui molt bien le devoit estre
 A rové Percheval descendre.

- Li sergant vont son cheval prendre, 8456
 Si l'ont en l'estable mené,
 Si ot del fain novel fené.
 Et Perchevaus desarmez fu
 Puis le font asseoir au fu ; 8460
 De ce qu'il ont fu bien servis,
 Mais Perchevaus, ce m'est avis,
 Menga petit, car il n'avoit
 Rien nule dont eüst covoit, 8464
 Car del pain ne pooit gouster.
 Mais si come l'en dut oster
 Les napes, s'entra en la porte
 Une pucele qui aporte 8468
 Un escu bel a grant merveille,
 Tout blanc, a une crois vermeille :
 En la crois ot tel saintuaire
 Dont on ne se doit mie taire : 8472
 Une pieche avoit ens entee
 Du saint fust ou fu tormentee
 La chars Jesu Crist, le fil Dieu.
 En l'escu furent doi Caldieu 8476
 Qui a Dieu furent converti,
 Mais de tant furent averti
 A l'escu faire et manovrer
 Que nus ne pooit recovrer 8480
 Ne le saint Graal ne la Lance
 Dont li fers onques ne restance
 De sainier, fors cil solement
 Qui cel escu premierement 8484
 Porra del col a la pucele
 Despendre, qui tant par est bele.
 Mais garde bien que main n'i mete
 Ne de l'oster ne s'entremete 8488

Nus hom, s'il n'est li plus hardis
 Del mont et en fais et en dis
 Et confez de toz ses pechiez,
 Car tantost seroit depechiez 8492
 De mil pierres et lapidez,
 Ja si bien ne seroit gardez.
 Letres i ot qui ce devisent
 A toz chiaus qui l'escu avisent 8496
 Qui de lire ont entendement.
 Cele sanz nul arestement
 En est en la maison entree.
 Cherchié avoit mainte contree 8500
 La damoisele, soir et main,
 Mais ainc nus n'i tendi la main
 A l'escu qui lesist la letre :
 Ne s'en osoient entremetre, 8504
 Car trop faisoit a redouter.
 La dame corut desmonter
 Perchevaus sanz nis un atendre,
 Mais ancois li ala despendre 8508
 L'escu du col qui petit poise,
 Et si estoit de tel despoise
 L'escu qu'il ne crient cop de lance.
 La pucele a terre se lance, 8512
 Quant voit que il a l'escu pris :
 Bien set qu'il est du plus grant pris
 Que chevaliers qui soit el monde,
 Car confesse qui pechié monde 8516
 Li fait molt son pris amender.
 La pucele sanz comander
 Va seoir avec Percheval,
 Si fait destorser son cheval 8520
 De deus bareus toz plains de vin

Et de deus pastez de conin
 Qu'ele ot torsez en une nape.
 Li hermites sor une chape 8524
 Les fait mengier tout a par aus.
 Les pastez et les deus baratus
 Ont par devant Percheval mis.
 Dist Perchevaus : « Biaus dols amis », 8528
 A un vallet, « pren ces pastez
 Et ces barieus, si les portez
 A ces rendus a departir.
 — Sire, ne vous en quier mentir, 8532
 Fait cil, nel tenez a eschar,
 Il ne menjüent point de char
 Et si ne boivent point de vin.
 Et si vous di, par saint Lievin, 8536
 Qu'al mengier ne parolent point,
 Fors li rois, mais a chascun point
 Que gens viennent puet il parler,
 Et al venir et al aler. 8540
 Mais or mengiez a liie chiere,
 Et vous, ma damoisele chiere,
 Et puis porrez parler al roi
 Sanz vilonnie et sanz desroi ; 8544
 Et se vous li demandez rien,
 Il vous conseillera molt bien ;
 Et se vous avez rien veü
 Dont vous n'aiez le voir seü, 8548
 Demandez lui, tot asfiance
 Vous dira la senefiance ;
 Et se son non savoir volez,
 Em baptisme fut apelez 8552
 Elyas Anaïs en sornon :
 Li Rois Hermites a a non. »

Perchevaus l'ot, joie en ot grant,
 Du demander est molt en grant 8556
 Des aventures qu'a veües,
 Que il n'avoit mie seües,
 Des hermites ne de la beste
 Que li faon a tel tempeste 8560
 Fisent crever, puis le mengierent,
 Et coment après erragierent,
 Et por coi s'entreocirrent tuit.
 Le demander met en estuit 8564
 Perchevaus, tant que mengié ot,
 Et la pucele; a l'ains que pot
 A lués le roi mis a raison.
 « Sire, fait il, en vo maison 8568
 M'avez fait hebergier anuit;
 Sire, por Dieu ne vous anuit
 De che que je demanderai.
 Les aventures vous dirai 8572
 Que jou ai hui cest jor trovees,
 Car ce sont merveilles provees. »
 Lors li conte premierement
 Des deus hermites l'errement 8576
 Dont li uns la crois aoroit
 Et l'autres forment le feroit,
 Et de la beste li descoevre
 De chief en chief trestote l'oeuvre. 8580
 Li Rois Hermites escouta
 Quanques Perchevaus li conta;
 Lors pense, si baisse le chief,
 Et puis le drece de rechief. 8584
 A Percheval dist: « Biaus amis,
 En grant pensee m'avez mis
 De che que vous me demandez.

Gardez que bien i entendez, Car cil qui ot et rien n'entent Fait tot ausi con cil qui tent Sa rois por le vent astenir ;	8588
Qui ot et ne velt retenir Bone parole, il en est pire. Ce est negligense et despire Celui qui le bien entroduit, Mais on n'aroit a piece duit Le bruhier a prendre l'aloë.	8592
Qui malvés a bien faire loë Si torne tot a gaberies ; Cil pert molt bien ses margeries Qui devant les pors les espant. Cil qui vont salant et trepant Sont mais esgardé des avers.	8600
Por coi ? por ce que li rovers Lor torne tot a amertume, Que averont mais tel costume Qu'il vont mais ançois as caroles Qu'a oïr les bones paroles Dont on devient cortois et preu, Et si a on honor et preu.	8604
Biaus dols amis, ce dist li rois, Mius valt mesure que gabois, Par mesure est mains hom conquis. A che que vous m'avez requis A molt a dire et a entendre. Mais se vous tant volez atendre Que je vous en die le voir, Le mius que je porrai savoir Vous en dirai les veritez.	8612
Biaus dols amis, or escoutez	8616
	8620

Des deus hermites la raison.
 Chascuns a bone entention.
 L'ermites qui le crois feroit,
 Sachiez que durement ploroit, 8624
 Car il debatoit cele boise
 Por la dolor et por l'angoisse
 Que Jesu Cris en crois soffri
 Quant il por nous son cors offri 8628
 A mort, ce est fine veritez,
 Et por che qu'il fu tormentez
 En la crois et soffri martyre,
 Por che le batoit il a tyre 8632
 L'ermites : c'est chose passee.
 Or vous ai la raison mostree
 Por coi issi la crois feroit.
 L'autres hermites l'aoroit 8636
 Por che que la chars glorieuse,
 Qui tant est dolce et prescieuse,
 Fu dedens la crois traveillie
 Et estroitement quevillie 8640
 De trois grans quevilles de fer,
 Par coi il racheta d'infer
 Ses armes qui l'orent servi.
 Dieus n'avoit mie deservi 8644
 Qu'il fust en crois crucefiez,
 Por ch'est li fus saintefiez
 De la crois que Dieus i ru mis.
 Et sachiez bien, biaux dols amis, 8648
 Que l'anemis la crois redoute
 Plus que rien nule, n'est pas dote,
 Que par la crois perdi sa proie.
 Et cil qui Dieu aore et proie 8652
 Que la crois li soit ses escus

N'iert ja par anemi vencus :
 S'il fait de la crois sor lui signe
 Trestot li esperit maligne 8656
 S'en fuient, tant doutent la crois,
 Biaus dols amis, vraiment crois,
 Et por che l'aoroit l'ermites.
 Or vous ai les pensees dites 8660
 Des hermites toutes apertes.
 Or vous aconterai des bestes
 Qui dedens lor mere crierent
 Et l'ocisent et le tuerent, 8664
 Et puis après sa char mengierent,
 Et por che après erragierent,
 Puis s'entreocisent demanois.
 Biaus amis, ne vous soit anois 8668
 Se je met alques a respondre.
 Et qui contre volra despondre,
 Je li proverai orendroit
 Que j'en dirai raison et droit, 8672
 Qu'en la vie de Dieu me fie.
 Amis, la beste senefie
 Sainte Eglise ; or oiez coment.
 Vous savez bien que saintement 8676
 Doivent la gent al mostier estre ;
 Et tot maintenant que li prestre
 Comenche la messe a chanter,
 Donques parolent d'achater 8680
 Blés, avaines et muïssons,
 Dont sort une tels mormisons
 Et tels noise par le mostier
 Que li prestres le saint mestier 8684
 Ne puet ne son service faire ;
 Et se li clers les rove taire

- Si crient lués : « Chantez, chantez,
 « Sire prestres, se vous hastez 8688
 « Et faites vo service a plain.
 « Nous deüssons estre tot plain
 « De nos viandes et mengier. »
 Teus gens ne sont pas el dangier 8692
 De Dieu, qui onques ne recroient
 De mal faire et assez plus croient
 Qu'en Dieu en lor grans pances lees,
 Si n'ont pas letres seelees 8696
 De vivre plus que cordelois.
 Tels gens ne prisent deus ballois
 Sermons ne predications.
 Cil senefient les faons 8700
 Qui dedens lor mere crierent
 Et l'ocisent et devorerent,
 Car bien devore Sainte Eglise
 Cil qui parole en son servise. 8704
 Et quant ce vient al diemence
 Que li prestres son pri comence
 Et que les festes lor anonche
 Et les comandemens prononce 8708
 Sor paine d'escommincement,
 Et cil de son comandement
 Ne donroient vaillant deus oez,
 Car il les ont trespassez lués. 8712
 Escommincement point ne prisent
 Et les comandemens desprisent ;
 Por rien c'on sache comander
 Ne se welent il amender, 8716
 Ne mais li uns a l'autre note :
 « Chis prestres toute jor riote,
 « Dehait qui por son preecier

- « Laira son preu a porchachier. » 8720
 De bien faire se descoragent :
 Ce sont li faon qui erragent,
 Qui s'ochïent par non savoir.
 Je di que cil est mors por voir 8724
 Qui les comandemens ne croit
 De Sainte Eglise et ne recroit
 Onques nule fois de mal faire.
 Biaux amis, enten cest affaire. 8728
 Quant Dieus fist Adan al premier
 Veal lui le fruit d'un pomier
 Et desfendi n'en mengast point ;
 Et por che qu'il passa cel point 8732
 Fu il jectez de paradis,
 Et nus et povres et mendis,
 Et covint morir par le mors
 Et fu en la mort d'enfer mors 8736
 Par le comant qu'il trespasa.
 Dieus par mi le mort en passa
 Por lui rachater de torment.
 Et qui ne croit comandement 8740
 C'on en Sainte Glise comande,
 Je di, s'il est qui le demande,
 Que cil s'ocist veraïement
 Qui maint en escommencement : 8744
 Tant qu'il i maint, tant est il mors
 Qu'ausi qu'Adans qui morst le mors
 Par coi fu inobediens.
 Je di, teus est mes escïens, 8748
 Que cil resambent les faons.
 Biaux dols amis, dit vous avons
 La verité et le sermon,
 Or si vous comant et semon 8752

Que vous molt bien le retenés :
 Se de pechié vous astenez,
 Si porrez paradis conquerre,
 Et del Graal que alez querre 8756
 Porrez savoir la vraie ensaigne
 Et de la Lance por coi saigne.
 Bien sai que vous estes mes niez :
 Une seror petite aviez 8760
 Qui demora après vo mere,
 Sanz conseil d'aïde et de frere,
 Entre estrange gent, en tel terre
 Ou si ami nel sevent querre ; 8764
 S'est ele de roial lignage,
 Mais li meillor et li plus sage
 Sont par les guerres escillié ;
 Maint preudome sont avillié 8768
 Et mis arriere et debouté,
 Quant il chaient en povreté. »
 Dist Perchevaus : « Vous dites voir,
 Mais de ma suer vous faz savoir 8772
 Qu'ele est au Chastel as Puceles,
 La est avec les damoiseles
 O ma dame sainte Ysabel. »
 Al Roi Hermite fu molt bel 8776
 De che que Perchevaus li conte,
 Car volentiers entent le conte
 De le bone dame saintisme,
 S'en aore le roi hautisme 8780
 De ce qu'ele est encore vive.
 De joie li cuers l'en avive
 Et durement l'en asoage,
 Car molt estoit de grant eage : 8784
 Si con li Rois dist a cel tans,

- De ce n'estoit il pas doutans,
 Ot ele trois cens ans passez,
 Si come il croit et plus assez, 8788
 Si li est molt bel qu'ele vit,
 C'onques mieldre dame ne vit
 Ne de si grant religion.
 Sovent voit mainte legion, 8792
 Des angles qui vont sanz desroi
 A l'ostel le Pescheor Roi
 Et entr'aus le saint Graal tienent,
 Et l'oïste ens, de coi il soztient 8796
 La vie al pere celui roi
 Que Perchevaus trova sanz roi
 Peschant ens el petit navel.
 D'erbe fresche et de fain novel 8800
 Firent li serjant une couche,
 Et li Rois Hermites s'i couche
 Tos vestus, c'onques n'i ot coute.
 Chascuns des hermites s'acoute 8804
 A la couche por reposer.
 Puis vont de Percheval penser
 Li sergant, si li font un lit
 Ou il n'ot gaires de delit. 8808
 Un autre en fisent la pucele,
 Mais bien vous puis dire que cele
 Ne reposa ne ne dormi :
 Bien volsist avoir a ami 8812
 Percheval et bien li pleüst
 Et que de lui un fil eüst,
 Car donques se porroit vanter
 Et par tout por voir aconter 8816
 Que del plus hardi chevalier
 Qui onques naquist de moïllier

Averoit le deduit eü.
 Ensi a toute nuit jeü 8820
 Sans dormir en cele pensee.
 Et quant cele nuis fu passee
 Que del jor choisirent le point,
 Li hermite ne targent point, 8824
 Ains vont a une chapelete
 Qui molt estoit et bele et nete,
 Si ont iluec lor eures dites ;
 Puis se revest li Rois Hermites, 8828
 S'a la sainte messe chantee.
 Et Perchevaus l'a escoutee
 De cuer molt ententivement,
 Et la damoisele ensemment 8832
 Qui l'escu avoit aporté.
 Et quant l'ermites ot chanté,
 Qui de grant terre ot esté rois,
 Lors a demandé ses conrois 8836
 Perchevaus, si s'apareilla,
 Et uns vallés s'ajenoilla
 Qui li aida qu'il fu armez.
 L'escu qui bien fu enarmez 8840
 Tint la pucele devant lui,
 Car en la cort n'avoit celui
 Qui a l'escu un point aviegne
 Tant que des letres li soviagne 8844
 Qui en l'escu furent portraites,
 Por coi les vertus sont retraites
 De l'escu et la dignitez.
 Onques ne fu si bons ni tez 8848
 Avec Percheval, come il fu :
 N'a garde d'arme, ne de fu,
 Car ja jor n'en sera blesmis.

- Perchevaus l'a a son col mis, 8852
 Quant montez fu, qu'il n'a targié ;
 As hermites a pris congié
 Perchevaus, qui a tant s'en part.
 Et la pucele d'autre part 8856
 S'en va, qui a Dieu le comande.
 Perchevaus pas ne li demande
 De l'escu ou ele le prist,
 Dont il molt durement mesprist 8860
 Quant il n'en demanda le voir,
 Car onques puis nel pot savoir,
 S'en ot eü molt de travaux.
 Quant eslongiez fu Perchevaus 8864
 Le giet d'une petite pierre,
 Lors s'apense et dist : « Par saint Pierre,
 Or sui je fols, que n'ai enquis
 Ou li escus que j'ai conquis 8868
 Fu pris, et qui le m'envoia. »
 A tant tres par mi la voie a
 Gardé ou la pucele aloit,
 Por che que demander voloit 8872
 De l'escu, mais il n'en voit point :
 Et neporquant cele part point,
 Mais il ne l'a mie trovee.
 A merveille le tint provee, 8876
 Quant il ne l'a aconsivie ;
 Si l'a grant pieche porsivie,
 Mais n'en puet savoir va ne voie.
 Il dist bien qu'ele se desvoie 8880
 Par faerie et par fantosme ;
 Il jure le baron saint Cosme
 Que il ira encore après
 Savoir se ja, ne loinz ne pres, 8884

- En porroit noveles aprendre :
 Or puet assez chachier sanz prendre,
 Car ceste prise a il passee.
 Lors li revient une pensee 8888
 Des chevaliers que il vit ars,
 Dont dist : « Certes je sui musars,
 Quant je nel dis al Roi Hermite :
 Bien m'en eüst la verté dite 8892
 Ensement come il fist des bestes ;
 Mais je sui si durs et rubestes
 C'a paines puis nul bien entendre ;
 Je n'ai mie le cuer si tendre 8896
 D'apprendre nul bien que je sache :
 Fous est qui bouste ne qui sache
 Sot ne fol por bien ensaignier. »
 A tant se comenche a saignier 8900
 De la merveille que il voit
 Et de ce que veü avoit
 La damoisele, or ne voit mie,
 Si puet trois liues et demie 8904
 Veoir et en coste et en les.
- Pensant est un val avalez,
 Entrez est en gaste contree.
 Lors a une dame encontree 8908
 Qui molt tres grant dolor demaine.
 La damoisele un char amaine
 Qui d'un drap d'or estoit covers.
 La pucele avoit a envers 8912
 Ses draps vestus et sa chemise.
 Durement s'estoit entremise
 Des chevaus semondre et chachier
 Qui sont au char, car porchachier 8916

Velt la vengeance son ami.
 Passé a deus mois et demi
 Qu'ele ot en tel maniere erré.
 Il sambloit que dedens un ré 8920
 Eüst esté ars ses amis,
 Qui par dedens le char fu mis,
 Que piez, jambes, quisses et ventre
 Avoit ars, al mien escientre ; 8924
 Tresci par deseure le chaint
 L'avoit li fus ars et ataint :
 Tains et noirs fu tot l'aparent.
 Li chevaliers n'avoit parent 8928
 Ou la dame ne l'ait mené.
 Tozdis a son doel demené
 Por che qu'il n'osent paine metre
 Ne de lui vengier entremetre, 8932
 Car il n'en venroient a chief.
 La pucele ot torné son chief
 Et son vis par devers le char :
 Voé ot que ja mais de char 8936
 Ne menjera por nul endroit,
 Ne vestira ses dras a droit
 Ja mais, ne de vin ne bevra
 Devant a ce que ele avra 8940
 Esté vengie de celui
 Qui ne crient ne doute nului,
 Par cui ses amis estoit mors
 Qui plus estoit noirs que uns Mors : 8944
 Tout la ou li fus l'ot ataint
 L'avoit il tout noirchi et taint.
 La pucele sor les timons
 Estoit du char, si a semons 8948
 D'une corgie les chevauts

Qui sont au char, et Perchevaus
 S'est vers la pucele adreciez ;
 De Dieu qui fu en crois drechiez. 8952
 Molt cortoisement le salue.
 La dame est toute tressalue,
 Qui encore veü ne l'ot ;
 Vers lui se retourne quant l'ot. 8956
 Mais quant ele a veü l'escu
 De tot l'aé qu'ele ot vescu
 Ne fu mais ausi esmarie.
 « Ha ! fait ele, sainte Marie, 8960
 Trové ai ce que j'ai tant quis,
 Car par cestui sera conquis
 Li deables, li anemis,
 Par cui est mors li miens amis ; 8964
 Mais par cestui sera vencus.
 Bien le tesmoigne li escus
 Que je li voi a son col pendre,
 C'onques nus hom n'osa despendre 8968
 De la ou cil l'a despendu
 Qui lués n'eüst le chief perdu ;
 Mais cist est dignes de l'avoir. »
 Perchevaus, qui volsist savoir 8972
 De le pucele l'errement,
 Li a demandé erranment
 Por coi ele est si atornee.
 Cele qui vers lui s'est tornee 8976
 Molt debonairement li conte
 De chief en chief trestot le conte,
 Que li Chevaliers au Dragon,
 Qui frere est al roi Maragon, 8980
 Fist dedens les Illes de mer
 Une cité faire et fremer

- De tours, de murs, et bel et gent,
 Si le puepla d'une tel gent 8984
 Qui onques Dieu ne volrent croire
 Ne de nul mal faire recroire ;
 Et li sires s'abandonna
 A mal faire et toz se dona 8988
 Au deable par tel devise
 Qu'en lui eüst tel force mise
 Qu'en bataille nus n'en estor
 Ne peüst a lui durer tor. 8992
 Et li anemis, sanz demeure,
 Li aporta plus noir que meure
 Un escu orible et rubeste ;
 D'un dragon i a une teste 8996
 Assise en l'escu par tel art
 Qu'il enflambe de fu et art
 Celui qui a lui se combat ;
 En trop vilaine mort s'embat 9000
 Cil qui encontre lui se prent,
 Car li dragons l'art et esprent
 Par le force de l'anemi.
 « Ochis a mon tres cher ami 9004
 Par l'escu qui art et esclaire.
 Devant le Pui de Mōntesclaire
 Est assiege piecha venus.
 Contre lui n'ose issir mais nus, 9008
 Si a barons trois cens et dis
 Ou chastel, mais n'est si hardis
 Nus d'aus qui a lui issir ost.
 Li maus tyrans od tot grant ost 9012
 A assise dedens la dame,
 Por che qu'avoir le velt a fame.
 Mais la pucele au Cercle d'Or,

- Qui fille fu roi Esclador, 9016
 Jure bien c'ainçois s'ocirra,
 Ja nuit avec lui ne jerra.
 Mes amis por la soie amour
 Ala combattre sanz demour 9020
 A lui, mais li tyrans l'a mort.
 Amours et pitiez me remort
 Por mon ami, si ai voé
 Que ja mais en tout mon aé 9024
 N'ierent vestu mi drap a droit,
 Autrement qu'il sont orendroit,
 Mais tout si con sui atornée
 Serai devers le char tornee 9028
 Et menrai as cors por mostrer
 Mon ami tant que rencontrer
 Porrai celui par cui vengiez
 Ert mes amis que l'enragiez 9032
 M'a ocis si orriblement.
 Mais j'ai grant assoagement
 De vous par l'escu que avez
 Au col pendu, si ne savez 9036
 Qui l'aporta ne dont il vint.
 — Orques, fait il, ne me sovint
 Du demander ne del enquerre,
 Mais certes ja l'alaisse querre, 9040
 Tout maintenant sans nule atente,
 Se je n'eüsse tele entente
 Qui forment me fait travaillier ;
 Et si me fait molt merveillier 9044
 Del chevalier dont me contez,
 Qui tant est plains de crualtez,
 Qui porte l'escu al dragon.
 Mais, par l'ame Uterpandragon 9048

Qui peres fu au roi Artu,
 G'irai ensaier ma vertu
 A lui, coment qu'il m'en aviegne.
 Dieus doinst qu'a joie m'en reviegne, 9052
 Que vostre ami puisse vengier
 Et le chevalier dessegier
 Qui la damoisele a assise !
 Home qui plains est de malisse 9056
 Que n'aime Dieu, ne lui ne croit,
 Ne de mal faire ne recroit,
 Ne doit nus qui Dieu croit douter,
 Ne je ne quier plus arester 9060
 Dusqu'a tant que l'avrai trové
 Et mon cors a lui esprové.
 — Sire, fait ele, et jou irai
 O vous tant que veü arai 9064
 Liquels en avra la victore,
 Et Dieus vous soit en adjutore !
 Alons, car je sai bien la voie,
 Si est drois que je vous convoie 9068
 Tot le plus droiturier chemin.
 A l'abeïe saint Domin
 Venrons anqui : la a nonains ;
 Mais je quit qu'il sera nonne ains 9072
 Que nous veignons a l'abeïe
 Ou la gens est molt esbahie,
 Si vous dirai por quel asfaire.
 Dedens le Pui de Montesclaire 9076
 Prenoient lor rente et lor vivre,
 Mais cil cui l'anemis enyvre,
 Qui nului ne velt deporter,
 Ne lor laisse riens aporter 9080
 Que l'abeesse puist mengier,

Si les fait de fain esragier :
 Ce est dolors et grans damages.
 Rachines et pomes salvages 9084
 Menjüent et de che ont poi. »
 Dist Perchevaus : « Piecha ne poi
 Venir en liu ou je trouvasse
 Liu ou a aise hebergasse. 9088
 Ore alons, que Dieus nous conseut.
 Mius sera que estre ne seut
 Avec les nonains, se je puis,
 Et si ert delivrés li Puis 9092
 De Montesclaire se Dié plaist. »
 A cest mot Perchevaus se taist,
 Qui n'estoit mie trop parliers ;
 Ausi ne doit nus chevaliers 9096
 Trop parler, n'estre plains d'eschar.
 La pucele torne son char,
 Qui Percheval maine et conduit ;
 Mainte fois a plus grand deduit 9100
 Avoit la dame chevalchié.
 Tant ont lor voiage avanchié
 Qu'il sont venu a l'abeïe.
 Quant l'abeese beneïe 9104
 Les vit venir, si se leva,
 Encontre aus tout belement va.
 Par la crois s'est rasseüree :
 Molt se tint a bone eüree 9108
 Quant la crois choisi en l'escu ;
 Le cuer qu'ele avoit irascu
 Li a empli de grant leece,
 La grant famine et la destrece 9112
 A oubliee c'ot eüe,
 Tantost qu'ele a la crois veüe.

Encontre als va isnelement
 Et les bienviagne douchement, 9116
 L'ostel belement lor présente.
 Perchevaus mie ne s'alente,
 L'abeesse rent son salu,
 Qui tout avoit le vis pelu 9120
 De fain et de grant povreté ;
 Et sachiez bien de verité,
 Se bien son estovoir eüst,
 Que molt bele et molt gente fust. 9124
 Perchevaus en a grant pitié ;
 N'a mie granment respitié,
 Quant il sont entré en la cort.
 Chascune des nonains acort, 9128
 Quant d'aus ont la novele oïe.
 Molt ont la dame conjoïe,
 Qu'ele espoirent sans atendance
 A avoir aucune pitance. 9132
 Molt ont honeré Percheval ;
 Establer li font son cheval,
 Puis l'ont maintenant desarmé
 Et le plus bel l'ont acesmé 9136
 Que eles porent et al mieus.
 Chascune larmoie des oeus
 De pitié que n'ont a doner
 A Percheval un bel souper 9140
 Et a la damoisele au char,
 Mais n'ont ne pain, ne vin, ne char,
 Car el ne l'avoient ou prendre.
 Perchevaus vait son escu pendre 9144
 A une colombe molt bele.
 Au mostier mena la pucele
 Son char et son ami dedens.

- Onques ne mengierent des dens 9148
 La nuit, n'ele ne Perchevaus ;
 De l'erbe ont avec les chevaus
 Que de l'avaine n'ont il point :
 Desi al jor sont en tel point, 9152
 Et les nonains toutes veillierent
 Et durement se traveillierent
 D'orer et de dire oroisons
 Qu'il desfende de mesproisons 9156
 Percheval et la dampisele.
 Au matinet a mis sa sele
 Perchevaus, et puis l'ont armé
 Les dames et bien acesmé 9160
 De ses armes tot en plorant ;
 Et la pucele vait corant
 A son char, si l'a atorné,
 Et puis vers la porte torné 9164
 Les timons ; ses chevaus atoile ;
 Son ami covri d'une toile
 Por che qu'il fu noirchis del fu ;
 El char l'a mis qui riches fu, 9168
 Puis monte sor l'un des chevaus.
 Lors prent congié, et Perchevaus,
 A l'abaesse et as nonains.
 Lors s'en vont, qu'il ne porent ains, 9172
 Droït vers le Pui de Montesclaire ;
 Mais il tone et pluet et esclaire
 Tout cel matin descî qu'a prime :
 Il samble que trusqu'en abisme 9176
 Doie toute la terre foudre
 De pluie, d'esclistre et de foldre.
 Mais li orages s'en depart
 Et Perchevaus sor destre part 9180

- Esgarde, quant vit le tans bel,
 En un val desoz un aubel
 Vit quatre somiers toz chargiez
 De viande que achaciez 9184
 Avoit la tormente et l'orés.
 « Et Dieus, vous soiez aorez,
 Dient chil qui chacent les somes,
 Quant del peril eschapé somes 9188
 Qui si a fors et grans esté.
 Dieus, otroiez qu'a cest esté
 Soions vengié du mal tirant
 Qui si nous va mal atyrant 9192
 Qu'il nous fait a force servir ;
 Si ne savons tant deservir
 Que il nous doinst chape ne roube,
 Ainz nous talt tout et tot nous roube, 9196
 Blez, avaines, viandes, vins.
 Et Dieus, qui est li vrais devins,
 Nous em puist vengier temprement,
 Qu'en lui n'a point d'atemprement, 9200
 De pitié ne d'umelité,
 Ainz est si plains de cruauté
 Que chiaus ocist qui Dieu reclaiment.
 Toutes les gens de lui se claiment 9204
 A Dieu, que il son cors destruisse
 Et que son mestre encore truisse
 Qui le siecle en face delyvre,
 C'on ne porroit escrivre en livre 9208
 Les maus visces qui sont en lui.
 Dieus, otroiez lui tel anui
 Qu'il se chastoit de faire honte. »
 Mais, ainçois que nus de ciaus monte, 9212
 Se sont assis por desjuner,

Car bien sevent que a disner
 N'aront pas, s'il vient a l'ost.
 N'est pas drois c'on celui alost 9216
 Cui on ses viandes presente,
 S'ele n'est a celui presente
 Qui a son coust le sert et maine.
 Perchevaus, qui cele semaine 9220
 Avoit erré a grant meschief,
 A cele part torné son chief,
 Tout erranment cele part va.
 Chascuns contre lui se leva 9224
 Por che que chevalier le voient.
 Perchevaus lor dist s'il avoient
 Riens a mengier qu'il weillent vendre.
 « Sire, font cil, or venez prendre 9228
 Le digner od nous lieement
 Et vous l'arez molt bonement
 Par teus covens qu'arriere irez.
 Biaus dols sire, ne vous irez 9232
 Se le bien vous loons a faire,
 Car chil qu'anemis puist deffaire
 Vous ocirra s'avant alez,
 Se dela cel mont avalez ; 9236
 Car li anemis, li tyrans,
 Qui est a mal faire tirans
 N'ataint nul chevalier qu'il n'arde
 Par un escu qu'il a en garde 9240
 Que li aporta l'anemis.
 La teste del dragon a mis
 L'anemis ens, qui gete flambe
 Que trestoz ciaux art et enflambe 9244
 Qui contre lui tiennent mellee.
 La flambe du fu emmellee

Les a lués toz ars et bruïs ;
 Bien doit estre teus hom haïs. » 9248
 Dist Perchevaus : « Vous dites voir,
 Mais ne lairai por nul avoir
 Qu'a lui ne me voise essaier,
 Mais ne mengai ne hui ne hier 9252
 Ne en la nuit qui passee est. »
 Cil li diënt : « Veschi tot prest
 Le digner a vostre comant,
 Coment que cil la nous demant 9256
 A cui nous mener le devons :
 A tort tel rente li paions,
 Mais paier le nous font a force. »
 La damoisele au char s'esforce 9260
 Tant que ele venue est la :
 Et Perchevaus encontre ala,
 Qui du cheval est descendus,
 Si l'acole a bras estendus, 9264
 Puis l'a mise jus de son char.
 Pain et vin et poisson et char
 Lor donent cil a grant plenté :
 Tres par desoz l'aubel planté 9268
 Se sont assis, si ont mengié,
 La ont lor fain afebloié.
 La dame, c'est chose certaine,
 Ne menga fors pain et fontaine, 9272
 Neporquant assez ont eü.
 Petit a mengié et beü
 Perchevaus, car de trop mengier
 Ne se doit nus preudom cargier 9276
 Por tant que se doie combatre,
 Car trop en puet son pris abatre.
 Por che me sire Perchevaus

- Menja petit, mais ses chevaus 9280
 Ot de l'avaine par raison,
 Et cil del char a grant fuison.
 Quant ont mengié si se ratornent,
 Le droiturier chemin s'en tornent 9284
 Droit vers le Pui de Montesclaire.
 La pucele qui ot non Claire,
 Qui el char maine son ami,
 Pença et douta et gemi 9288
 Por Percheval ; si li ensaigne
 Que de la crois face s'ensaigne,
 Quant celui au Dragon verra,
 Que, tantost que vers lui venra, 9292
 Verra saillir et flambe et fu,
 Onques nus plus ardans ne fu :
 « Mais la crois vous sera aidans
 Envers le fu qui est ardans, 9296
 Car vostre escus bien le tesmoigne. »
 Dist Perchevaus : « Je ne sai moigne
 Qui j'en creïsse mius de vous.
 Il n'i a plus, mais hastons nous, 9300
 Que molt m'est tart que celui voie. »
 Lors se hastent et vont lor voie
 Tant qu'il vinrent desor un mont,
 Molt en ot de plus lais el mont, 9304
 En Esture et en Ricordane,
 Une iaue qui ot non Gordane,
 Qui molt estoit et grans et lee,
 Coroit desoz en la valee, 9308
 Et d'autre part cele riviere
 Fu li chastiaus, ce m'est aviere,
 Du Pui de Montesclair laiens,
 Dont il parloient tantes gens : 9312

Drois est, car molt est biaux et riches.
 Il ne fu pas avers ne çiches
 Qui la fist faire et deviser.
 Qui Couchi porroit aviser 9316
 Il porroit bien dire de lui
 Qu'il fu compassés a celui
 De murs, de tors riches et fors.
 Cil au Dragon fu par defors 9320
 Logiez devant la mestre porte,
 Si que riens nus laiens ne porte
 Qu'il puissent avoir a mengier.
 Ensi les a fait assegier 9324
 Cil au Dragon et si destraindre
 Que de famine les fait taindre
 Et palir et color müer ;
 Si ne l'en puet nus remüer ; 9328
 S'a laiens teus trois cens vassaus
 Qui ont endure ses assaus
 Molt longuement a grant meschief,
 Et nus n'en ose armer son chief 9332
 Qui combatre se weille a lui,
 Qu'il ne crient ne doute nului,
 Qu'en l'anemi a tel fiance
 Que juré a et s'afiance 9336
 Que par le dragon les ardra,
 Ou la pucele li rendra
 Son cors et sa terre et sa gent ;
 Ne por grant or ne por argent 9340
 N'en partira, ses avra pris
 Et par le fu ars et espris
 Qui par la goule au dragon saut.
 Tant ont endure son assaut 9344
 Cil dedens qui de fain moroient

Et dient, se plus demoroient
 Laiens, qu'il seront mort de fain.
 Rendre lor covient al demain 9348
 Le chastel, se il n'ont secors.
 Cis termes par samble trop cors
 A la pucele qui cuidoit
 Avoir secors, qu'ele atendoit 9352
 Gavain et pense adés qu'il viegne
 Et que de son veu li soviegne
 Qu'il avoit grand piecha voé.
 « J'eüsse en lui bon avoé, 9356
 Fait ele, se il cha venist,
 Et se aventure avenist,
 Se cil c'on nome Percheval,
 Qui tant par a quis le Graal 9360
 Et la Lance dont li fers saine,
 Venist par chi por nule paine,
 Je seroie espoir secorue. »
 Lors est la pucele corue 9364
 Vers les fenestres de la sale,
 Que pensee a que jus avale
 Por morir, que plus ne quiert vivre,
 Si ert de la paine delivre 9368
 Et du torment que ele endure.
 Ja fust saillie a terre dure,
 Quant si home qui molt l'ont chiere,
 L'ostent. El retourne sa chiere 9372
 S'a veü Percheval descendre
 Jus del mont et vit l'escu pendre
 A son col, molt s'en esmerveille,
 Qui blans fu a la crois vermeille, 9376
 Si dist : « Dius, biaus pere celestre,
 Qui puet or cis chevaliers estre,

Que je voi cel mont avaler ?
 Un char voi devant lui aler 9380
 Qui molt est richement covers.
 C'est la pucele as Dras Envers
 Qui le char amaine et charrie.
 Ha ! fait ele, sainte Marie, 9384
 Car m'envoiez prochain secors !
 Bien voi faillie m'est la cors
 Au bon roi Artu de Bretaigne.
 N'i a chevalier tant chastaigne, 9388
 Ne un, ne deus, ne trois, ne quatre,
 Qui osent venir por combatre
 Contre celui qui m'a assise,
 Mais voir mius volroie estre ocise 9392
 Qu'il m'eüst ja n'a tort n'a droit ;
 Mais ce me conforte orendroit
 Que voi descendre de cel mont
 Le plus bel chevalier del mont 9396
 As armes, si come il me samble. »
 Perchevaus et la dame ensamble
 Se sont un petit aresté :
 N'i ont mie granment esté 9400
 Quant Perchevaus devant lui garde.
 En un plain, au pié de l'angarde,
 Vit l'ost aval le pré logie
 Dont la vile estoit assegie, 9404
 Et li chastiaus et la grans tors ;
 Mains durs assaus et mains estors
 Avoient a chiaus dedens fait,
 Mais poi lor avoient mesfait 9408
 As murs, as tors ni as fossez :
 Mais dedens n'est nus si hosez
 Qui ost issir fors de la porte

- Por celui qui la teste porte 9412
 Du dragon dedens son escu,
 Car tantost sont ars et vencu.
 Perchevaus choisi l'ost au plain
 Que de tentes le vit-tot plain 9416
 Et de loges et de foillies
 Qu'il ont par la forest coillies.
 Par defors l'ost choisi un arbre,
 N'avoit si bel dusqu'a Calabrè, 9420
 En mi un pré estoit plantez :
 De branches i ot grans plentez.
 A l'arbre pent une grant cloche ;
 Il n'a quatre homes en Escöche 9424
 Si fors, sel volsissent soner,
 Qui feissent mie assener
 Le batel fors d'une partie.
 Tantost con la cloche est bondie, 9428
 Sevent bien el chastel sanz faille
 Que par defors aront bataille.
 La pucele, qui molt fut bele,
 Qui le char maine, a soi apele 9432
 Percheval et si li ensaigne
 Qu'a l'arbre voist, que ne se faigne
 De la cloche soner tantost :
 « Adont verrez estormir l'ost 9436
 Et celui au Dragon venir ;
 Anzdeus vous lairont covenir
 Cil de l'ost, je le vous di bien,
 Il ne vous greveront de rien, 9440
 Qu'il lor a fait toz creanter
 Que cil qui le porra mater
 N'avra ja de nul d'aus regart. »
 Dist Perchevaus : « Se Deus me gart, 9444

En tant n'est il mie révois.
 A Dieu vous comant, je m'en vois. »
 A tant s'en torne, si le laisse,
 Tot droit envers l'arbre s'eslisse ; 9448
 Et cele lieve sa main destre,
 Si le saigne del roi celestre,
 Et demeure molt exploree.
 Et Perchevaus sanz demoree 9452
 Vint a l'arbre ou le cloche pent
 Et jure quanques Dieu apent
 Que, s'il puet, il le sonera,
 Son pooir l'assalera. 9456
 De le cloche soner s'atyre ;
 Lors prent la cloque, si le tyre :
 Tant durement le cloque sone
 Que toz li chastiâus en resone 9460
 Et toute l'ost est estormie ;
 Tant par l'a durement bondie
 Que n'i a plain, mont ne valee,
 La ou la vois ne soit alee 9464
 Plus de trois liues environ.
 Les puceles et li baron
 De la vile le son entendent,
 As murs montent, que plus n'atendent, 9468
 Tantost con ont oï la cloche ;
 Il n'i a boïsteuse ne cloche
 Qui ne soit as murs apoïe,
 Chascune i a fait sa puïe ; 9472
 Et la dame monte en la tour
 Et ses puceles tout entour ;
 Et cil au Dragon s'apareille,
 Qui molt durement se merveille 9476
 Qui cil est qui tant a hardie

La char que la cloche a bondie
 Si fort et de si grant vertu :
 « C'est des barons le roi Artu 9480
 Qui chi vient montrer son esfort,
 Mais ja morra de laide mort. »
 En son tref fait un drap estendre,
 Armer se fait sanz plus atendre. 9484
 Ses cauces li corent lacier
 Dont li anel sont bon et chier,
 Et ses chauces fors et treslites
 A coroies de fer eslites ; 9488
 Uns esperons a or li chauce
 Uns damoisiaus desor sa chauce ;
 Sor l'auqueton vest un hauberc :
 D'or et de saffre sont li merc, 9492
 Legiers fu et fors et serrez ;
 Plus de cinc fois fu esmerez
 Li fers de coi il fu forgiez.
 Et quant il se fu haubergieez, 9496
 Tout maintenant a chaint s'espee
 Dont mainte teste avoit colpee ;
 Plus fu trenchans que nule faus.
 Sovent jure que cil est faus 9500
 Qui vers lui velt bataille prendre,
 Que par tans li volra aprendre
 Quel force il a en son escu.
 D'ire enflambez, cuer irascu, 9504
 Est montez desor son cheval ;
 Sovent manace Percheval.
 Un helme fort et dur et chier
 Se fait errant el chief lachier ; 9508
 Sor la coisfe et sor le bachin
 Li ont lachié quatre meschin

Qui plus le doutent qu'il ne l'aiment ;
 Coiement Damedeu reclaiment 9512
 Que il puist estre recreans
 Li desloiaus, li mals tirans
 Qui Damedieu ot renoié.
 Durement li a anoié 9516
 De ce que fait si grant demeure ;
 Son escu qui noirs est que meure
 A mis maintenant a son col ;
 Ne doute une foille de col 9520
 Nul home puis que al col l'ait mis,
 Tel fiance a que l'anemis
 Nes doie toz de fu ardoir.
 N'a cure de feme ne d'oir 9524
 Qui remese est par lui deserte ;
 Mais par tans avra sa deserte
 S'il ne s'amende tot a comble,
 Que de torment avra grant comble 9528
 C'on ne porroit dire et retraire.
 Bien doit avoir doel et contraire
 Li hom qui au deable sert ;
 En la fin a che qu'il desert : 9532
 C'est permanablement infer.
 Sa lance prent au trenchant fer
 Qui grosse estoit et roide et fors,
 Puis est des tentes issus fors ; 9536
 Et cil de l'ost s'en vont après,
 Mais ne le sivent pas de pres,
 Ains s'arestent entor le plain.
 Cil qui le cuer ot d'ire plain 9540
 Point des esperons le cheval,
 Forment manace Percheval.
 Tant est fel et de males ars

Que molt tost le quide avoir ars : 9544
 Molt a entre fait et penser,
 Car par tans li porra peser.
 Quant onques ot son conpaignon,
 Les galos s'en vait a bandon. 9548
 Quant Perchevaus venir le voit,
 Et voit l'escu que il avoit
 Plus noir qu'arrement destempré,
 Et vit le fu qui art le pré, 9552
 Ki saut par la guele al dragon,
 Il sist el destrier arragon,
 Son escu a devant lui mis.
 Quant la crois voit li anemis 9556
 Qui en la teste au dragon fu,
 Qui giete le flamble et le fu,
 Tant doute l'anemis la crois
 Por che que Jesus Cris li rois 9560
 Venqui en la crois le bataille,
 Par coi brisa infer sanz faille
 Et en geta ses amis fors
 Qui sosfroient les tormens fors, 9564
 Et por che l'anemis doutoit
 La crois que Dieus mis i estoit,
 Si brait et crie come uns tors.
 Cil del chastel ont lor poins tors 9568
 Et lor chaveus rous et detrais
 Et sovent jectez cris et brais
 Por le doute de Percheval.
 Et Perchevaus point le cheval ; 9572
 Contre celui au Dragon muet
 Quanques li chevaus rendre puet,
 Qui cort si tost con dains et cers.
 Chascuns d'aus deus puet estre cers 9576

Qu'il i avra bataille dure.
 Cil au Dragon fu plains d'ardure,
 Quant voit abandoneement
 Percheval et si durement 9580
 Venir, qui petit le resoigne.
 Chascuns d'aus deus sa lance aloigne
 Et les baissent al aprochier ;
 Des fers qui sont trenchant d'achier 9584
 Se quident ferir a eslais ;
 Ne mais li fus hideus et lais
 Qui par la goule au dragon ist
 Arst toute la lance et bruist 9588
 De Percheval neïs le fer,
 Car ce estoit li fus d'infer
 Qui tout art quanques il ataint.
 Cil au Dragon sor l'escu taint 9592
 Fiert Percheval par tel angoisse
 Qu'en dis pieches sa lance froisse ;
 L'escu n'empire une chartaine ;
 Et ce fu veritez certaine 9596
 Que li cheval si droit corurent
 Et par si grant ravine murent
 Que des chiés se sont si hurté.
 Ore oiez con grant eürté 9600
 A Dieus doné a Percheval.
 Andoi s'afrontent li cheval
 Et, si con li livres m'aprent,
 Li fus arst trestot et esprent 9604
 As chevaus les cols et les testes,
 Qui trop estoient beles bestes ;
 Et li vassal si fort s'encontrent
 Qu'a poi que il ne s'entrafrontent, 9608
 Et li escu ensamble froient.

Cil de l'ost durement s'esfroient
 Et cil del chastel d'ambes pars.
 Quant il voient le fu espars, 9612
 Si quident bien que Perchevaus
 Soit ars, et il et ses chevaus.
 Non fu ; mais ore oiez merveille :
 Le fust qui en la crois vermeille 9616
 Ou Dius fu mis li fu aidans
 Contre le fu qui fu ardans,
 Rien nule sor lui ne blesmi ;
 Quant la crois hurte a l'anemi, 9620
 Si demaine un si grant escrois
 Que par la vertu de la crois
 Saut l'anemis du dragon fors,
 Qui vers la crois n'a point d'effors, 9624
 Se n'i osa plus remanoir ;
 En guise d'un corbel tout noir
 S'en va volant, si bruit et tone
 Si que Percheval tout estone 9628
 Et cil au Dragon ensement
 Et jurent ensi longuement.
 A chiaus del chastel fut molt bel
 Quant il, en guise de corbel, 9632
 En virent l'anemi aler.
 Cil de l'ost prenent a parler
 Et dient : « Tout ce n'est pas fable
 Que li hom qui sert au deable 9636
 En est en la parfin dampnez.
 Las ! con de male eure fu nez
 Qui por le delit terrien
 Ne porchache a l'ame nul bien ; 9640
 Qui covoite le pris del monde
 Et par confesse ne s'esmonde,

Ne ne velt faire penitance,
 Ne ne a a Dieu repentanche, 9644
 A bien perdu l'ame et le cors.
 Mais Dieus qui est misericors,
 Quant voit le pecheor laissier
 Le mal et au bien eslaissier 9648
 Le voit et acorre et aerdre,
 Por che que crient l'onor Dieu perdre,
 Va a confesse et ses mains joint
 Et, s'il fait che c'on li enjoint 9652
 En penitance, il est refais,
 Qu'il n'a el mont si pesant fais
 Con li pechiés est a porter.
 Teus se quide nes deporter 9656
 Qui en la fin en ert peris ;
 Se n'en pense Sains Esperis
 Tout adez perent li mefait.
 Me sire qui tans mals a fait, 9660
 S'est or, s'il velt, bien aperchus
 Qu'il est par l'anemi dechus ;
 Or pert coment il a ovré. »
 A tant a pooir recovré 9664
 Cil au Dragon ; mais Perchevaus
 Sailli ains sus ; mais lor chevaus
 Virent ansdeus ars et brullez,
 Mais l'anemis s'en fu alés 9668
 Qui par mi la goule au dragon
 Jectoit le fu par tel randon ;
 Or n'i a ne flambe ne fu.
 Perchevaus molt joians en fu 9672
 Et cil au Dragon molt dolens ;
 Chascuns d'aus deus n'est mie lens
 De son adversaire malmetre.

Qui lors lor veïst lor mains metre 9676
 As brans d'acier et traire fors !
 Si se fierent par tels esfors
 Que, quant a descovert s'ataignent,
 Le sanc en traient, dont il taignent 9680
 L'erbe qui en devient vermeille.
 Cil au Dragon toz s'esmerveille
 Quant il n'a Percheval venchu,
 Mais ne set tant sor son escu 9684
 Ferir qu'il le puist entamer ;
 D'aïr comence a escumer
 Cil au Dragon et hardement
 A en lui tant que durement 9688
 Cort Percheval as poins saisir.
 Perchevaus le sot bien choisir,
 Qui durs os avoit et fors ners,
 Si l'a si durement aers, 9692
 Si tire l'uns et l'autre et sache
 Ne il n'i a celui qui sache
 Liquels d'als deus le mains se doeille ;
 N'i a cel qui reposer weille 9696
 Ne tant ne quant ne traire arriere,
 Ains combatent en tel maniere
 Li uns vers l'autre, per a per,
 Que l'uns ne puet l'autre eschaper : 9700
 Tant doute li uns l'autre et crient
 Qu'ichi qui son conpaignon tient
 Nel laist aler qu'il ne le fuie ;
 Chascuns se raferme et s'apuie 9704
 Sor ses piez et puis s'entredonent
 Si grans cops que trestot s'estonent.
 Cil del chastel les esgardoient ;
 Li alquant la terre mordoient 9708

Et prient tant au roi de gloire
 Que il otroit force et victore
 Celui qui por als se combat.
 La pucele au Cercle d'Or bat 9712
 Ses palmes, molt est esmarie,
 Et reclaime sainte Marie
 Qu'ele deprit a son chier fil
 Qu'il salve celui de peril 9716
 Qui por li a bataille prise,
 « Car certes en tele l'ai prise
 Que, s'il est ochis en l'estour,
 Chaoir me lairai de ma tour. » 9720
 Einsi la dame se debat.
 Et Perchevaus qui se combat
 Et cil au Dragon tant se painent
 Et tant se grievent et sormainent 9724
 Et fierent des poins et d'espees
 Qu'il ont lor corioies colpees
 Des colers et trenchiés les las
 De lor helmes et tant sont las 9728
 Qu'il sont a la terre cheü.
 Mais Percheval est mescheü,
 Car au cheoir ses brans eschape
 Fors de son poing, et cil le hape 9732
 Qui de mal faire est apensez,
 Et sovent en ot fait assez.
 Em piez resaut, les brans tint nus,
 Envers Percheval est venus 9736
 Qui molt se fu tost relevez,
 Mais a poi n'est de doel crevez
 Quant voit s'espee que cil tient ;
 Contre lui hardiement vient, 9740
 L'escu lieve por lui covrir,

Mais trop se comenche a ovrir
 Con cil qui nel redoute mie ;
 Et cil qui sot de l'escremie 9744
 L'a si feru sor le costé
 K'il li a de la char osté
 Grant pieche, que li sanz en raie ;
 Mais ançois qu'arriere se traie 9748
 Le saisist Perchevaus al poing ;
 On n'alast mie molt tres loing
 Quant Perchevaus par poesté
 Li a son brant d'acier osté, 9752
 Puis dist : « Vassal, or sachiez bien,
 Gardez le vostre, j'ai le mien. »
 Cil au Dragon li respondi,
 Qui le cuer ot fier et hardi : 9756
 « Voire, mais il vous a costé ;
 Prenez garde a vostre costé,
 Car je en voi issir le sanc ;
 Sachiez ja par vostre escu blanc 9760
 Ne par la crois garant n'arez. »
 Dist Perchevaus : « Anqui sarez
 Liquels en venra au desus. »
 A tant Perchevaus li cort sus : 9764
 Cil au Dragon ne l'en faint mie,
 Ains le requiert a l'escremie ;
 Grans cops et cruels s'entredonent,
 Hardiement s'entrabandonent. 9768
 Hiaumes trenchent, haubers desmaillent,
 Hurtent, boutent, fierent et maillent.
 Cil au Dragon molt se merveille
 Qu'a l'escu a la crois vermeille 9772
 Ne puet de riens adamachier ;
 Percheval sent fort et legier

Assez plus qu'au comencement.
 Lors a parlé molt fierement : 9776
 « Vassal, fait il, se vostre escûs
 Ne fust, piecha fuissiez vencus ;
 N'ovrez pas par chevalerie,
 Ainçois ovrez par faerie, 9780
 Quant vous avez celui vencu
 Qui fu jectoit de mon escu,
 Et se vous faez ne fuissiez
 Ja contre moi ne durissiez. 9784
 Mais ne lairai que ne vous die,
 Se tant avez la char hardie
 Que vostre escu osez jus metre,
 Je vous weil bien por voir prometre 9788
 Que tantost osterai le mien ;
 Et une chose sachiez bien
 Que, se ensi faire l'osez,
 Vous en serez plus alosez 9792
 Cent tans se vous m'avez conquis ;
 Et, se je le vous ai requis,
 Le mien osterai premerains. »
 Et dist Perchevaus : « Tres orains 9796
 Volsisse je qu'il fust ensi. »
 Chascuns a son escu saisi,
 Si l'a couchié en mi le pré ;
 Chascuns le brant d'acier tempré 9800
 Tint en sa main, cler et trenchant ;
 Li uns va vers l'autre adrechant
 Et se fierent la ou s'asent.
 Je ne croi qu'a piece lor sanent 9804
 Lor plaies que il s'entrefont ;
 A bien poi que chascuns ne font,
 Quant son compaignon n'a outré :

Bien a li uns l'autre mostré 9808
 Que il ne s'entramoient mie.
 Tant a duré lor escremie
 Que toz li plus fors asfebloie,
 Chascuns ot la char tainte et bloie 9812
 Des cops que li uns l'autre done.
 Perchevaus vers lui s'abandone,
 Qui tint l'espee nue traite ;
 Sor le costé a le retraite 9816
 Le fiert si que trenche la maille
 Du hauberc que une maaille
 Ne li valut contre l'espee ;
 Si parfont a la char colpee 9820
 Que la boële li saut fors.
 Cil au Dragon fu durs et fors ;
 Quant sent le cop si s'esvertue :
 Ainsçois que Perchevaus le tue 9824
 Se vendera, s'il puet, molt chier ;
 Il jecte jus le brant d'achier,
 Tot velt gaaignier ou tout perdre,
 As bras cort Percheval aerdre 9828
 Par les flans angoisseusement.
 Et Perchevaus lui ensement
 L'aert qui envers soi l'estraint ;
 Et cil mie ne se refaint 9832
 Qui molt estoit plains de grant force.
 Chascuns de bien faire s'esforce
 Por che que queillir velt son los.
 A tant estes vous les galos 9836
 Une pucele chevalchant
 Desor un parlefroï bauchant ;
 Molt se paine de tost aler,
 Mais onques ne volt aparler 9840

Les deux vassaus qui se combatent
 Qui des pòins sovent s'entrebantent ;
 Cele descent de son cheval,
 Si a pris l'escu Percheval, 9844
 Puis monte que plus n'atendi.
 Et Perchevaus ki entendi
 A sa bataille bien le voit
 Que cele son escu avoit 9848
 Mis a son col et si l'emporte ;
 Perchevaus point ne s'en conforte,
 Mais al cuer forment li anoie.
 Celui al Dragon si manioie 9852
 Que l'eschine li fait ploier ;
 Celui covint a sozploier
 Que sa plaie forment li grieve,
 Qui tot adez saine et escrieve. 9856
 Et Perchevaus tant le debat
 Des pòins que a force l'abat
 A la terre tout estendu.
 Perchevaus a son braç tendu, 9860
 Si a son brant d'achier repris ;
 D'ire et de courrous fu espris
 De son escu c'on emportoit,
 Si ne savoit qui cele estoit 9864
 Qui l'emporte, s'est esmaris,
 Correciez et d'ire maris.
 Dist a celui : « Merchi requier. »
 Et cil respont : « Point ne t'en quier : 9868
 Bien sai tu m'as a mort navré.
 Se tu m'avoies delivré,
 Si morrai je ; mar fis homage
 Au deable qui cest damage 9872
 M'a porchaschié que j'ai rechut ;

- Bien voi qu'anemis m'a dechut :
 La mort me covient trespasser.
 — Et qui te porroit respasser, 9876
 Dist Perchevaus, querroies tu
 En Dieu et en sa grant vertu ?
 — Oil, fait il, mais ne puet estre,
 Qu'il n'a el monde si bon mestre 9880
 Ki ma plaie peüst garir.
 — Que li volroies tu merir,
 Dist Perchevaus, qui te garroit
 Et de ton mal sancté donroit ? » 9884
 Et cil respont : « Tot mon roialme. »
 Et Perchevaus li dist : « Par m'ame,
 Se tu vels croire mon conseil,
 Ains que colchié voies soleil, 9888
 Eres en joie et en sancté
 Et garis de toute enferté.
 — Or dites dont, fait il, biaux sire,
 Que nule rien tant ne desirre 9892
 Con je faz sancté a avoir. »
 Dist Perchevaus : « Tu l'aras voir,
 Se tu fais che que je dirai.
 — Oie, ja ne l'escondirai. » 9896
 Dist Perchevaus : « Amis, entent,
 Mande le prestre, plus n'atent.
 Si te confesse, si t'esmonde
 De che qu'as mesfait en cest monde, 9900
 Et si en soies repentans ;
 Car navree est cent mil tans
 T'ame que tes cors n'est assez.
 Se tes cors estoit trespassez 9904
 En icest point sanz repentance
 Por nient feroies penitance.

Mais croi sainte confession,
 Repentance et contrition 9908
 De cuer te covenra avoir,
 Et saches de fi et de voir
 Que dont sera t'ame garie,
 Qui sera dampnee et perie 9912
 Avec le cors al jugement
 Et ara l'angoisseus torment
 En infer, dont Dieus nous desfende.
 Biaus dols amis, mais or t'amende 9916
 Et prie merci et pardon
 A Dieu, et si fai veu et don
 Que ja mais pechié ne feras ;
 Et ses tu que tu en aras ? 9920
 Joie et sancté en paradis
 Et leece mais a toudis,
 N'aras ja chose qui te nuise.
 N'est si grans biens qui n'amenuise 9924
 En cest siecle et qui ne defaille.
 Cist siecles est une bataille,
 Nus n'i est a repos qui vive,
 Covoitise et angoisse avive 9928
 Et clers et chevaliers a prendre.
 Li clerc vont a Paris aprendre
 Livres de lois et de decrez
 Tant qu'il sont et sage et discrez ; 9932
 Adont devienent avocas,
 Par deniers sostienent les cas :
 Iluec lor ames vendent, voir,
 Qui lor fera infer avoir ; 9936
 Certes, mal est teus gens baillie.
 Et li baillu qui ont baillie
 Pinchent et poillent si la gent

Ne lor remaint or ne argent ; 9940
 Chevalier plaideor devienent,
 Toute jor vont as plais et vienent.
 Quant uns preudom est entrepris
 Ki a a prendre, il est si pris 9944
 A cort que chascuns l'embricone ;
 Cil est toz liez qui l'embricone ;
 Et s'il respont bien et a droit,
 Recorder li font lués en droit 9948
 Sa parole, tant qu'il mesprent ;
 Einsi apparole le prent
 Et le fait chaoir en amende.
 Chevaliers gaires ne s'amende 9952
 De plaidier por autrui tort faire.
 Or vous ai tant dit de l'afaire
 Coment li uns l'autre triboule :
 C'est perius que tels gens ne bole 9956
 En enfer en la grant caudiere,
 La ne sera nus hom plaidiere,
 Iluec aront de lor tort droit.
 Et tu pués avoir orendroit 9960
 Santé avec l'ame et le cors,
 Kar Dieus qui est misericors
 Te sanera de la grant plaie
 Dont t'ame durement s'esmaie 9964
 Qui tant est de pechié navree :
 Mais toute en sera delivree,
 Se repentans es vraiment
 Et te confesses loialment. 9968
 Confessions est droite et sainte
 Qui n'est ne coverte ne fainte.
 Por Dieu en tes pechiez te mire :
 Vraie confessions est mire 9972

Qui garist sans fu et sanz fer
 Des plaies c'ōn a en enfer
 Qui tot dis sont sans fin argans.
 Or soies au bien aergans 9976
 Et si done a t'ame sancté
 De la plaie de ton costé. »
 Cil au Dragon bien aperçoit
 Que Perchevaus pas nel dechoit, 9980
 Ainz li loe a faire le bien.
 A Percheval a dit : « Cha vien !
 Fai me tost le prestre venir,
 Car il me doit bien sovenir 9984
 De che que tu m'as aconté.
 De la plaie de mon costé
 Me morrai je, ne puet autre estre. »
 Perchevaus a mandé un prestre 9988
 Par un des chevaliers de l'ost
 Au chastel, et il vint tantost.
 Et cil au Dragon fu assis
 Qui de ses pechiez fu pensis, 9992
 Et li prestres s'asist lez lui.
 Et cil au Dragon sans delui
 Se confesse et pleure et gaismente :
 De s'ame forment s'espoente, 9996
 Si pleure ses pechiez molt fort :
 Du cuer sozpire, ses poins tort,
 Et regarde le ciel amont.
 Il n'a si dur cuer en cest mont, 10000
 Sel veïst, n'en eüst pitié.
 Li prestres n'a pas respitié ;
 Quant il se fu bien confessez
 De quanques puet estre apensez, 10004

Si l'assaust, le bien li ensaigne ;
 Et cil de Dieu sovent se saigne
 Et se couche vers orïant,
 En orant va a Dieu morant ; 10008
 L'ame s'en va, li cors s'estent.
 Et Perchevaus plus n'i atent,
 Ains a fait venir ciaus de l'ost,
 Et cil i vienent qui molt tost 10012
 L'ont desarmé et sepeli.
 Et ce forment lor abeli
 Qu'il est confés de ses mesfais.
 Cil del chastel tout a un fais 10016
 Vinrent encontre Percheval ;
 Amené li ont un cheval,
 Biaus fu et grans, fors et delivres :
 Costé avoit plus de cent livres ; 10020
 Frain ot molt riche et bone sele.
 Il n'ot dame ne damoisele
 El chastel contre lui ne viegne,
 Et hautement ne le bienviegne. 10024
 La damoisele au Cercle d'Or
 Fait tel joie, c'onques encor
 Ne fu mais si grande veüe.
 De son bliaut tert sa veüe 10028
 Que de joie et de pitié pleure ;
 Plus de cent fois beneïst l'eure
 Qu'il onques vint en la contree,
 Que par lui est en joie entree : 10032
 « Oste m'avez del peril,
 Que mise m'eüst a escil
 Cil au Dragon qui est ochis.
 Le guerredon ne les merchis 10036
 Ne vous porroie jamais rendre,

Que, s'il vous plaist, vous poez prendre
 Mon cors, ma terre et mon avoir ;
 Tout poez a vo bon avoir 10040
 Que vous l'avez bien deservi.
 Mais, por Dieu et po: saint Davi,
 Faites nous doner a meangier. »
 Perchevaus lot, sans atargier 10044
 Fait les barons de l'ost venir.
 Cil le laissent bien covenir
 De quanques velt faire ne dire ;
 Rien ne li welent escondire, 10048
 Que lor sire lor fist jurer
 Et leaument asseürer
 Que cil qui le porroit conquerre
 Porroit comander et requerie, 10052
 Et il le feroient tantost.
 Perchevaus fait crier par l'ost
 Que les viandes qu'il avoient
 Et que il a lor oes servoient 10056
 Soient portees el chastel ;
 Dont n'i remest pain ne gastel,
 Ne vins, ne bareus, ne bouchiaus,
 Vache, ne moutons, ne porciaus, 10060
 Qui ne soit el chastel menez,
 Si que li grans et li maisnez
 En ot assez a remanant ;
 Des or sont il riche et manant. 10064
 Cil de l'ost ont lor seignor pris
 Qui vers tantes gens ot mespris,
 Se li ont fait une litiere
 De detüs perches, forte et entiere, 10068
 Et l'ont dedens posé et mis,
 Enseveli d'un chier tapis ;

Et por ce que confessez fu
 L'ont honoré et d'un boffu 10072
 Qui molt fu riches et divers
 Fu li cors richement covers,
 Puis fu levez sor deus chevaus ;
 Si lor comande Perchevaus 10076
 Qu'il l'emportent en lor païs,
 Si soit a honor enfouis.
 Cil s'en vont qui lor seignor portent,
 Et cil del chastel se deportent 10080
 Et font joie de Percheval.
 Perchevaus desor le cheval
 Monta, c'on li ot presenté ;
 N'i a mie granment esté, 10084
 A la dame ala congié prendre,
 Qui bien quidoit de doel esprendre,
 Quant ele ot qu'il s'en velt aler ;
 Si comence a lui aparler, 10088
 Si dist : « Biaus sire, demorez,
 Car chaiens serez honerez
 Al mieus que je onques porrai.
 — Certes, pucele, non ferai, 10092
 Ja ne passerai vostre porte,
 Mais après celi qui emporte
 Mon escu irai sanz sejour ;
 Ja mais ne sejournerai jor 10096
 Deus pres a pres, ains le rarai
 Ou bones ensaignes sarai
 Por coi issi l'en a porté,
 Se Dieus de mal et d'enferté 10100
 Et d'estre en prison me destorne. »
 Dont prent congié, si s'en retourne ;
 Mais n'ala pas loins, ce m'est vis,

- Quant encontre devant son vis 10104
 Une pucele bele et gente
 A jenillons en mi la sente
 S'est mise devant Percheval,
 Et laisse tout coi son cheval, 10108
 Et dist : « Gentius hom, va a Dieu.
 Vengiee m'as du mal faidieu
 Qui mon ami m'avoit ochis,
 Qui gist el char de fu noirchis 10112
 Et qui du drap d'or est covers.
 Mes dras que j'avoie a envers
 Vestus, mais jés ai orendroit
 Vestus et par defors l'endroit ; 10116
 Mes veus est par vous acomplis.
 A l'abeïe saint Sozplis
 Qui est el chastel la pucele
 Au Cercle d'Or, qui tant est bele, 10120
 Ferai mon ami enfouir.
 Ou que soit m'en irai fuïr
 Ou en bos ou en liu sauvage ;
 Iluec ferai un hermitage, 10124
 Si priërai por mon ami,
 Et a la feïe por mi,
 Et por vous especiaument
 Que Dieus par son comandement 10128
 Honor et joie vous otroit
 Et il en tel liu vous avoit
 Ou vous truissiez vostre desir.
 — Dieus le m'otroit par son plaisir, 10132
 Dist Perchevaus : or vous levez,
 Pucele, foi que Dieu devez,
 Que n'afiert pas a chevalier
 Qu'il laist pucele ajenoillier 10136

Longuement en tele maniere.
 Dieus vous doinst faire tel proiere
 Qui soit al salu de vostre ame ;
 Mais or me dites, dolche dame, 10140
 Por Dieu, s'il ne vous doit peser,
 Se par chi veïstes passer
 Une dame a tout un escu,
 Dont j'ai molt le cuer irascu, 10144
 Que ne sai quel part ele ala.
 — Sire, fait ele, par dela
 S'en va vers cele grant forest. »
 A tant s'en part sanz nul arest 10148
 Perchevaus, a Dieu le comande.
 Rien nule plus ne li demande,
 Ainz chevalche sanz nule atente ;
 A celi sivre met s'entente 10152
 Qui son escu avec li porte.
 Et la pucele vers la porte
 De Montesclaire son char maine
 Qu'ele ot mené mainte semaine ; 10156
 Du mener n'est pas esmarie.
 En la porte entre et tant charie
 Son char qu'a l'abeïe vient ;
 Són ami issi qu'il covient 10160
 Fist a grant honor enterrer ;
 Ne volt plus gaires demorer,
 Ains s'en part et tot adez pleure.
 Tant va qu'al bos de Claradeure 10164
 Est venue en une montaigne
 Qui molt est horrible et estraigne ;
 La trove une gaste chapele
 Et dalez une fontenele, 10168
 Et si ot un viez habitacle.

- Uns hermites, c'ot non Heracle,
 I avoit mes plus de cent ans ;
 Mors fu n'avoit mie lonc tans. 10172
 Iluec est la bele arestee
 Qui assez tost ot degastee
 Sa colour qu'ot clere et vermeille ;
 Et ce ne fu mie merveille 10176
 Qu'el est al oré et au vent
 Et s'a poi a mengier sovent,
 Et ce doit bien color changier.
 N'a fors rachines a mengier, 10180
 Pomes salvages et faïne
 Et glant que quelt par le gaudine ;
 N'a de nule autre chose envie.
 Ensi usa toute sa vie, 10184
 Por son ami fist penitance.
 Jesus destort de mescheance
 Celes qui aiment loialment
 Et lor doinst bon definement, 10188
 Que ceste ama bien de cuer fin
 Et si servi Dieu en la fin.
 Mais de li lairai ore ester :
 De Percheval volrai conter. 10192
- L'estoire dist que Perchevaus,
 Qui tant ot paines et travaux,
 Erra une entiere semaine,
 Si come aventure le maine, 10196
 Puis qu'il parti de la pucele,
 Qui tant estoit et gente et bele,
 Qui s'en ala en l'ermitage.
 Perchevaus mie ne s'atarge 10200
 D'errer, ne onques n'encontra

Aventure, tant qu'il entra
 En une forest grant et lee,
 Ou la pucele en fu alee 10204
 Qui son escu od li portoit,
 Et Perchevaus qui se hastoit
 D'errer, mais il n'en trove point.
 A tant a oï en cel point 10208
 Perchevaus soner une cloche.
 Sor son cheval qui pas ne cloche
 S'en est droit vers le son alés.
 A tant est un val avalez 10212
 Par mi la grant forest ramee.
 Une abeïe bien fremee
 Trova el val, ce m'est aviere,
 Qui estoit sor une riviere. 10216
 Perchevaus a la porte va ;
 Un des rendus seant trova
 Les la porte sor son leson ;
 Perchevaus par bele raison 10220
 Le salua molt doucement ;
 Et li rendus molt belement
 Li rent son salu sanz attendre,
 Con cil qui molt ot le cuer tendre 10224
 Et molt veritable et piteus ;
 Si a dit : « Sire, vos hosteus
 Est çaiens pris, se vous volez ;
 Bonement serez hostelez. » 10228
 Dist Perchevaus : « Vostre merchi,
 Que se je partoie de chi,
 Je ne saroie ou hebreger. »
 A tant monte sanz atargier 10232
 En la porte trestoz armez ;
 Par un huis qui fu desfermez

Entra en une sale errant,
 Et rendu vient acorant, 10236
 Qui le saluent et descendent
 Et a lui desarmer entendent,
 Car bien voient qu'il est errans.
 Chascuns estoit molt desirrans 10240
 De lui servir et honerer.
 En l'estable sans demorer
 Li font establer son cheval ;
 Molt ont honoré Percheval ; 10244
 En une chambre l'ont mené,
 Et molt l'ont la nuit honoré
 De quanques lui vint a plaisir.
 Après mengier se vait gesir 10248
 Perchevaus en un lit bien fait :
 De dormir molt bien se refait,
 Dusque al demain la matinee
 Dormi que prime fu sonee, 10252
 Dont se lieve et va al mostier
 Por escouter le Dieu mestier ;
 Mais onques ne s'en dona garde
 Perchevaus, quant il se regarde 10256
 Dalez lui et voit une treille
 De fer bien faite a grant merveille ;
 Un brone molt bien fait avoit
 Devant tendu, mais par mi voit 10260
 Perchevaus un molt riche autel
 Onques nus hom ne vit autel :
 Molt par estoit bien atornez
 Et de riches dras aornez, 10264
 Molt i faisoit glorïeus estre.
 Devant l'autel avoit un prestre
 Revestu d'aube et de casure,

- Bele et bien faite a sa mesure, 10268
 Sor son chief avoit une mitre ;
 Et uns angles li amenistre
 Qui a son mestier le servoit.
 Perchevaus esgarde, si voit 10272
 En mi la chapele un bel lit.
 Molt par le tint a grant delit
 Qu'il quide bien entrer laiens,
 Mais de l'entrer est il noiens, 10276
 Car il n'i vit nul huis overt.
 Perchevaus vit le lit covert
 De dras de soie trestoz blans ;
 Si li fu avis par samblans 10280
 Que dedens gist ou feme ou home,
 Mais il ne trove qui li nome
 Liquels que soit, si se merveille.
 A genillons devant la treille 10284
 S'est mis et le provoire avise
 Qui estoit entrez el servise
 Et le faisoit molt saintement.
 Et quant ce vint au sacrement 10288
 Qu'il leva le cors Dié en haut
 Cil qui el lit se jut tressalt,
 En son seant el lit s'asiet.
 Ce plaist a Percheval et siet 10292
 Qu'en son seant drechié le voit ;
 Et le chief descovert avoit
 Et tot le cors dusque al nombril ;
 Une corone d'or sutil 10296
 Ot en son chief, riche a merveille.
 Perchevaus toz s'en esmerveille
 Qui a l'esgarder entendi.
 Et cil ansdeus ses mains tendi 10300

Envers le cors Dieu contremont
 Et crie : « Vrais peres del mont,
 Ne m'obliez pas de m'atente,
 Vrais Deus, car a vous est m'atente. » 10304
 Il ne parla ne plus ne mains,
 Mais adez tint et bras et mains
 Amont vers le ciel estendus.
 Perchevaus, qui ot entendus 10308
 Les mos que cil avoit retrais,
 Plus pres de la brone s'est trais
 Et volentiers celui regarde,
 Et en esgardant se prent garde 10312
 Que cil ot tot plaié le cors,
 Et bras et chief, c'est mes recors,
 Et tot le visage ensement,
 Ausi que tot novelement 10316
 Estoient ses plaies vermeilles ;
 Perchevaus le tint a merveilles.
 Et quant li prestres ot chanté,
 Si a le cors Dieu aporté 10320
 A celui qui el lit se jut,
 Si l'a molt dignement rechut.
 Et li prestres tot de rechief
 Prist le corone de son chief 10324
 Et par desus l'autel le met ;
 Et cil du couchier s'entremet
 Qui des dras blans s'a bien covert
 Que rien n'i pert de descover. 10328
 Perchevaus qui ot mis s'entente
 En l'esgarder, tot sanz atente
 S'est devers l'autel retournez ;
 Mais li prestres s'en fu tornés 10332
 Ne set quel part, qu'il n'en voit point.

Esmerveilliez s'est en tel point,
 Car il set bien tout affiance
 Que tout est par seneriance. 10336
 A tant issi de la chapele,
 Vint en la sale, si apele
 Le rendu qui ostelé l'ot.
 Cil vint a lui tantost qu'il pot, 10340
 Et Perchevaus li dist et conte,
 Si come oï avez el conte,
 Tot ce qu'en la chapele vit :
 « Del savoir ai je grant covit, 10344
 Que la seneriance est grande,
 Por che sui de l'oïr en grande,
 Et molt le desir a savoir ;
 Sire, por Dieu, dites m'ent voir. » 10348
 Dist li rendus : « Or m'escoutez,
 Et dalez moi vous acoutez,
 Et je vous conterai le conte
 Que roi et duc et prince et conte 10352
 Doivent volentiers escouter.
 Tel conte doit on bien conter,
 Car cil i aprent Dieu a croire
 Qui de mal faire velt recroire. 10356
 Or entendez tot a droiture
 La verité : de l'aventure
 Vous faz le certifiement.
 Après le crucefiement 10360
 Jesu Crist plus de quarante ans,
 Avoit un roi de mescreans
 Es parties dela la mer
 De Jursalem ; bien sai nomer 10364
 La cité, le roi et son non.
 Evalac ot li rois a non

- Et sa cité ot non Sarras,
 Qui adont valoit mius d'Arras 10368
 De cité et de noble vile ;
 Molt par i ot riche navile.
 Por la chité et por son non
 Orent la gent Sarrazin non ; 10372
 Evalac en fu rois et sire.
 Mais Tholomez, uns rois de Sire,
 Li destruisoit tote sa terre
 Par force et par estrif de guerre. 10376
 Mais Joseph de Barismachie,
 Qui molt fu plains de cortoisie,
 Qui soldoiers avoit esté
 Cinc ans, et yver et esté, 10380
 Pylate, à cui Judas rendi
 Jesu Crist qui en crois pendi,
 Cil Joseph a Evalac vint,
 Et chevaliers odvec lui vint, 10384
 Et ses serorges Seraphé.
 Evalac trova eschaufé
 De mautalent et de grant ire,
 Et Joseph si li prist a dire, 10388
 S'il faisoit che qu'il li diroit,
 Que sa terre li renderoit,
 Et Evalac li otroia,
 Et Josep plus ne detria ; 10392
 Tant li mostra qu'il le venqui,
 Ke sa false loi relenqui ;
 Tant se fïa el roi de gloire
 Qu'il ot la force et la victoire, 10396
 Que Tholomé venqui del tout,
 Qu'il avoit trové si estout.
 Et quant ce vint au baptizier,

Si li firent son non changier, 10400
 Mordrach ot non en cele loi ;
 A Joseph fu de bone foi
 Et Joseph a lui ensement.
 Ne demora pas longuement 10404
 Que Joseph vint en cel païs ;
 Il n'i vint pas come esbahis,
 Ains i vint bien lui soissantisme
 De bone gent et de saintisme, 10408
 Et deus dames beles et gentes
 Qui a Dieu eurent lor ententes.
 Philosophine ot a non l'une,
 Un tailleoir plus cler que lune 10412
 Aporta, et l'autre une lance
 Qui onques de sainier n'estance.
 Et Joseph ot un tel vaissel,
 Onques nus hom ne vit si bel ; 10416
 Si faisoit la gent convertir
 A Dieu et au bien avertir.
 Et adont i avoit un roi
 Qui plains estoit de grant desroi, 10420
 Crudel ot non, molt fu crueus ;
 Tantost qu'il oï parler d'eus,
 Prendre les fist et amener,
 Molt les fist vilment demener 10424
 Por che que sa gent baptizoient ;
 Cil qui le mal li atysoient
 Li loërent par mesprison
 Qu'il les meïst en sa prison, 10428
 Et il si fist sanz nul respit ;
 Tenir les fist en tel despit
 N'orent nule rien que mengier ;
 La les quidoit faire esragier 10432

D'angoisse, de soif et de fain ;
 La jurent, sor un poi de fain,
 Quarante jors entierement ;
 Et sachiez toz certainement, 10436
 Ainc n'i burent ne ne mengierent,
 Ne onques cholor n'i changierent,
 Car Josep qui molt fu sains hon
 Et qui molt fu de grant renon 10440
 Le saint Graal en garde avoit,
 Et quant chascuns veü l'avoit,
 Si avoit entr'aus tel clarté
 Et de toz biens si grant plenté 10444
 Qu'il estoient tout raempli,
 Et tout lor voloir acompli.
 Tant furent laiens a sejour
 Que passerent quarante jour 10448
 C'onques n'i orent doel ne ire,
 Tant que rois Mordrains oï dire
 Que Josep fu emprisonez ;
 Lués qu'il en fu araisonez, 10452
 Sa gent manda isnelement
 Et il ot son estorement
 Appareillié et ses nes toutes ;
 En mer entrerent a grans routes, 10456
 Et tant au sigler estriverent
 Qu'a un ajornant arriverent
 En la tēre le roi Crudel ;
 N'i remest maison ne bordel 10460
 Que il tout en fu ne meissent,
 N'atainsent home ne preissent.
 Li rois Crudel, quant l'oï dire,
 Espris de mautalent et d'ire, 10464
 Manda sa gent, contre lui vint ;

A l'assambler issi avint
 Que il i ot fait grant ochise,
 Mort i ot maint fil de marchise. 10468
 Li doi roi tant se combatirent
 L'uns a l'autre qu'il s'abatirent
 A la terre jus des chevaux ;
 Tant i soffrirent de travaus 10472
 N'i ot celui ne fust lassez
 Et qui des cops n'eüst assez.
 Que vous iroie je contant ?
 Li rois Mordrains fist d'armes tant, 10476
 Qui le voir en volroit conter
 Anuis seroit de l'escouter ;
 Le roi Crudel le chief colpa,
 Petit de sa gent eschapa. 10480
 Quant li rois Mordrains l'ot vencu,
 Trestoz armez, al col l'escu,
 Ala a la chartre erranment,
 Ou tant ot esté longuement 10484
 Joseph qui tant fu ses amis,
 Si l'a de la chartre fors mis ;
 Molt fu joians, forment l'ama.
 Li rois Mordrains se desarma, 10488
 Et quant il l'orent desarmé,
 Si virent qu'il ot entamé
 Le chief, le cors, les bras, le vis,
 De plaies, qu'i n'estoit hom vis 10492
 S'il le veïst, qui ne quidast,
 Et bien ses plaies avisast,
 Que tout maintenant ne morust
 Ne c'une heure vivre peüst ; 10496
 De sanc furent toutes vermeilles
 Ses plaies. Or oiez merveilles,

Que il ne s'en doloit de rien,
 Et ses armes, ce sachiez bien, 10500
 Ne furent perchies ne routes ;
 Et ses gens dont i ot grans routes
 S'esmerveillierent de tel oeuvre
 Que nus en ses armes ne trove 10504
 Pertruis ne nule trencheüre
 Par coi il eüst blecheüre.
 Tout ensi fu li rois navrez.
 Mais ore oiez et si sarez 10508
 Con faitement après avint.
 Joseph au matin au roi vint
 Et fist aporter une table,
 Bele et plaisant et delitable ; 10512
 Atoner le fist tout autel
 De dras que l'en fait un autel ;
 Le Graal mist sus erranment
 Et fist comenchier saintement 10516
 Et molt dolcement le service ;
 Ensi con l'estoire devise,
 Li rois Mordrains vit le Graal,
 La sainte chose esperital, 10520
 Avant ala sanz plus atendre,
 Qu'a l'esgarder voloit entendre
 Por les grans merveilles savoir,
 Mais il ne fist mie savoir 10524
 De che qu'il volt avant passer,
 Car nus cuers nē porroit penser,
 Langue dire, ne oeus veoir
 Les grans merveilles, por pooir 10528
 Du saint Graal. Adont qu'avint
 C'uns angles de vers le ciel vint
 Qui tint une espee entensee,

Plus longue d'une grant teseen, 10532
 Plaine estoit de flambe et de fu.
 Li rois Mordrains esbahis fu,
 Il estut cois, avant n'ala,
 Et lors une vois avala 10536
 Qui dist : « Mordrain, tu es mesfais
 Sor ton col as chargié tel fais ;
 Dont ja ne te verras delivre :
 Toz les jors que tu as a vivre 10540
 En seront tes plaies noveles,
 Et si te di unes noveles
 Que tu ja ne respasseras,
 Ne jamais ne trespaseras 10544
 De cest siecle, ensi avenra,
 Devant a che que cil venra
 Ki vrais chevaliers ert clamez,
 Et de Jesu Crist tant amez 10548
 Qu'il ert sanz pechié, vrais confés ;
 Dont serez deschargiez du fes,
 Et morrez entre ses deus bras ;
 Et en cest lit, desoz ces dras, 10552
 Gerrez tant, car Jesus le mande,
 Ne ne gousterez de viande
 Nule, mar en avez envie,
 Fors solement de pain de vie. » 10556
 S'a li rois en tel point esté
 Trois cens ans, aviegne en esté.
 Ore avez le voir escouté,
 Et on nous a dit et conté 10560
 Que cil est ja en ceste terre
 Qui s'entremet du Graal querre
 Et la Lance dont li fers saine ;
 Chascune plaie seroit saine 10564

Que li rois a, s'il venoit chi,
 Et Dieus l'amaint par sa merchi ! »
 Quant Perchevaus entent le moigne,
 Qui le verité li tesmoigne 10568
 Del roi Mordrain qu'il a veü,
 Molt en a grant meveille eü,
 Et molt li poise de grant fin
 De che que il n'a trait a fin 10572
 L'aventure et gari le roi ;
 Volentiers en preïst conroi
 S'en la chapele entrer peüst
 Et il a Damedieu pleüst, 10576
 Mais n'i trova huis ne fenestre
 Par ou peüst entrer en l'estre,
 Si en est molt de corrous plains.
 A soi meïsmes s'est complains 10580
 Et prie a Dieu molt doucement,
 Que il par son comandement
 Li doinst en tel maniere ovrer
 Qu'il puist son escu recovrer 10584
 Temprement qu'il avoit perdu,
 Dont il ot le cuer esperdu,
 Et la Lance et le saint Graal,
 Et le roi garir de son mal 10588
 Qui gist navrez en la chapele.
 A cest mot le rendu apele,
 Si rove aporter ses adous.
 Dist li rendus : « Biaux sire dols, 10592
 Demorez chaiens anuit mais,
 Ne ja mais serez en esmais
 Qu'assez arez et vos chevaus.
 — Certes, sire, dist Perchevaus, 10596
 Je ne puis ore sejour faire

Car jou ai empris un afaire
 Dont je ne me puis deporter. »
 Li rendus li cort aporter 10600
 Ses armes tout sanz atargier,
 Puis li aporta a mengier
 Pain et formage et vin a boire.
 Et Perchevaus menga en oirre, 10604
 Puis s'arme et monte isnelement ;
 De la porte ist, sa voie enprent,
 Car il n'avoit de sejour cure.
 Mais ains que past la nuit obscure, 10608
 Sera de mort en grant peril,
 Se Dieus qui envoia son fil
 En terre pecheors salver
 Ne pense de lui eschiver, 10612
 Já mais ne verra plus bel jor.

 Perchevaus oirre sanz sejour,
 Qui riens ne doute ne resoigne ;
 Mais or li croist molt grans essoigne 10616
 Dont encor ne se done garde.
 Perchevaus sor destre regarde,
 Quant de la forest issi fors,
 Et vit une cité molt fors 10620
 De murs, de tors, d'iaue de mer ;
 Ne vous sai dire ne esmer
 La valor ne la richeté.
 A l'entree de la chité 10624
 Ot un chastel desor un mont,
 N'ot mieus fermé en tot le mont
 De murs et de tors bateillies,
 De pierres de gres bien taillies ; 10628
 La maistre tors fu grans et bele,

Il i ot mainte colombele
 De marbre as fenestres entour,
 Il n'ot el mont plus bele tor. 10632
 Et sachiez qu'en tout le chastel
 N'avoit fenestre ne crestel
 Ou n'eüst un escu pendu ;
 Ainchois averoit despendu 10636
 Tot son tresor li rois Artus
 Qu'il eüst par forche abatus
 Les escus et le chastel pris.
 Molt est li sires de grant pris 10640
 Qui le chastel en garde avoit.
 Quant Perchevaus le chastel voit
 Cele part va sanz porlongier ;
 Mais mius li venist eslongier, 10644
 Mais mains hom, ch'ai oï retraire,
 Va liement a son contraire.
 Perchevaus entra en la porte,
 Qui lance ne escu ne porte, 10648
 Mais armez fu, l'espee ot çainte.
 Une dame, toute desçainte
 Por le chaut, encontre li vint,
 Od li chevaliers plus de vint ; 10652
 La dame un enfant amenoit
 Dont molt grant joie demenoit ;
 Molt estoit de bele fachon,
 Ne sai que plus bel enfanchon 10656
 Peüst on trover ne veoir :
 S'estoit sès fius, n'avoit autre oir.
 L'enfes ot deus anz et demi ;
 La dame n'ot si bon ami 10660
 A cui l'enfant meist en garde.
 Perchevaus la dame regarde

Qui del chastel fu avalee
 En pur bliaut desasfublee. 10664
 Perchevaus descent erranment
 Et salue cortoisement
 La dame et tos les chevaliers,
 Que molt estoit cortois parliers, 10668
 Puis requiert et prie l'ostel.
 La dame qui avoit los tel
 Que toz li mons le loe et prise,
 Car de toz biens estoit esprise, 10672
 Si li respondi come sage :
 « Sire, fait ele, par l'usage
 Ki el chastel est estorez
 L'ostel tel come il est arez, 10676
 Et Dius qui es chiez lassus maint
 A grant joie vous en remaint
 Et vous destort d'anui et d'ire. »
 La dame ne li volt plus dire, 10680
 Fors tant qu'el chastel le conduit
 A grant joie et a grant deduit
 Et si chevalier avec li.
 A Percheval molt embeli 10684
 De che que il est hebergiez ;
 Vistement est deshaubergiez,
 Ses armes met sor une table ;
 Et uns vallés met a estable 10688
 Son cheval et le frain li hoste.
 La dame Percheval son oste
 Fait aporter cote et sorcot,
 Mais je quit que molt chier escot 10692
 Paiera ançois qu'il s'en torne.
 Perchevaus se vest et atorne ;
 Et tantost qu'il fu atornez,

- Un petitet s'est retornez 10696
 Et choisist en mi le palais
 Un hucel qui n'est mie lais
 Qui fais estoit de fin yvoire,
 Et sachiez, c'est parole voire, 10700
 C'onques nus hom ne vit si gent ;
 Bendez estoit d'or et d'argent,
 En l'or ot mainte pierre assise
 Et en l'argent d'estrange guise 10704
 Qui sont prescieuses et chieres ;
 D'un drap de soie de manieres
 Qui fu ovrez a Palatyne
 Ot on fait par desus cortine ; 10708
 En chandeliers d'or de grant pris
 Avoit quatre chierges espris
 Qui onques jor ne sont estaint ;
 Et qui le voir vous en ataint 10712
 Dire puet, c'est chose seüre,
 K'il i ot riche serreüre,
 Onques tele ne fu, je quit ;
 Une clef i a d'or requit 10716
 Qui a le serreüre pent ;
 De trestot l'avoir qui apent
 Au duc qui sire est d'Osteriche
 Ne feroit on hucel si riche. 10720
 Quant Perchevaus le hucel voit,
 Si dist c'onques veü n'avoit
 Ausi riche mais en sa vie,
 Mais du savoir a grant envie 10724
 S'il avoit dedans saintuaire.
 Perchevaus ne se velt pas taire,
 Lez la dame s'est acoutez :
 « Dame, fait il, c'or me contez 10728

Quel saint ce sont en cel huchel
 Qui n'est pas covers de lincel,
 Mais de drap de riche color.
 — Sire, se Dieus me doinst s'amor, 10732
 Je ne vous en sai dire voir,
 Car onques nus nel pot savoir
 Puis l'eure que cha dedens vint.
 Oiez coment il en avint, 10736
 Je vous en iere voir disans.
 Il a passé plus de dis ans,
 Si con je pens et sai esmer,
 Que la aval sor cele mer 10740
 Vint uns cignes a cel rivage ;
 A son col traioit une barge
 A une chaîne d'argent,
 Si cria si haut que la gent 10744
 De ceste cyté s'en esmurent.
 Me sire et si frere i corurent
 O grant plenté de chevaliers ;
 Cel huchel et ces chandeliers 10748
 Troverent en la nef dedens
 Et ces chierges molt cler ardans,
 Et unes letres molt petites
 Qui en françois furent escrites, 10752
 Et disoient qui les lisoit
 Que li huciaus qui la gisoit
 Que vous a vos oez esgardez
 Fust cha dedens mis et gardez 10756
 Si richement come il est ore ;
 Et devisa li briés encore,
 Et faisoit pour voir affermer,
 Que nus nel porroit desfermer 10760
 Se li mieldres chevaliers non

Ki fust et du greignor renon ;
 Mais quant il l'avera overt
 Et che qu'il a ens descovert, 10764
 Que me sires et si troi frere,
 Qui molt sont dolent de lor pere
 Qui a la cort Artu ala
 N'onques puis ne revint de la, 10768
 Que lié et dolent en seront
 Quant ce dedens veü aront.
 Or ont del savoir grant talent
 Por coi seront lié et dolent, 10772
 Si s'en vont chascun jor gaitier
 Par la forest le grant sentier
 Et toz les set chemins roiaus ;
 Et sachiez qu'il va avec als 10776
 Molt grant plenté de chevaliers ;
 Lor amies et lor moilliers
 Por deporter chascuns i maine ;
 Trestoz les jors de la semaine 10780
 Gardent fors que le diemenche,
 N'ai talent que je vous en menche ;
 Et quant par aventure avient
 Que alguns chevaliers i vient 10784
 Qui por pris et por los aquerre
 Trespast por aventure querre,
 Sel prenent et font cha venir
 Savoir s'il porroit avenir 10788
 Ke le huchel puist desfermer,
 Mais bien vous por voir jurer
 C'onques nel pot desfermer nus ;
 Si en i a bien cent venus, 10792
 Qui s'i sont traveillié en vain.
 Hier prisent mon seignor Gavain,

Un chevalier de molt grant pris,
 Mais, ançois qu'il l'eüssent pris, 10796
 Se desfendi molt vassalment
 Et les damaga durement,
 Et lor feïst greignor damage,
 Mais des cheyaliers li plus sage 10800
 Le firent lués as dames prendre,
 Mais onques ne se volt desfendre.
 Cha l'amenerent por savoir
 S'il porroit dignité avoir 10804
 Que cel huchel peüst ouvrir
 Et che qu'il a ens descouvrir,
 Mais ainc n'en pot venir a chief ;
 Et me sire jura son chief 10808
 Qu'il en esteroit en prison
 Por che qu'il ert de la maison
 Al bon roi Artu de Bretagne,
 Et tant i ert que il ataigne 10812
 Celui par cui sera overs
 Cis huciaus qui tant est divers,
 Dont seront de prison fors mis,
 Et puis au los de ses amis 10816
 S'acorde qu'il en overra,
 Et de celui qui l'overra
 Fera feste, s'il l'en doit faire.
 Or vous ai aconté l'asfaire 10820
 Et l'usage de cest chastel.
 Dieus le vous otroit lié et bel
 Que partir en puissiez a joie.
 — A foi, Damadieus vous en oie ! » 10824
 Dist Perchevaus, qui fu assis,
 Mornes et dolens et pensis
 De Gavain qui en prison est.

- A tant es vous sanz nul arest 10828
 Le seignor et sa conpaignie,
 Bien armé, la lance empoignie.
 Li autre et si frere ensement
 Furent armé molt richement ; 10832
 Chascuns ot sa feme ou s'amie
 Fors li sires qui ne velt mie
 Que sa moilliers son enfant laist,
 Que tant l'aime et tant fort li plaist 10836
 Que plus l'aime de rien del mont.
 A grant joie montent amont
 Chevalier, cil cheval henissent ;
 Vallet et escuier s'en issent 10840
 Qui ont receü les chevaus.
 Onques me sire Perchevaus
 Ne se volt lever en estant,
 Ains atendi et sosfri tant 10844
 Qu'il sont tot el palais entré ;
 Chascuns ot chaint le brant letré,
 L'elme lachié, el poing la lance.
 Li sire devant toz se lance 10848
 Qui avoit a non Leander,
 Et uns siens freres Evander
 Et li tiers ot non Enardus,
 Qui de Catenouse fu dus, 10852
 Le quart Meliadas apelent
 Cil qui son non a droit espelent.
 Molt furent fiers et merveilleus
 Et chevalier trop orgueilleus, 10856
 Preu et hardi et dur et fort.
 Li mains preus ne doute un viez fort
 Chevalier tant soit de grant pris.
 Li sires vint d'air espris 10860

Vers Percheval, sans bienveignier ;
 Il ne le volt tant adaignier
 Que tant ne quant a lui parlast,
 Fors tant qu'il dist que il alast 10864
 Le hucel ovrir, se il puet :
 « Einsi faire le vous estuet
 Ains que vous mengiez ne bevez.
 Mais faites tost, si vos levez, 10868
 Qu'ensi faire le vous covient. »
 Dist Perchevaus : « Bien me sovient
 De che que la dame m'a dit,
 Ja n'i meterai contredit. » 10872
 Perchevaus a cest mot se drece
 Et droit vers le hucel s'adrece,
 Mais mius li venist reculer
 Deus pas que un avant aler ; 10876
 Se Dieus n'en pense, li vrais pere,
 Mains hom son hardement conpere.
 Perchevaus s'en va tot soëf
 Au hucel, si a pris la clef, 10880
 En la serreüre l'a mis.
 Li quatre frere et lor amis
 Se sont tout arengié entour.
 Perchevaus ne torna c'un tor, 10884
 Le clef au pesne adesé a
 Et le huchel lués desferma ;
 Le covercle en a levé sus ;
 Et li sires qui fu en sus 10888
 Et si frere et lor chevalier
 Et avec als mainte moillier
 Vont avant et firent grant presse ;
 Chascuns de l'esgarder s'apresse 10892
 Por veoir que dedens avoit.

Li sires esgarde, si voit
 Un chevalier qui dedens fu,
 Ochis, et d'un riche bosfu 10896
 Estoit li cors molt bien covers ;
 Mais quant li huciaus fu overs,
 Une si douce odors en ist
 Que chascuns toz s'en esbahist, 10900
 Et li chevalier et les dames
 Jurent et dient sor lor ames,
 Dont il i ot plus de cinc cens,
 Que mugelias ne encens 10904
 Ne flaira onques si soëf.
 Le hucel qui dedens la nef
 Vint ne regardent tant ne quant,
 Ainçois regardent li alquant 10908
 Le cors qui gist desoz les dras ;
 Mais il virent le destre bras
 Et le main tout a desouvert ;
 En le main ot un brief overt, 10912
 Les letres furent d'or portraites.
 Fors de la main li a lués traites
 Li sires, et si les fait lire,
 Mais en lisant porra eslire 10916
 Le greignor doel que il ot onques.
 Cil qui les list li dist adonques :
 « Sire, fait il, or esgardez
 Desoz cest drap et si gardez, 10920
 Et si metez bien vostre avis,
 S'onques le cors quant il fu vis
 Coneüstes qui la se gist,
 Car cis briés dist que cil l'ocist 10924
 Qui le hucel orains ovri. »
 A tant li sires descovri

Le cors de la grant porpre chiere,
 Puis le regarde en mi la chiere ; 10928
 Pour son pere l'a enterchié,
 Car par mi l'ueil avoit perchié
 Le cervele d'un gavelot ;
 Et quant assez esgardé l'ot 10932
 Bien reconnoist que c'est ses pere.
 A vois escrie : « Seignor frere,
 C'est vo pere qui chi gist mors. »
 A tant se pasme sor le cors, 10936
 Et li frere ensement se pasment ;
 Au revenir lor vies blasment ;
 Chascuns a dit quant il se drece :
 « Veschi le doel et la leeche 10940
 Qu'avons desirré a savoir :
 Doel devrions nous bien avoir
 Quant nostre pere ocis veons ;
 Je ne sai dont leeche aions. 10944
 Leeche bien le puis jugier
 N'avons, fors que de lui vengier.
 Vengier ? las ! con povre venjanche !
 Se cent en tuoie a ma lance 10948
 Tieus con cist est qu'a mort mon pere,
 Qui rois estoit de cest empere,
 Ne serions nous vengié pas. »
 Lors se repasme isnel le pas 10952
 Li sire, et li autre ensement,
 Et jurent iluec longuement.
 Quant Perchevaus voit la dolor
 Que li sires fait, a folor 10956
 Le tient quant onques laiens vient.
 « Hé ! Dieus, fait il, ainc mais n'avient
 A home aventure tant dure.

Ensi que gaires ne le blece,
 Car plains estoit de grant nobleche.
 L'enfant lieve et le hache entoise
 Dont li mances ot une toise 10996
 De lonc, et l'alemele est lee.
 Rendre cuide dure mellee,
 Ainçois qu'il soit ne mors ne pris ;
 Con hardis hom a estal pris, 11000
 El cor de la sale s'estut,
 En haut a dit, ainz c'on le tut,
 Par Dieu se vendera molt chier.
 Li sire comenche a huchier : 11004
 « Certes, vassal, ne vous i vaut,
 Je ne weil que nus se travalt
 A vous ocirre fors mi frere,
 Si venjeront la mort lor pere 11008
 Qu'ochis avez en traïson,
 Car je ne voi nule raison
 Que vous mon pere oceïssiez
 S'en traïson nel feïssiez ; 11012
 Con murdrieres l'avez ocis,
 Mais ja Dieus n'ait de moi merchis,
 Se ne vous detrai a chevaus.
 — Certes sire, dist Perchevaus, 11016
 La traïson met je defors.
 Il n'est nus hom qui tant soit fors,
 S'il le voloit vers moi mostrer,
 Que je ne le quidasse outrer. 11020
 Ce poise moi se je l'ai mort,
 Mais certes ce fu a son tort ;
 Or m'en vois bien aperchevant,
 Car il me ferit tot avant 11024
 Come chevaliers orgueilleus

De sa lance un cop merveilleus
 Par les espalles d'en travers ;
 Et j'estoie sos et pervers, 11028
 Si quidoie bien que li rois
 Artus m'eüst tot son harnois
 Doné, quant je li demandai,
 Ausi m'aït Dieus jel quidai, 11032
 Tant avoie poi de savoir,
 Ses armes maintenant avoir.
 Quant Keus me dist que les preïsse,
 Ne quidai pas que mespreïsse 11036
 Quant je li dis que il ostast
 Ses armes, plus n'i arestast,
 Ou a force li osterioie
 Que je plus n'i atenderoie ; 11040
 Il fu correchiez et plainz d'ire
 Quant teus paroles m'oï dire,
 Adont me ferì sanz nul gap
 De sa lance qui ert de sap ; 11044
 D'un gaveloit a lui lançai
 Dont la cervele li perchai ;
 Du cop fu mors, ce poise mi.
 Or m'en tenez por anemi, 11048
 Mais toz sui pres de l'amender,
 Ja ne sarez rien comander
 Ke n'en face sanz mort rechoivre,
 Et sanz membre perdre. Aperchoivre 11052
 Poëz et de legier savoir
 Que je l'ocis par non savoir,
 Mais voir il me ferì anchois.
 Gentius sire, se tu perchois 11056
 Que je n'aie mort deservie,
 Si me fai respiter ma vie,

Et cest enfant que je tien chi,
 Por Dieu, aiez de lui merci. 11060
 Car ce sera doels et pechiez,
 Qu'il ert ançois toz detrenchiez
 Que vous m'aiez mort et venchu,
 Car de l'enfant ferai escu; 11064
 Si ert trop grans mesaventure
 Se si tres bele creature
 Est mors en sifaite maniere. »
 La dame chiet pasmee arriere; 11068
 Quant en tel point son enfant voit
 Que en ses flans porté avoit,
 Ses cuers en est en grant destrece.
 Quant de pasmer vint, par sa treche 11072
 S'aert come feme dervee,
 Puis si s'est sor ses piez levee
 Et s'escrie come esmarie :
 « Sire, por Dieu le fil Marie, 11076
 Aies de ton enfant merci.
 Gentius sires, ançois m'ochi
 Que mon enfant voie morir. »
 Leander cuida bien marir 11080
 Quant son enfant voit en tel point.
 Et l'enfes ses manetes joint,
 Si pleure et dist : « Merchi, biaus pere,
 Aiez de moi et de ma mere 11084
 Pitié, qu'ele s'ochist de doel. »
 Leander morust bien son wel,
 Quant son enfant ot et entent
 Qui merci crie et ses mains tent; 11088
 Ne set que puist faire ne dire,
 Tant par est plains de doel et d'ire :
 Ire a grant de son anemi

- Et si a doel de son ami 11092
 Que il li covenra blechier,
 S'il velt son anemi touchier ;
 Mais son enfant pas ne ferroit
 De pitié, ainçois sofferroit 11096
 C'on li sachast le cuer del ventre.
 Une volentez en lui entre
 Qui molt par est hardie et fiere ;
 Ne velt que nus son enfant fiere, 11100
 Sa gent fait traire a une part ;
 A Percheval dist : « Je te part
 Une partie merveilleuse ;
 La mieldre est assez perilleuse, 11104
 Mais a ton cois sera du prendre.
 Je te ferai tes armes rendre,
 Si t'armeras tot a loisir,
 A ton buen, et a ton plaisir, 11108
 Et nous somes chi frere quatre ;
 Vers moi te covenra combatre,
 Et se tu conquerre me pués,
 A l'autre te covenra lués 11112
 Combatre, et se tu l'as venchu,
 Li tiers avra al col l'escu,
 Et se tu l'outrés ne le mates
 Il covient que tu te combates 11116
 Al quart ; se tu le pués outrer,
 Je te wel bien por voir mostrer
 Que ja puis n'avras mesprison,
 Ainz t'ierent bien tot li prison 11120
 Que j'ai pris maintenant rendu ;
 Autresi bien c'un blanc rendu
 M'en pués croire, se Dius me salt ;
 Et se tu vels avoir l'assalt 11124

Einsi con tu iez demanois
 Tu l'aras, mais ce ert anois
 Se l'enfes est od toi peris.
 — Ausi m'aït sains Esperis, 11128
 Fait Perchevaus, l'autre partie
 Weil je mieus prendre a ma partie.
 Faites mes armes aporter,
 Quant ne m'en volez deporter 11132
 Ne je n'en puis a el venir :
 Mius waut bataille que morir. »
 Quant li plais fu acreantez,
 Leander, qui molt fu doutez, 11136
 Fait aporter a Percheval
 Ses armes, et puis son cheval
 Li a fait traire en mi la cort.
 Perchevaus vers son cheval cort, 11140
 Car il avoit l'enfant jus mis ;
 Perchevaus s'est bien entremis
 De son cheval a harneschier,
 Il l'estraint, et puis va lachier 11144
 Ses cauces qui furent treslites
 A coroies de fer eslites ;
 Uns esperons deseure chauce
 Qui tres bien sieent sor le cauce, 11148
 Puis saut en estant maintenant
 Et vest l'auberc fort et tenant
 Très par deseure un auqueton
 Qui fu de soie et de coton ; 11152
 Puis a lachie sa ventaille
 Et chaint l'espee qui bien taille,
 Que il doit durement amer,
 Par deseur sa cote a armer 11156
 Que il environ lui escorche ;

Ses estriers un petit acorche
 Por plus estre ferm a cheval.
 Chascuns esgarde Percheval 11160
 Qui bien fait che qu'a lui aconté.
 Perchevaus sor son cheval monte,
 L'elme lache, al col pent l'escu,
 La lance prent au fer agu, 11164
 Ki molt par est et fors et roide
 De sap de plain poing grosse et roide ;
 Bien s'est por desfendre acesmez.
 Leander, qui bien est armez, 11168
 A fait un cheval traire fors,
 Qui molt par est et grans et fors,
 Rades, isniaus et droit corans.
 Or soit Percheval secorans 11172
 Jesus li vrais rois glorieus,
 Car hostel ara dolereus,
 Se il est vencus ne matez.
 Leander est tantost montez, 11176
 Qui molt desirre la bataille,
 L'elme lachié sor la ventaille,
 Son escu et son glave a pris ;
 D'ire et de mautalent espris 11180
 S'en est de l'une part tornez,
 Bien s'est por combatre atornez ;
 Grans est et fors, si se derioie,
 Il jure qu'il ne tenra roie 11184
 Ja mais de terre tant qu'il vive,
 Se celui qui vers soi estrive
 N'ocist al joster ou mehaigne ;
 Vaillant une berbis brehaigne 11188
 Ne redoute Percheval point.
 Perchevaus l'esgarde en cel point,

Molt le vit fier, plain de desrois.
 « Hé ! Dieus, dist il, biaux pere rois, 11192
 Ne soffrez que par mes meffais
 Dont je sui envers vous meffais
 Me combre vers cest home anuit.
 Vrais Deus, de chose qui m'anuit 11196
 Me desfendez par vo pitié. »
 Leander n'a plus respitié,
 Cui li cerviaus d'aïr esmuet,
 Le cheval point qui tost li muet, 11200
 Et Perchevaus le sien randone.
 Li uns vers l'autre s'abandone
 Quanqu'il püent des chevaus traire,
 Mais bien vous puis por voir retraire 11204
 Que, quant ce vint a l'aprochier,
 Que les fers amarez d'acier
 Font par mi les escus passer ;
 Assez aront a respasser 11208
 En lor plaies au departir ;
 Les haubers font rompre et partir,
 Prés des costez sentent les fers,
 Cruesus presens se sont offers ; 11212
 Li fer fichierent es archons
 De lor lances et en tronchons
 Volent et esclichent et froissent,
 Grans escrois font quant eles froissent ; 11216
 Et li cheval corent si droit,
 Qui fort estoient et adroit,
 Que des chiés se sont si hurté
 Qu'a poi qu'il ne sont afronté, 11220
 Et li vassal si fort s'encontrent
 Qu'a bien petit que ne s'afrontent.
 Tant forment furent estoné

- Qu'il quident bien qu'il ait toné, 11224
 Car li oeil lor estinchelerent ;
 Li cheval si fort chancelerent
 Que sor les garez sont versé ;
 Cheü fuissent tot enversé 11228
 Li chevalier d'ambesdeus pars,
 Quant chascuns d'ambesdeus les bras
 A son cheval par le col pris ;
 Et li cheval qui sont de pris 11232
 Ont mis grant paine au redreschier ;
 L'uns ne puet vers l'autre adrechier,
 Tant furent vain et estordi.
 Et li vassal qui sont hardi 11236
 Sont andoi descendu a pié ;
 N'avoient lance ne espié,
 Car al joster les orent frais ;
 Il ont les brans des fuerres trais, 11240
 Puis se sont estrain en lor armes ;
 Chascuns tint l'escu as enarmes,
 Si se sont cointement covert ;
 Ne dient mot ne ke convert 11244
 Cui li parlars est desfendus.
 As premiers cops ont porfendus
 Les escus et toz dehachiez
 Et les hiaumes ont despechiez 11248
 Et des haubers, ce n'est pas faille,
 Vole par la cort mainte maille ;
 Navré sont si a cel assaut
 Qu'en pluisors lius li sanz lor salt ; 11252
 Se l'uns del sien a l'autre preste,
 Chascuns molt vistement s'apreste
 De rendre montes et chatel ;
 Onques hom estor ne vit tel, 11256

Si dur, si felon, ne si aigre.
 Navré furent de si al maigre
 Andoi molt angoisseusement ;
 Tant se requierent durement 11260
 Que merveille est que ne s'afolent ;
 De lor haubers les mailles volent,
 Lor elmes ont toz effonsez,
 De lor escus ont fait fossez 11264
 Et mis a terre devant eus ;
 Sanz et suors lor file as oeus
 Qui molt les grieve et la porriere.
 Un petit se sont trait arriere 11268
 Chascuns d'aus, et si se repose,
 Mais ne reposent pas grant pose.
 Chascuns a son escu repris ;
 D'ire et de hardement espris 11272
 S'entrevienent tot de rechief.
 L'uns fiert l'autre par mi le chief
 Quanque il puet menu et sovent ;
 Li uns l'autre chierement vent 11276
 Tot quanqu'il achate et bargaigne,
 L'uns a l'autre petit gaaigne.
 La bataille est et fors et dure,
 De lor sanc rougist la verdure, 11280
 Qui par lor plaies lor saut fors.
 Leander, qui fu durs et fors,
 A regardee sa moillier
 Qui de ses lermes fait moillier 11284
 Sa fache qu'ele ot blanche et tendre.
 Leander ne volt plus atendre,
 Ains cort Percheval envair.
 Un cop li done par air 11288
 Sor le costé a desouvert,

A poi ne l'a tot entrovert,
 L'auberc li trenche et la char blanche ;
 Li cops descent par tel samblanche 11292
 Aval rez a rez de la chauce,
 De l'espee si pres l'enchauce
 Que la verge de l'esperon,
 Issi come nus esperon, 11296
 Li a en deus moitez colpee ;
 En la terre feri l'espee
 Et, se li cops ne fust tornez,
 Perchevaus fust mal atornez, 11300
 Que del pié l'eüst mehaigné.
 Tout quida avoir gaaignié
 Leander, quant Percheval voit
 Qui del cop chancelé avoit ; 11304
 Vilainement a lui parla,
 Par grant contraire l'apela :
 « Vassal, fait il, rent toi vencü,
 Ce est drois que trop as vescü, 11308
 Qu'en traïsons tuas mon pere ;
 Si est bien raisons qu'il te pere,
 Detrais en eres a chevaus.
 — Certes, sire, dit Perchevaus, 11312
 Vous ne dites mie raison :
 J'en oste bien la traïson,
 Mais vous m'avez fait esmaier
 Et sentir en char vostre achier, 11316
 Et malement ma char navree.
 Mais ains que soit la desevree,
 Ne que nous doions departir,
 Volrai a vostre char partir, 11320
 Et quant pris en avrai partie,
 Que la chose ert a droit partie,

Dont vous porra avoir mestier
 S'auques savez de tel mestier. » 11324
 Lors s'est Perchevaus porpensez
 Con chevaliers bien apensez
 Qu'a malaise vaintra les quatre,
 Se il ne puet l'orguel abatre 11328
 De Leander. Lors s'abandone
 Vers lui et un grant cop li done
 Del brant d'achier et puis recovre,
 Tot le desconroie et descoevre, 11332
 Fiert et refiert tot sanz atente,
 Si que Leander n'a entente
 Fors a sosfrir et endurer ;
 Bien voit qu'il ne porra durer, 11336
 Car Perchevaus qui molt a force
 Tout adez de ferir s'esforce,
 Si que cil li guenchist et fuit ;
 N'il n'a nul liu tant de refuit 11340
 Qu'il puist durer, car les cops doute.
 Cil fuit et Perchevaus le boute
 Si qu'en un croés del pié marcha
 Et a la terre trebucha 11344
 A genillons en mi la voie.
 N'a home en la cort qui nel voie,
 Nis sa moillier qui crie et brait
 Et ses chaveus ront et detrait 11348
 Et dist : « Bien doi du sens marir,
 Quant mon seignor verrai morir. »
 Leander sa moillier entent ;
 Cuer et vigor prent, si s'estent ; 11352
 Isnelement en piez resaut.
 Et Perchevaus adez l'assaut,
 Qui son elme li quasse et fent ;

PERCEVAL, v. 11323 — 11388	137
Et Leander bien se desfent,	11356
Ne de fuïr n'a ore cure.	
Ensi dusque a la nuit obscure	
Li uns vers l'autre se combat.	
En la fin Perchevaus l'abat	11360
Droit devant les piez de sa feme.	
« Ha ! gentius sire, fait la dame,	
Por pitié et por guerredon	
M'otroiez et donez un don,	11364
Si ne le tenez en despít.	
Metez la bataille en respít,	
Se il vous plaist, dusque a demain. »	
Dist Perchevaus : « Par saint Germain,	11368
Trives donrai molt bonement,	
Se lui plaist, trusqu'al finement ;	
Et se il velt, par saint Martin,	
Recomencer puet le matin.	11372
Mais molt amaisse mius l'acorde ;	
De pecheor misericorde :	
S'il voloit prendre l'amendise,	
Je seroie a sa comandise,	11376
Sans ocirre et sanz mahaïgnier,	
Qu'a ma mort puet peu gaaïgnier. »	
Dist Leander : « Ja pais n'arés	
Envers moi tant con viverez.	11380
— Foi que je doi a saint Remi,	
Dit Perchevaus, ce poise mi,	
Et Dieus me doinst issi ovrer	
K'a vous puisse amour recovrer. »	11384
Einsi ont la trieve donee	
Dusque al demain la matynee,	
Et si ont laissié le plaidier.	
Et Leander a fait widier	11388

La cort des gens, as hosteus vont,
 Et lor armes ostees ont.
 En la grant sale qui ert painte
 Vint Leander, qui avoit tainte 11392
 La char de sanc et de suor ;
 Desarmez s'est a la luor
 Des chierges qui molt cler ardoient.
 Si troi frere, qui regardoient 11396
 Ses plaies, en ont le sanc trait ;
 Celes qui mestier ont d'entrait
 Li ont dolcement renuees.
 Ses gens ont les colors muees 11400
 De dolor, quant ses plaies voient,
 Qui molt durement li grevoient.
 La dame, qui ot non Ysmaine,
 Percheval bonement en maine 11404
 En une chambre noble et cointe ;
 Par desus une coute pointe
 Molt belement le desarma.
 Leander, qu'ele molt ama, 11408
 Li pria qu'ele se penast
 De lui servir et atornast
 Ses plaies au mius que seüst ;
 Si chier come son cors eüst, 11412
 Nel laiast por anemistié.
 La dame par grant amistié
 Leva Percheval la chemise,
 Puis a par desoz sa main mise, 11416
 De la plaie de sen costé
 Li a le sanc ters et osté,
 Puis i met entrait de coton,
 D'une bende de sciglaton 11420
 Molt dolcement l'estraint et lie.

Une dame qu'ot non Elie
 Li aida, qui molt bel se prove.
 Une roube qui tote est noeve 11424
 Li fait vestir de vair menu,
 Puis sont quatre serjant venu,
 Cortois et net et bien apris ;
 Li doi ont trois tortins espris, 11428
 Li autre doi metent la table,
 Et la viande delitable
 Ont et saine et nete aportee.
 Et la dame s'est deportee 11432
 A Percheval servir la nuit,
 Et por che que mains li anuit
 A fait mengier une pucele
 Od Percheval a s'escüele, 11436
 Puis li a dit : « Sire, or soiez
 Asseür, si vous aesiez
 De che que vous poez avoir,
 Et sachiez de fi et de voir 11440
 Que anuit mais vous garderai
 Et le matin vous renderai
 Et vo cheval et vo harnois ;
 Et se maus et honte et anois 11444
 Vous avient puis, je vous di bien
 Que ne m'en requerez de rien.
 Mais Dieus doinst qu'aventure aviegne
 Que me sire a vo pais aviegne 11448
 Si qu'ennour i ait et si frere,
 Et vous pardoinst la mort son pere.
 — Dame, fait il, Dieus vous en oie,
 Et vous envoie parfaite joie 11452
 De la rien que plus covoitiez. »
 Lors li dist cele : « Car mengiez,

S'il vous plaist, od moi par amors.
 Aloses, perches et salmons 11456
 Arez et fort vin a vo boivre ;
 Je ne vous weil mie dechoivre,
 Car vous avez tot vo delit.
 Après souper li font un lit 11460
 Bel et plaisant et delitable.
 Devant le lit sor une table
 Fait Perchevaus ses armes metre,
 Car, ce nous tesmoigne la letre, 11464
 « Qui est garnis n'est pas honis » ;
 Cil qui est entre toz onnis
 Et en peril doit bien penser
 Coment le peril puist passer ; 11468
 C'est cortoisie et bons usages.
 Por che fist Perchevaus que sages
 Que devant lui a fait estendre
 Ses armes et puis sanz atendre 11472
 Est alez en son lit couchier ;
 S'espee forbie d'acier
 A mis dalez lui a s'esponde.
 Raisons est que je vous desponde 11476
 Coment la dame se porchace
 Qui gille ne barat n'i chace,
 Fors tot bien et toute raison.
 Por mieus veoir par la maison 11480
 A fait deus lampes alumer,
 Que Perchevaus a soi armer
 Voie, se il li est mestiers.
 Uns menestreus endementiers 11484
 Li conte une aventure estraigne,
 Car ne trove qui l'en destraigne,
 Et Perchevaus le conte entent

Et la dame, qui tant atent 11488
 Que Perchevaus est endormis,
 Qui laiens ot molt d'anemis,
 Mais par samblant peu les cremi.
 Quant la dame voit endormi 11492
 Percheval, si s'en est partie,
 Et d'une manche mi partie
 Li a molt bien le chief covert ;
 Puis a l'uis de la chambre overt, 11496
 Fors s'en ist, jus est avalee,
 Et vint en la grant sale lee ;
 Et li menestreus reveveille
 L'uis et de couchier si s'apareille ; 11500
 Et la dame en la chambre va
 Ou son seignor seant trova,
 Et si troi frere et si baron
 Li seoient tot environ ; 11504
 Ses plaies li orent estraintes,
 Qui de sanc beté furent taintes ;
 Ointes li ont molt dolcement
 D'un molt prescieus oignement 11508
 Qui molt le fait asoagier.
 La dame li a fait mengier
 Un caudel savereus et sain.
 La dame avoit mis en son sain 11512
 Une almosniere riche et bele
 Qu'ele ot emplie de canele,
 De gyrofle et de nois mugates,
 Et grains de deus pomes grenates 11516
 Qui sain estoient et vermeil.
 La dame fu de grant conseil :
 En un mortier fist molre ensamble
 Totes ces choses, ce me samble, 11520

Puis les fait de vin destemprer ;
 Boire li fait por atemprer
 Le cervel qu'il ot estordi,
 Bien respassast ainz le tier di 11524
 Et porroit deduire et esbatre,
 S'il demain ne se velt combatre.
 A tant s'en sont ses gens parties,
 Couchier vont en pluisors parties, 11528
 En chambres, en sales, en tors,
 Qu'assez i avoit de destors.
 Leander est couchier alez,
 Et si troi frere lez a lez 11532
 Par devant lui en lor lis jurent ;
 Mais tres bien affichent et jurent
 C'ainc mais ne virent chevalier
 Qui se peüst appareillier 11536
 D'armes encontre Leander.
 « Seignor frere, dist Evander,
 Bien pert que cil est molt vassaus
 Qui tant a hui rendu assaus 11540
 A Leander, n'ainc ne recrut,
 Mais adés sa force li crut ;
 Il m'est avis qu'au daerrain
 Combati mius qu'al premerain. 11544
 Or vous weil je dire et mostrer
 Que, s'il puet Leander outrer,
 Je jur lealment et otroi
 Que nous serons conquis tot troi 11548
 Et ne porrons a lui durer,
 Ses cops sosfrir ne endurer. »
 Einsi ont entr'aus recordé ;
 Bien volroient estre acordé, 11552
 Sanz avoir blasme ne reproche.

Quant li tiers de la nuit aproche,
 Si s'endorment sanz plus plaidier.
 Mais temprement al mien cuidier 11556
 Sera müé en autre tour,
 Car quatre frere traïtor
 Furent laiens felon et fier.
 Dieus lor envoit mal encombrier ! 11560
 Pior furent que Guenelon,
 Molt furent hardi et felon,
 Car par lor fols entycement
 Ala a cort premierement 11564
 Li Vermaus Chevaliers requerre
 Au roi Artu toute sa terre,
 Et Leander tres bien savoit
 Que il par als perdu avoit 11568
 Son pere si les en haoit,
 Et volentiers les eschivoit,
 Por quant sont si parent prochain.
 Mais il a bien en un essain 11572
 De bones es sovent bordons,
 Sachiez que pas ne vous bordons,
 Qui le miel gastent et detraient
 Que les bones es font et traient ; 11576
 Ausi a il en un parage
 A la fois gent de put corage
 Qui sont losengier et cuivert
 Et faus et felon et covert, 11580
 Mais as oevres se font paroir.
 « As peres retraient li oir »,
 Ce dist on tot dis vraiment.
 Chis proverbes a le fois ment, 11584
 Si le weil par raison prover.
 On puet bien a le fois trover

Un peudome qui a un fill
 Qui tot le sien met a eschil, 11588
 Folement le jue et despent,
 Lerres devient tant c'on le pent ;
 Drois est que ses mesfais li pere,
 Cist fius ne retrait mie al pere : 11592
 Peudom est et ses fius malvais.
 Si m'aït Dieus et sains Gervais,
 Ce voit on sovent avenir :
 « Qui mal chace a mal doit venir », 11596
 Qui traïson maine et le fait
 Il ne puet estre qu'il ne l'ait.
 Itel gent n'ont point de savoir,
 Car bien poez aperchevoir 11600
 Ens estoires cha en arrier
 Que toz jor erent li murdrier
 En haut traïné et pendu :
 Cil qui Rollant avoit vendu 11604
 Et Olivier en Rainschevaus
 En fu traïnez a chevaus.
 En un autre proverbe trove,
 Car on dist que « li cuers fait l'oeuvre » : 11608
 Qui au bien se velt esmouvoir
 Il li covient du cuer movoir ;
 De bon cuer naist et vient bontez
 Et du malvais la malvestez. 11612
 Por les traïtors le vous di
 Qui estoient tout aati
 Et tout ensamble a un acort
 De Percheval traitier a mort 11616
 Et de lui livrer a martyre.
 Alumer font tortins de cyre,
 Et quant il furent alumé

Isnelement se sont armé ; 11620
 Quant armé sont, chascuns a pris
 En sa main un tortin espris,
 Gros et lonc, en la main senestre,
 Et le brant d'acier en la destre ; 11624
 Entr'aus ont dit que bien savoient,
 Se Percheval ocis avoient,
 Que il aroient sanz demour
 Pais et acorde et bon amour 11628
 A Leander et a ses freres ;
 Se par als ert vengiez lor peres,
 Il lor en saroient grans grez.
 A tant avalent les degrez 11632
 Et sont entré el grant palais ;
 A l'uis de la chambre a eslais
 Vient ou Perchevaus dormoit
 Qui de nului ne se cremoit ; 11636
 A l'uis hurtent et les ais froissent,
 Et au brisier si tres haut croissent
 Que la chambre toute en tenti.
 Li menestreus l'effrois senti, 11640
 Isnelement de sen lit saut,
 En haut a dit : « Se Dieus me salt,
 Sire, or sus ! je di sanz falir ;
 Ne sai qui vous vient assalir, 11644
 Ce poise moi que traïs estes.
 Ha ! gentius chevaliers honestes,
 Vous estes hui si bien provez,
 Gardez que ne soiés trovez 11648
 Vains ne laniers a cest besoing.
 Ne ja de moi n'aiez resoing
 Qu'a mon pooir vous aiderai,
 Ja certes ne m'en faiderai, 11652

Tant con j'avrai el cors la vie ;
 Et se me dame l'eschavie
 Savoit l'oeuvre, se Dieus me gart,
 N'avriens de nului regart 11656
 La ou destorner le peüst ;
 Et se Leander le seüst,
 Et si troi frere, cest afaire,
 Certes il feroient desfaire 11660
 Chiaus qui font ceste mesprison,
 Ja nes meteroit en prison. »
 Perchevaus est del lit salis,
 Quant il ot qu'il ert asalis ; 11664
 Isnelement ses armes prent,
 Hardemens et ire l'esprent ;
 En son dos giete un alqueton
 Qui fu de soie et de coton, 11668
 Desor a le hauberc vestu,
 Bien samble home de grant vertu ;
 Puis a lachie sa ventaille
 Et chainst l'espee qui bien taille. 11672
 Li menestreus molt bien se prove,
 Par le chambre quiert tant qu'il trove
 Un hiaume bel de dur achier,
 A Percheval le queurt lacier, 11676
 Ne fait samblant que il le hache.
 Li menestreus prent une hache
 Et un escu viez relaissié,
 Qu'apoié vit a un aissié. 11680
 A l'uis queurent que cil ont frait ;
 Perchevaus qui avant se trait
 A dit : « Fel traïtor quivert
 Vous trovissiez ja l'uis overt, 11684
 Mais a l'entrer vous lo gaitier,

Ja troverez felon portier.
 Vous me quidiez avoir sozpris,
 Mais ainz que m'aiez mort ne pris, 11688
 Se je puis, chier achaterez
 Quanques del mien emporterez :
 Vendre le quit au brant d'acier ».

Lors corut le verreil sachier, 11692
 L'uis a arriere tout overt.
 Uns des traïtres a covert
 Molt bien son chief de son escu,
 Qui molt tost quide avoir venchu 11696
 Percheval, por che qu'est blechiez,
 Il s'est por entrer avanciez ;
 Mais si come il dut entrer
 Perchevaus vint a l'encontrer 11700
 Qui del desfendre s'abandone,
 Sor son escu tel cop li done
 Qu'en deus li colpa et fendi ;
 Mais li hiaumes le desfendi 11704
 De mort ; porquant si l'a chargié
 Du cop que jus l'a trebuchié
 Par desus uns degrez adens.
 Li troi autre salent dedens 11708
 Qui Percheval ont bien requis,
 Tost le quident avoir conquis,
 Devant et en costé li salent
 Et as brans fierement l'asalent ; 11712
 Mais li menestreus li aïe
 Qui de la hache fiert a hie,
 Et Perchevaus lor requert seure.
 Bien fuissent venu al deseure 11716
 Des traïtors, quant cil relieve
 Qui cheüs fu : forment li grieve,

Encontre Percheval s'esmuet
 Et le requiert al mieus qu'il puet. 11720
 Et li autre li corent seure :
 Sovent et desoz et deseure
 Le fierent, forment l'ont navré.
 Perchevaus a cuer recovré, 11724
 Hardement et vigor et force,
 Tant s'esvertue et tant s'esforce
 Qu'arriere met ses anemis
 Sanz che que rien lor ot pramis 11728
 Et largement du sien lor done.
 Li menestreus se rabandone
 De lui aidier que très bien voit
 Que Perchevaus mestier avoit 11732
 De s'aïe et de son secors.
 A un traïtor viñt le cors,
 Si done un tel cop le quivert
 Par mi son elme a descovert 11736
 Que ja ne l'eüst desfendu
 Que ne l'eüst tot porfendu,
 Mais au ferir la hache torne
 Qui celui de la mort trestorne ; 11740
 La hache fiert el pavement
 Issi tres angoisseusement
 Qu'ele depieche et vole en deus ;
 Ce est et damages et deus. 11744
 Quant li traïtres a veü
 Qu'ele brisa, joie a eü ;
 Le menestrel fiert de s'espee
 Que l'espaule li a colpee . 11748
 Si que le tendron du costé
 Li a avec l'espalle osté ;
 Cil chiet qui de rien ne se coevre.

- Perchevaus de l'escu se coevre 11752
 Qui durement est correciez ;
 Vers le traïtor adrechiez
 S'est por ferir, l'éspee traite,
 Si l'a feru a le retraite 11756
 Grant cop entre col et chapel ;
 L'auberc li trencha et la pel,
 Les ners et les os et les vaines
 Qui de sanc furent totes plaines, 11760
 La teste li a fors colpee,
 Que bone et trenchans fu l'éspee.
 Quant ce voient li traïtor,
 Si ont recomenchié l'estor 11764
 Sor Percheval, felon et fier.
 Li uns escrie a l'autre : « Fier :
 Ce est hontes s'il nous eschape.
 — Ne m'avez pas en vostre trape ; 11768
 Se Dieus me salve ma main destre,
 Li plus hardis n'i volroit estre
 De vous por l'onor de Bretaigne ;
 Le valissant d'une chastaigne 11772
 Ne vous redolt mie orendroit,
 Tant me fi en Dieu et en droit. »
 A cest mot li traïtor salent,
 Percheval durement assalent. 11776
 Et Perchevaus vers als s'esdreche
 Et l'escu contre lor cops dreche,
 Vers als fierement sé combat ;
 Il fiert si l'un que il l'abat 11780
 A palmes et a genillons,
 Del sanc li vole uns grans boillons
 Par mi le nes de fin ahan.
 Devant le feste saint Jehan, 11784

S'il vit, n'ert mais jors ne s'en doeille.
 Li autre trambent come fueille
 De corrous, d'air et d'ardure,
 Que Perchevaus contre aus tant dure ; 11788
 Adont l'ont fierement requis,
 Mais petit ont vers lui conquis,
 Quant li autres après revint
 Qui vers Percheval corant vint, 11792
 Menu le fierent et sovent.
 Mais je vous di par un covent
 Que toz les eüst desconfis
 Perchevaus, de che sui toz fis, 11796
 Quant quatre serjant i acorent
 Qui les trois traïtors secorent ;
 Hauberjons avoient vestus,
 N'ont mie chapiaus de festus, 11800
 Mais de fer, et si tienent haches.
 Bouchier qui welent tïer vaches
 Ne fierent si grans cops qu'il font,
 A bien poi que chascuns ne font 11804
 De che que Percheval ne tïent,
 De ferir forment s'esvertüent.
 Et Perchevaus ne se faint mie,
 Ainz les requiert a l'escremie ; 11808
 Mais ses plaies li escrevoient
 Qui molt durement li grevoient,
 Et neporquant bien se desfent,
 Escus et hiaumes lor porfent ; 11812
 De desfendre a loial essoigne.
 De lor cops la chambre resone
 Si que la dame la noise ot
 Qui cele nuit en garde l'ot ; 11816
 Mais s'ele bien ne s'i regarde,

Par tans en fera povre garde.
 Et quant ele la noise entent,
 Levee s'est, plus n'i atent, 11820
 A son seignor vient, si l'esveille,
 Si li aconté la merveille
 Que Perchevaus est assalis.
 Leander l'ot, s'est sus salis, 11824
 Puis a ses freres apelez
 Qui se gisoient lez a lez :
 « Or sus ! seignor frere, fait il,
 Que nous serons tenu por vil 11828
 Et por felons traïtors faus,
 Se nous sosfrons que li vassaus
 Cui nous avons trive donee
 Dusqu'a demain la matinee 11832
 Est ocis en nostre maison,
 En mordre ne en traïson,
 Que ne sai qui laiens l'assaut. »
 Quant chascuns l'ot, de son lit salt, 11836
 Isnelement les armes prenent,
 Li vallet les cierges esprenent,
 Qui durement s'en esmerveillent ;
 Par le palais la gent esveillent, 11840
 Cil salent sus tot esbahi.
 Quant il ont lor seignor oï
 Et ses freres virent armez
 Et lor grans tortins alumez, 11844
 Qui tot sont fait de verde cyre,
 Si quident qu'il weillent ocirre
 Percheval dedens lor maison
 Et en dormant par traïson, 11848
 Si diënt tot comunablement :
 « Ha ! sire, trop vilainement

Volez vostre pere vengier.
 Or porra on par droit jugier 11852
 Que vous estes fols et traîtres,
 Vous nous faites dolens et tristres,
 Quant vostre bone renomée
 Perdez. Trives avez donee 11856
 Le vassal tressi a demain,
 Et ma dame l'a pris en main
 Que on nul mal ne li fera.
 Molt est honis qui sosferra 11860
 Que ma dame en soit ja blasmee,
 Et vous qui tant l'avez amee
 Devez sa honte destorner ;
 Ne vous devez mie atorner 11864
 A traïson faire et penser,
 Durement vous devroit peser ;
 Qui au vassal volroit mesfaire
 Vous li devriiez molt mal faire. 11868
 — Se Dieus me doinst bone aventure,
 Vous dites raison et droiture,
 Dist Leander, ce m'est avis.
 Ja mais jor que je soie vis 11872
 N'iert eure mieus ne vous en aim,
 Et a vous toz forment me claim
 De chiaus qui en murdre l'asalent. »
 Quant cil l'oent, de lor lis salent, 11876
 Erranment ont prises les armes,
 Espees, lances et guisarmes.
 Vers le chambre s'en vont le cors
 Por Percheval faire secors, 11880
 Mais Leander devant s'en va ;
 Molt fu dolans quant il trova
 Percheval devant le paroit.

- A son samblant pas ne paroît 11884
 Qu'il soit vains ne acoardis,
 Mais con bons chevaliers hardis
 Se desfent, molt estoit destrois ;
 Il a des huit ocis les trois. 11888
 Mais quant voit Leander venir,
 Adont ne set que devenir,
 Car il quide bien sanz falir
 Qu'il viegne por lui assalir. 11892
 Mais Leander huche a haus cris :
 « Si me puist aidier Jesus Cris,
 Felon murdrier, mal l'avez fait ;
 Traîné serez et desfait, 11896
 Vilainnement avez mespris :
 Je l'avoie en mon conduit pris,
 Et vous avez la trieve route ;
 Mais vo chars en sera desroute 11900
 Le matin et traite a chevaus. »
 Quant l'a entendu Perchevaus,
 Bien voit que n'est mie par lui
 Que cil li ont fait tel anui. 11904
 A tant vinrent corant li frere
 Qui jurent l'ame de lor pere
 Qu'il feront les traïtors pendre ;
 De totes pars les corent prendre, 11908
 Si les font molt estroit liier.
 « Le matin aront lor loier,
 Dist Leander, par saint Davi,
 Selonc che qu'il ont deservi. 11912
 — Par foi, frere, dist Marmadus,
 Je lo que chascuns soit pendus,
 Quant il ont mon menestrel mort,
 Et cestui assali a tort 11916

Qui de nous fu asseürez.
 Par foi, ja mais honor n'arez
 Se demain n'en faites justiche. »
 La dame son seignor enthice 11920
 Que le matin soient desfait,
 Car il l'ont bien par droit mesfait.
 Dist Leander : « Se Dius me gart,
 Ne falseroie vostre esgart 11924
 Por demi l'avoir de Baudas.
 — Droit avez, dist Meliadas. »
 A tant furent li traïtor
 Enserré dedens une tor. 11928
 Et la dame a Percheval vint,
 Qui li fait quanque il li covint
 A faire a chevalier blechié ;
 Le hiaume li a deslacié, 11932
 Et li haubers li fu ostez,
 Et les plaies de ses costez
 Li levent et hostent le sanc,
 Bendé l'ont d'un dyaspre blanc 11936
 Que la dame a d'un esclin trait ;
 En ses plaies ont mis entrait,
 Et si l'oignent d'un oignement
 Molt soëf et molt dolcement, 11940
 Et puis l'acolcent de rechief.
 Et Leander jure son chief
 Que mar en sera esmaris,
 Que devant ce qu'il ert garis 11944
 Ne se combateront ensamble.
 Et dist Perchevaus : « Ce me samble
 Que mal m'avez covent tenu.
 Se Dieus ne m'eüst securu 11948
 Et cis menestreus qu'il ont mort,

Dont pitiez me point et remort,
 Il m'eüssent ou mort ou pris,
 Qu'en dormant m'eüssent sozpris ; 11952
 Mais li menestreus m'esveilla,
 Qui mes armes m'apareilla
 Et m'aida molt bien d'une hache.
 Il est bien raisons que on hache 11956
 Chiaus qui l'ont mort sifaitement. »
 Dist Leander : « Bon jugement
 En prendrai, bien le sachiez. »
 Les traïtors ont fors sachiez 11960
 De la chambre, qui furent mort,
 Et par un liu vilain et ort
 Les ont fait traïner, et puis
 Les ont fait jecter en un puis. 11964
 Et li menestreus par matin
 Fu portez a saint Augustin,
 La li font faire son service ;
 En un sarchu et bel et riche 11968
 Font le cors metre et enserrer,
 Hautement le font honorer
 Et escrire desor la lame
 Que Jesus Cris ait la soie ame, 11972
 C'on doit toz menestreus amer
 Por celui. Dieu qui terre et mer
 Estora doint honor a ceus
 Ki onorent les menestreus. 11976
 Après la messe fist esprendre
 Leander un fu et fist prendre
 Les cinc traïtors et ardoir,
 Et puis furent bani lor oir 11980
 De sa terre .mais a toz jors.
 Perchevaus fist laiens seiors

- Tant que li mois fu toz passez
 Qu'il fu garis et respassez. 11984
 Dont dist Leander que sanz faille
 Velt recomenchier la bataille,
 Por nule rien ne le lairoit.
 Perchevaus dist qu'il ameroit 11988
 Molt mius la pais, s'estre peüst,
 Que plus bataille n'i eüst.
 Dist Leander : « Quant me remort
 De mon pere que avez mort, 11992
 Dont me bout li sanz et fremist. »
 La moillier Leander se mist
 A jenoillons par devant lui.
 « Gentius hom, pardone celui 11996
 La mort ton pere sanz debate.
 C'est trop grans dolors quant combatre
 Covient deus preudomes ensamble.
 Paor ai, s'il a vous assamble, 12000
 Que li offres qu'il vous denombre
 De l'amender ne vous encombre.
 C'est une chose par covent
 Que on voit avenir sovent 12004
 Que cil qui les offres desdaignent
 Sont cil qui en la fin s'en plaignent.
 On doit celui tenir a preu
 Que, quant on li offre son preu 12008
 Et s'onor, et il le rechoit. »
 Leander tres bien aperchoit
 Que sa moillier le dist por bien,
 Mais por li n'en velt faire rien, 12012
 Ainz s'est armez et Perchevaus,
 Puis sont monté sor les chevaus,
 Si sont venu en mi la cort,

- Et toz li mondes i acort 12016
 Por la bataille regarder.
 Cil qui doivent le champ garder
 Les ont fait entor arengier,
 Et as deus bastons sanz targier 12020
 Ont a droit parti le soleil.
 Li fuis au Chevalier Vermeil
 Desfie Percheval errant,
 Puis broche le cheval corant 12024
 Qui plus tost cort, quant il s'eslesse,
 Que uns levriers quant ist de lesse
 Et il a le lievre acueilli.
 Perchevaus le sien esqueilli 12028
 Qui tost des esperons l'argüe.
 Chascuns brandi la lance agüe,
 Si se fierent en mi les pis,
 Les archons eüssent guerpis, 12032
 Mais il ont brisies les lances
 Qui estoient beles et blanches ;
 Et tantost qu'eles furent fraites
 Dont furent les espees traites, 12036
 Si se fierent par tel aïr
 Que il font les pieches chaïr
 Des escus, toz les eschantelent ;
 Sor les hiaumés si fort martelent 12040
 Que les pieces en abatirent.
 Si longuement se combatirent
 Qu'il n'i a celui qui seüst
 Liquels d'aus deus vaintre peüst. 12044
 Mais en la fin tant le debat
 Perchevaus qu'a terre l'abat ;
 Sor lui descent, sore li cort,
 Si le tient si ferm et si cort 12048

Que Leander ne se remuet
 Nient plus c'uns perrons qu'il ne puet.
 Perchevaus l'elme li esrache
 Et la ventaille li deslace, 12052
 Le coliere li a colpee
 Et puis le trenchant de l'espee
 Li met sor le col en travers.
 Leander, qui gist toz envers, 12056
 Voit bien et set qu'il ert ocis
 S'il ne prie celui merchis,
 Mais il quide bien entresait
 Que cil nule merchi n'en ait, 12060
 Puis dist : « Dius pere ! que ferai ?
 Par mon chief anchois sofferai
 Qu'il m'ochie, bien le creant,
 Que je me claime recreant. » 12064
 Après dist : « Mius me vient rover
 Merchi, se je le puis trover,
 Qu'a morir, car, se iere mort,
 Il n'a nul recovrier en mort ; 12068
 Dont mius me vient crier merchis
 Et estre outrez que estre ochis. »
 Lors joint ses mains, plus ne detrie,
 Merchi requiert et si otrie 12072
 Qu'il est et matez et vencus :
 « Biaux dols sire, a vous m'en acus,
 Mais ore aiez merchi de mi.
 Tenu vous ai por anemi, 12076
 Mais, se merchi avez de moi,
 Je vous creant en bonè foi
 Que vostres serai, bien m'en vant,
 Bons et loiaus d'ore en avant 12080
 Et aiderai, sachiez de voir,

- Se vous volez merchi avoir. »
 Dist Perchevaus : « Vous et vo frere
 Pardonez moi la mort vo pere ? 12084
 — Voire, ce respont Leander.
 — Par mon chief, ce dist Evander,
 Sachiez bien que je me recort,
 Que n'ai talent qu'a lui m'acort. 12088
 Assez vous em poez debatre,
 Ainz vous covient a moi combatre,
 Que ja plus n'i demoerrez ;
 Ou je morrai ou vous morrez, 12092
 Que ja jor a vous pais n'arai. »
 Dist Perchevaus : « Et j'ochirrai
 Vostre frere, se Dieus me saut. »
 Quant la dame l'ot, avant saut, 12096
 Qu'ele n'atent ne plus ne mains,
 A genols et a jointes mains
 S'est par devant Evander mise,
 De plorer s'est auques demise, 12100
 En haut s'escrie a hautes vois :
 « Ha ! Evander, frere, tu vois
 Ton frere en peril de morir.
 Bien devroies du sens marir, 12104
 Se tu li vois le chief colper
 Et tu le pués faire eschaper,
 Se tu vels, sanz mort rechevoir »
 Dist Marmadus : « Por nul avoir 12108
 Ne sofferoie je l'acorde,
 Ainz me lairoie a une corde
 Pendre et sachier a un windas.
 — Frere, ce dist Meliadas, 12112
 Por Dieu or ne soiez si dur.
 Ne quidiez vous que je endure

Ausi a malaise cest fais
 Con vous ? Si m'aït Dieus, si fais ; 12116
 Mais nous avons perdu no pere,
 Et se nous reperdons no frere
 Dont nous ira de mal en pis.
 Mius volroie le cuer del pis 12120
 Avoir sachié que Leander
 Fust mors. Biaus dols frere Evander,
 Aiez de no frere merchi
 Et de ma dame qui est chi. 12124
 De deus maus, che ai oï dire,
 Doit on le mains malvais eslire.
 Biaus dols frere, volriiez vous
 Que nos frere, l'aisnez de nous, 12128
 Fust ocis si vilainement
 Et vous preïssiez venjement
 De celui qui che aroit fait ?
 Je le tenroie a grant mesfait. 12132
 Neporquant vous ne savez mie
 Se vous as cops de l'escremie
 Le porriez vaintre ne conquerre.
 On ne savoit en nule terre 12136
 Si bon chevalier, ne si preu,
 Con nostre frere ert. Nostre preu
 Ferons, je croi, de l'acorder.
 Sovent ai oï recorder 12140
 Que mius valt folie laissie
 Que maintenue ne hauchie. »
 Tant a Meliadas parlé
 Que si doi frere ont otroié 12144
 Que a sa volenté feront,
 Ja a nul fuer ne sofferront
 Que lor freres perde la vie.

La dame qui fu eschavie	12148
Les encline du chief parfont.	
Or oiez que li frere font :	
Il sont a Percheval venu	
Qui le trenchant de son brant nu	12152
Tint sor le col de Leander.	
« Sire vassal, dist Evander,	
Aiez de no frere merci,	
Et nous, frere qui somes chi,	12156
Envers vous nous acorderons	
Et les prisons vous renderons	
Que nous avons en prison mis,	
Et si serez nos bons amis	12160
Des ore en avant sanz haïne,	
Si vous amerons d'amour fine. »	
Dist Perchevaus : « Et je l'otroi,	
Mais vous le plevirez tot troi	12164
Que vous tenrez les covenances. »	
Dont font li frere les fiances .	
Et Leander tot ensement.	
Quant fait furent li sairement	12168
Les armes ostent, si se baisent ;	
Acordé sont et puis s'aaisent	
De che que il lor est mestiers.	
Et Perchevaus endementiers	12172
A fait les prisons traire fors	
De la prison qui molt ert fors.	
Bien quident li prison en fin	
Que on les menast a lor fin,	12176
Si pleurent et tordent lor mains ;	
Mais onques me sire Gavains	
Por nul pooir ne s'esfrea.	
Et tantost que Perceval a	12180

Veü, si le cort acoler
 Et comence a lui a parler,
 Se li conte con bien apris
 Coment en la forest fu pris 12184
 Et puis au huchel amenez,
 Et coment fu emprisonnez :
 « Or sui fors de la prison trais,
 Si vous en ai les mos retrais, 12188
 De moi fera son bon li sire,
 Du delivrer ou de l'ocirre ;
 Mais coment que praigne de nous,
 Molt par ai grant pitié de vous, 12192
 Que molt doit bien dolor avoir
 Qui son ami voit recevoir
 La mort : ja soit che que je muire,
 Si me doit bien vostre mors nuire ; 12196
 Et sachiez bien, se Dieus me voie,
 Se je certainement savoie
 Qu'a joie en peüssiez partir,
 Par saint Leurent le vrai martir, 12200
 La mort, sachiez tot vraiment,
 Passerai plus legierement.
 — Me sire Gavains, biaux amis,
 Dist Perchevaus, vous estes mis 12204
 Fors de prison et delivrez,
 Et tant con Dieu plaira vivrez,
 Et tot li prison que voi chi
 Sont delivré, la Dieu merchi. » 12208
 Lors li a le voir descovert
 Coment le huchel ot overt
 Et coment tot li quatre frere
 Avoient reconnut lor pere 12212
 « Que je ochis d'un gavelot. »

Et quant me sire Gavains l'ot,
 Qu'il li a les mos recorderz,
 Que il est as freres acordez, 12216
 Joie en ot grant, ainc n'ot greignor.
 Chil del chastel ont lor seignor
 Pris a tot le huchel d'ivoire.
 Ce dist l'estoire qui est voire 12220
 Qu'il fu portez a saint Brandain ;
 Onques a Blaives por Audain
 N'ot tel doel fait, ce puis jurer,
 Come il ot a lui enterrer 12224
 De ses fius et de ses amis.
 Quant li cors fu en terre mis
 Si sont el palais retorné ;
 Le mengier orent atorné 12228
 Li keu qui bien le sorent faire.
 Tant vous sai dire de l'afaire
 Qu'après tot doel covient mengier.
 Lor mains levent sanz atargier 12232
 Li chevalier et li baron :
 Par le palais tot environ
 S'asieent amont et aval.
 Li frere honeurent Percheval 12236
 Tant come il püent et Gavain.
 L'un et l'autre ont pris par le main,
 Si les ont al haut dois assis,
 Si orent mes ou cinc ou sis 12240
 Pleniers et s'ont maint entremés.
 Et quant il fu et tans et mes
 D'oster les tables, si les ostent.
 Et li quatre frere s'acostent 12244
 Les Percheval et les Gavain,
 Molt lor priënt, mais c'est en vain,

De sejourner et de deduire :
 Il feront les autres conduire 12248
 Si lonc come la terre estent.
 Perchevaus, quant les mos entent,
 A dit que sejourner ne puet.
 Gavains a dit qu'il li estuet 12252
 Au Pui de Montesclaire aler
 Por la pucele delivrer.
 Quant Leander Gavain entent
 De respondre ne fu pas lent, 12256
 Ainz dist que la pucele avoit
 Bone pais, mail il ne savoit
 Qui chil est qui avoit conquis
 Celui au Dragon et ochis. 12260
 Perchevaus les mos escouta,
 Si rougi, mais pas n'aconta
 Que il eüst celui venchu
 Qui portoit dedens son eschu 12264
 La teste au dragon qui getoit
 Le fu dont mains preudom estoit
 Ars et peris ; s'il le contast,
 Il quide bien qu'il se vantast, 12268
 S'a plus chier a taire que dire
 Chose qui tornast a mesdire,
 Qu'il n'a cure de lui vanter ;
 Ains lor comencha a conter 12272
 Que c'est grans doels et grans damages,
 Quant uns hom plains de vasselages
 Laisse sa foi et sa creanche,
 Puis a en l'anemi fiance 12276
 Qu'il li puist aidier et valoir.
 L'anemis n'a onques voloir
 Fors a engignier et sozprendre

- La gent qu'a pechié les puist prendre ; 12280
 A l'anemi acompaignier
 Ne puet onques nus gaaignier,
 Mais qui Dieu aime de cuer fin
 Ne puet falir a bone fin : 12284
 « Mais or laissons cest plait ester
 Et si nous faites aprester
 Et nos armes et nos chevaus. »
 On lor aporte et Perchevaus 12288
 S'arma et Gavains ensement,
 Et li autre comunement
 Que Perchevaus ot delivrez.
 Lor chevaus orent amenez 12292
 Li escuier qui s'entremetent
 De servir et les seles metent.
 Et Gavains et Perchevaus monte
 Et li autre, car che amonte 12296
 A gent qui jornee ont a faire.
 Chascuns atorne son affaire,
 Si sont du chastel avalé.
 Li quatre frere sont alé ° 12300
 Monter, qui les ont convoiez
 Et au grant chemin avoiez
 Qui va vers la haute forest.
 Tant ont chevalchié sanz arest 12304
 Qu'il sont a l'entree venu.
 Lors est Percheval sovenu
 Du Graal et de son escu,
 Dont ot molt le cuer irascu 12308
 Quant ne set la senefiance
 Ne du Graal ne de la Lance
 Qui par la pointe du fer blanc
 Rent et saine tot adés sanc. 12312

Mais il a tres bien en porpos
 Que ja mais jor n'ert a repos
 Deus pres a pres, ainz le sara,
 Et que il son escu rara, 12316
 Mais qu'il soit delivres et sains ;
 A Dieu le voe et a toz sains.
 Lors s'est Perchevaus arestez,
 Car deus chemins trova entez 12320
 Ou une crois de pierre avoit.
 Perchevaus, quant les chemins voit,
 S'est arestez un seul petit,
 A mon seignor Gavain a dit : 12324
 « Biaus sire, fait il, ore alez
 Lequel chemin que vous volez,
 Que je wel qu'il soit a vo cois. »
 Gavains pensa et si fu cois, 12328
 Puis si a dit : « Biaus dols amis,
 Quant vous m'en avez a cois mis,
 Si m'aït Dius, se je savoie
 Eslire le plus droite voie 12332
 Qu'alasť al Pui de Montesclaire,
 Foi que je doi a saint Acaire,
 Je l'esliroie volentiers. »
 Et dist Leander : « Chist sentiers 12336
 A senestre vous i menra
 Tot droitement, ja n'i falra,
 Par encoste ceste montaigne ;
 Ceste en mi lieu va en Bretagne, 12340
 C'est des trois chemins li plus sals,
 Mains de perieus et mains d'axaus
 I a qu'en cel chemin a destre.
 Foi que doi Deu qui me fist estre 12344
 Et fera tant con lui plera,

Ainc chevaliers n'en repera
Qui cel chemin volsist aler,
Ne je n'oï onques parler 12348
De nului qui en retornast
Qu'a grant honte ne li tornast
Et a grant anui de son cors. »
Dist Perchevaus : « Toz mes recors 12352
Est de tenir la destre voie
Tant que je sache et que je voie
Por coi nus n'en puet retorner.
Nus ne m'en porroit destorner 12356
Qu'a destre le voie ne tiegne. »
Dist Gavains : « Et Dius vous soztiegne
Et desfende de toz anuis !
Or errons ançois qu'il soit nuis. 12360
Et Dius maint chascun en tel terre
Ou il puist Dieu et pris conquerre
Et trover che que plus desirre !
— Dius vous en oie, biaux dols sire, 12364
Dist Perchevaus, par sa douchor ! »
Lors s'escria a vois hautor :
« Seignor, a Dieu. » A tant les laisse,
Le chemin a destre s'eslesse, 12368
Et Gavains a senestre part,
Qui des chevaliers se depart
Qui en mi lieu ont pris lor voie.
Leander plus ne les convoie, 12372
Car priez est de remanoir,
Si s'en retourne a son manoir,
Et si frere avec lui ensamble.
Un poi s'areste, ce me samble, 12376
Li contes chi de Percheval
Et de la Lance et du Graal,

Si vous raconte une aventure
De Gavain qui molt li fu dure. 12380

Me sire Gavains s'achemine,
Desor le Gringalet ne fine
D'errer, molt vait a grant exploit ;
Empensé a que bien exploit 12384
Sa paine et sa voie et ses pas.

Tant erra qu'il trove un trespas
D'un gué anieus et felon,
Si ot tendu un paveillon 12388

Sor la riviere en mi le pré ;
Aukes estoit ja avespré.
Quant vit le tref qui tant ert gens,
Gavains pense qu'il i a gens ; 12392

Cele part est venus errant.
Dui vallet vinrent acorant,
Qui sont tantost issu del tref,
Dolcement et bel et soëf 12396

Mon seignor Gavain salüerent
Et bonement li presenterent
L'ostel de par lor damoisele
Qui est el tref, gentius et bele, 12400

Que nus hom ne se puet garder,
Qui le voit, de li regarder.
Gavains lor salus lor rendi,
Qui belement lor respondi 12404

Qu'il avoit bien d'ostel mestier
Que pres estoit de l'anuitier,
« Ne je ne sai aillors ou traire ».
Hé ! Dius, s'il seüst le contraire 12408

Qu'il li porchacent a avoir
N'i heberjast por nul avoir ;

Mais tot che qui avenir doit
 Avient. Gavains, qui bien quidoit 12412
 Estre hostelez, est descendus
 Devant le tref qui fu tendus.
 L'uns des vallés a tant se lance,
 Si prent son escu et sa lance, 12416
 Et l'autres a son cheval pris.
 Malement estera sozpris
 Me sire Gavains cele fois,
 Se Dieus ne li aïue et fois. 12420
 Son elme de son chief desnue ;
 La dame est contre lui venue,
 Qui molt dolcement le bienviégne.
 « A foi, bone aventure aviegne, 12424
 Dist me sire Gavains, ma dame ;
 Bien puis dire por voir, par m'ame,
 C'onques mais si bele ne vi
 Con vous estes, par saint Davi, 12428
 S'en ai veü plus d'un millier ;
 Certes, por vostre chevalier
 Me poez d'ore en avant prendre. »
 Et cele por lui plus espandre 12432
 Et eschaufer de musardie ;
 « Sire, ne lairai ne vous die,
 Onques nul jor ne m'entremis
 D'amours. Je ne sai qu'est amis, 12436
 Ne je nel quier nul jor savoir,
 N'en moi n'a pas tant de savoir
 Ke chevalier amer seüsse ;
 Et neporquant, se je deüsse 12440
 A nul home doner m'amor,
 Vous l'avriiez tot sanz demour
 Tant vous voi bel et avenant ;

- Et neporquant par covenant 12444
 Arez m'amour a vostre cois,
 Mais qu'anuit mais gerrez toz cois
 Lez mon costé en mon lit nus,
 Et quant li jors sera venus 12448
 Si porrez de moi vo bon faire
 Et vostre cors du mien refaire ;
 Et se le cuer avez si tendre
 Que le jor ne weilliez atendre 12452
 Que vo bon de moi ne fachiez,
 Certainement de voir sachiez
 Que jamais n'i recoverrez.
 Or parra coment overrez, 12456
 Car a vostre cois est du prendre. »
 Gavains comencha a esprendre
 Et plus et plus quant il l'entent.
 Ce poise lui quant tant atent 12460
 Et molt li tarde li couchiers ;
 Mais molt li sera vendus chiers
 Cil deduis, se Dieus ne l'en garde ;
 Mais quant plus la dame regarde 12464
 Plus l'esprent Amours et alume.
 Cele qui bien set la costume
 D'engignier home et de sozprendre
 Le regarde por mieus esprendre 12468
 En sozpirant, puis li a dit :
 « Sire, ore ostez sans contredit
 Vos armes, tanz est de souper ;
 N'i arez compaignon ne per 12472
 Fors moi et deus cousins germains
 Que chi veez ; ne plus ne mains,
 N'ai de maisnie, ce sachiez. »
 Lors ont ses garnemens sachiez 12476

Li doi vallet et desarmé
 Ont Gavain, et puis acesmé
 D'un sciglaton et bel et chier.
 Mais il amast mius le couchier 12480
 Avec la bele, per a per,
 Que il ne feïst le souper.
 Et mains hom de tel chose coïte
 A faire qui son mal covoitte ; 12484
 Einsi fait me sire Gavains,
 Que si forment le tient li ains
 D'Amours qui par mi l'ueil l'a pris
 Qu'il est si durement espris 12488
 Que il ne puet la prise estraindre,
 Ne il ne quida ja ataindre
 Son desir ne sa volenté.
 A souper orent a plenté, 12492
 Que cele por lui dechevoir
 De quanques onques pot avoir
 Le sert, et por che que li plaise
 A entremés l'acole et baise. 12496
 Mais, se Dieus li vrais rois n'en pense,
 Gavains metera en despense
 Folement son cors et sa vie,
 Car cele qui n'avoit envie 12500
 Fors de gent sozduire et traïr
 Li dist : « Sire, ja mais haïr
 Ne vous porrai por nul afaire.
 Demain porrez vostre bon faire 12504
 De moi, coi que soit ore anuit,
 Et je proi qu'il ne vous anuit
 Qu'anuit mais vous en sofferrez ;
 Et le matin vos bons ferez 12508
 De moi et tot vostre delit.

Ore alez couchier en cel lit,
 Car il en est huimais bien tans,
 Ne ja mar en serez doutans 12512
 Que g'irai avec vous gesir. »
 Gavains, qui fu en grant desir
 Qu'ele jeüst nue a son lez,
 Un des vallés a apelez. 12516
 Cil aqueurt et si le descauce,
 Ostez li a sollers et chauce.
 A tant es vous l'autre meschin,
 Se li aporte en un bachin 12520
 Aigue caude a ses piez laver.
 Li vallet ne sont pas aver
 Del servir por mius decevoir.
 Dieus ! se Gavains seüst le voir 12524
 De la paine qu'il en atent,
 Molt deüst metre grant content
 A destorner sifaite amour.
 La damoisele sanz demour 12528
 Li quiert qu'il li die son non.
 « Dame, Gavain m'apele l'on,
 Niez roi Artu, fius le roi Loth. »
 Et quant la damoisele l'ot, 12532
 Ses deus bras li a au col mis,
 Puis dist : « Gavains, biaux dols amis,
 Longuement vous ai attendu,
 Por vous ai chi mon tref tendu 12536
 Por atendre vostre venue,
 Ore est si la chose avenue
 Que venus estes, Dieu merchi.
 Ainz que vous departez de chi, 12540
 Ferez de moi vostre plaisir,
 Que de rien n'avoie desir

Fors vous tenir a mon vōloir.
 Riens ne me puet jamais doloir 12544
 Se nu a nu vous puis sentir. »
 Molt par est large de mentir
 Cele qui pense grant contraire,
 Que Gavain fera la mort traire, 12548
 Se ele puet, el ne desire.
 « Car vous alez couchier, biaux sire,
 En mon lit sor bons dras de soie,
 Tart m'est qu'o vous couchie soie. » 12552
 A tant Gavains vint vers le lit,
 Qui molt golouse le delit
 De cheli qu'il quidoit amie.
 Mais c'est sa morteus anemie, 12556
 Car Gavains ocis li avoit
 Un sien frere, mais ne savoit
 Que vers li fust mesfais de rien ;
 Mais la pucele le set bien 12560
 Qui du couchier molt le hasta.
 Et me sire Gavains osta
 Sorcot et cote, el lit s'est mis ;
 Mais, se Dieus ne li est amis, 12564
 Ja mais del lit ne levera.
 Devant che que il avera
 Le morsel de la mort rechet,
 Car cele qui avoit dechet 12568
 Maint home et livré a martyre
 Avoit adez par majestire
 Un coutel en son lit muchié.
 Quant ele a avec li couchié 12572
 Chevalier qui son buen velt faire,
 Cele qui est de mal affaire
 Et set tant de malvais argu

Prent tantost le coutel agu, 12576
 Si le boute celui el cors.
 Bien en a vint, c'est mes recors,
 Ocis en sifaite maniere.
 Del ocirre est si tres maniere 12580
 Que le pechié ne doute point.
 Ore est, ce dist, venue a point
 De vengier la mort de son frere,
 Puis ira au chastel son pere, 12584
 Qui est en la forest estraigne
 C'on apele Irouse Montaigne ;
 Et tot acostumeement
 Vient droit a l'ajornement 12588
 Doi sien frere tout acesmé
 Sor les chevaus molt bien armé
 Dedens le tref ou lor suer est,
 De li aidier sont adés prest, 12592
 Quant voient qu'ele en a mestier ;
 Usé sont de sifait mestier.
 Mais quant Gavain ocis avra,
 Li tres lués destendus sera, 12596
 Que mais n'i ara tref ne tente.
 Gavains, qui estoit en atente
 Que la dame couchier venist
 Et que il a li avenist, 12600
 Molt li tarde qu'ele ne vient,
 Et lors maintenant li sovient
 De lui saignier. A tant se saigne,
 De la crois fist sor lui ensaigne 12604
 El non de Dieu le roi celestre ;
 Mais quant sa main a mis a destre,
 Si senti del coutel la pointe
 Que par desoz le coute pointe 12608

Avoit la pucele muchié.
 Gavains, quant ill a atouchié
 Del coutel la pointe amouree,
 Tot maintenant sanz demoree 12612
 Lieve le queute, si l'a pris,
 Come sages et bien apris
 Le boute desoz un forgier
 Et maldist qui le fist forgier, 12616
 C'onques por nul bien n'i fu mis.
 « Traiez vous cha, biaux dols amis, »
 Fait cele qui lez lui s'est mise,
 Nue et en pure sa chemise ; 12620
 Et li vallet issent del tref.
 Et me sire Gavains soëf
 Prist la pucele entre ses bras,
 Et cele boute soz les dras 12624
 Sa main, le coutel quide prendre ;
 Mais par tans li volra aprendre
 Gavains, s'il puet, le ju d'Amours.
 Cele qui fu de males mours, 12628
 Quant ne puet le coutel trover,
 Cuide erranment de doel crever ;
 Ele ne set qu'ele puist faire.
 Gavains, qui pense a son affaire, 12632
 Desoz lui a force le met
 Et del ju faire s'entremet
 Que on fait as dames c'on aime,
 Et cele dolante se claime, 12636
 Que pas desfendre ne se puet.
 Weille ou non, sosfrir li estuet
 Le ju de mon seignor Gavain.
 La dame, qui le cuer ot vain, 12640
 Dist : « A foi, c'est ore a bon droit

S'il m'est mèscheü orendroit ;
 Tele en est ore ma cheanche,
 Porchacié ai ma mesestanche. 12644
 Or puis je tres bien aperchoivre
 Que cil qui autrui velt dechoivre
 Que li maus doit sor lui venir,
 Et ce m'estoit a avenir 12648
 Que molt m'est vilains et honteus
 Quant uns miens anemis morteus
 A jut a moi et esforchie.
 Voir mius volsisse estre escorchie, 12652
 Car un mien frere ocist germain,
 Et je le quidai de ma main
 Par traïson anuit vengier ;
 Mais or puis je par droit jugier 12656
 Que qui altrui velt dechevoir
 Il doit bien le mal recevoir :
 Je l'ai rechut, ce poise mi. »
 Lors sozpire et pleure et gemi 12660
 Et se plaint forment et demente,
 Puis dist : « Sire, ne sai qu'en mente :
 Levez tost sus ou ja morrez.
 Armez vous, plus n'i demorez, 12664
 Car mi cousin venront ja chi
 Qui ja n'aront de vous merchi,
 Ainz vous ocirront demanois.
 Encor m'avez vous fait anois 12668
 Et de mon frere et de mon cors,
 Ne weil je pas, c'est mes acors,
 Que vous soiez mors ne peris ;
 Ausi m'aït sains Esperis, 12672
 Je volsisse bien qu'au couchier
 Vous peüsse le cuer sachier

De vostre ventre a mes deus mains. »
 A tant es ses cousins germains 12676
 Qui dedens le tref sont venu.
 Li uns tint le brant d'acier nu,
 Et l'autres tenoit un falsart.
 Vengier welent Brun de l'Essart 12680
 De Gavain qui ocis l'avoit ;
 Un grant tortin de coi cler voit
 Tint chascuns en sa main espris.
 Quant Gavains les voit, si a pris 12684
 Le coutel qu'il avoit repus,
 Puis dist : « Rompus est li festus
 Entre moi et ces, ce me samble ;
 Se cis premiers a moi assamble, 12688
 De legier me porra porfendre
 Que je ne m'ai de coi deffendre
 Fors de cest coutel que j'ai chi ;
 Mais, se Dieus ait de moi merci, 12692
 Coment qu'il en aviegne après,
 Ainçois que me viegne plus prez.
 Lancerai le coutel avant
 A celui qui vient tot devant. » 12696
 Cil qui devant vient son cop esme
 Et de Gavain ferir s'acesme,
 Le brant encontre mont estent.
 Et me sire Gavains destent 12700
 Le coutel, plus n'a arestu,
 Et giete de si grant vertu
 Celui en fiert soz la mamele
 Si fort que tote l'alemele 12704
 Par le cors dedens li embat ;
 Le cuer li trenche, mort l'abat,
 De la main li chaï l'espee ;

- Me sire Gavains l'a hapee 12708
 Molt tost et molt delivrement.
 Et l'autre vallés erranment
 Li a le fausart adrechié,
 Sel fiert si qu'il li a trenchié 12712
 Le cuir et la char sor la coste.
 Ainchois que cil le falsart oste
 Le feri Gavains de l'espee
 Que la hanste li a colpee 12716
 Du falsart a tot le poing destre.
 Cil s'en fuit, que plus n'i ose estre
 Quant il se senti affolez.
 « Ha ! dols amis, or m'acolez, 12720
 Fait la damoisele a Gavain,
 Vostre amours m'a si pris a l'ain
 Que ja mais n'i avra haïne,
 Ainz arez m'amour enterine. » 12724
 A icest mot la blanche tendre,
 Tot maintenant sanz plus attendre,
 A Gavain le falsart osté,
 Et puis li bende le costé 12728
 D'une guimpe, et quant bendé l'ot,
 Gavains, qui fu fius al roi Loth,
 L'acole et estraint pres de soi.
 Sachiez qu'il n'a ne fain ne soi, 12732
 Ainz est auques a son talent ;
 Oublié sont li maltalent
 Qui par devant orent esté ;
 Se toz li plus lons jors d'esté 12736
 Fust nuis et si recomenchast,
 Ja de che ne se correchast
 Gavains, ne ele, au mien avis ;
 Bouche a bouche, vis contre vis, 12740

Furent dolcement embrachié ;
 En un prael par amistié
 Se dorment un petitelet.
 Or vous conterai du vallet 12744
 Qui le poing destre avoit trenchié.
 Tant a corut et tant trachié
 Qu'il est en la forest entrez,
 Les deus freres a encontrez 12748
 Qui sont armé sor les destriers,
 Afichié sont sor les estriers ;
 Et cil tantost les aresta
 Et tot erranment lor conta 12752
 Que Gavains avec lor suer gist,
 Qui son frere orains li ochist :
 « Moi a le destre poing colpé. »
 Quant cil l'oent, s'ont doel mené, 12756
 Plain sont de mautalent et d'ire
 Qu'a paines püent un mot dire
 Fors tant que dient : « Revois nous,
 Que par le foi que je doi vous, 12760
 Dist li aisnez, se je le truis,
 A grant dolor sera destruis.
 Mar acointa la grant biauté
 De no seror, a foleté 12764
 Li tenra quant a li coucha
 Ne che que a li atoucha ;
 Mais biauté de feme a maint home
 Trahi et dechut, c'est la some, 12768
 Si me merveil, par saint Baudri,
 Quant du coutel ne l'a murdri,
 Mais je croi qu'ele s'asenti
 A che que son bon consenti, 12772
 Si a eü de lui pitié,

Por che l'a de mort respitié.
 Mais brief en seront li respit.
 Molt nous a or en grant despit 12776
 Qui od no serour est couchiez,
 Et si nous a tant correciez
 Que no frere a mort de sa main
 Et un nostre cousin germain, 12780
 Et por le menre des mesfais
 Doit bien estre mors et desfais. »
 A tant sont cil es galos mis.
 Et Gavains qui fu endormis 12784
 Sonja. En une avision
 Li fu avis que doi lion
 A un pas devant li saloient
 Qui molt durement l'assaloient 12788
 Por lui ocirre et devorer,
 Mais il sanz plus de demorer
 Feroit l'un de son glaive el cors
 Si qu'il chaï devant lui mors. 12792
 Gavains tressaut et si s'esveille,
 La damoisele s'esmerveille
 Quant ele sent que il tressaut,
 Si dist : « Sire, se Dius me saut, 12796
 Je vous lo bien que vous armés,
 Se vous de rien vo cors amez,
 Car mi doi frere ja verront.
 S'il püent, il vous ocirront. » 12800
 Quant me sire Gavains entent
 La damoisele, plus n'atent,
 Ainz est vestus et acesmez.
 A paines se fu il armés 12804
 Et montez sor le Gringalet,
 Quant li doi frere od le vallet

- Vinrent poignant par grant desroi ;
 A Gavain le neveu le roi 12808
 Artu criënt : « Qui vous conduit ?
 Mar acointastes le deduit
 De no seror, vous estes pris. »
 Gavains qui auques fu sozpris 12812
 N'ot pas encor le hiaume el chief,
 Et se li torne a grant meschief
 Quant n'a pris l'escu et la lance.
 La dame fors del lit se lance 12816
 En chemise et en mantel nue,
 Contre ses freres est venue,
 Si s'ajenoille devant eus :
 « Merchi, seignor, ce sera deus 12820
 Se sifais cors de chevalier
 Est mors, moi dist que a moillier
 Prendera debonairement
 Par pais et par amaisnement. 12824
 — Voire, dist Gavains, volentiers,
 Et servirai trois ans entiers
 Outre mer, por l'ame vo frere.
 Et se je sui vers vous offerre, 12828
 Ne le tenez mie a despit,
 Si aie je de mort respit.
 Se autant mesfait m'aviiez
 Con je vous ai, et voliiez 12832
 Faire autānt con vous ai offert,
 De ma part seroit bien sosfert,
 Se le looient mi ami.
 Vengiez est de sen anemi 12836
 Molt bien qui oltre mer l'envoie :
 Molt i a perilleuse voie.
 Prenés l'amende, ç'est assez.

- Se vous cest offre refusez, 12840
 Che dist lor suer, au departir,
 En venrez tart au repentir. »
 Cil jurent la mort et les plaies
 N'en prendront acorde ne paies. 12844
 La dame l'ot, d'air esprent,
 Ses deus freres par les frains prent,
 Si les tient molt ferm et molt fort,
 Et Gavains a son elme court, 12848
 Si l'atache, et prent son escu
 Et sa lance, dont irascu
 Sont li doi frere durement ;
 Tant furent plain d'aïrement, 12852
 K'a poi que les mains ne li trenchent.
 Forment le laidient et tenchent.
 Voirs est que feme est feble chose,
 Contretenir plus ne les ose, 12856
 Ses mains oste et aler les laisse.
 Li aisnez vers Gavain s'eslaisse,
 Et Gavains vers lui sanz atendre.
 Quanques cheval püent estendre 12860
 S'entrevienent les frains baissiez ;
 Les escus ont frains et froissiez ;
 La lance au chevalier archoie,
 Tressi es poinz toute pechoie. 12864
 Gavains, li niez le roi Artu,
 Fiert le chevalier par vertu
 L'auberc li trenche et l'auqueton
 Qui par dedens fu de coton. 12868
 Arme qu'il ait nel puet deffendre
 Que ne li face par mi fendre
 Le cuer en deus, mort le sovine.
 L'autres freres fiert de ravine 12872

Gavain, que l'escu li percha,
 Del hauberc les mailles trencha,
 El costé li a le fer mis.
 La fu Dieus a Gavain amis, 12876
 Car li fers corut sor la coste.
 Et Gavains pres de lui s'acoste
 Qui a sa bone espee traite,
 Celui en fiert a le retraite 12880
 Grand cop vers la destre partie
 Si qu'il li a del cors partie
 L'espaule od le bras a l'espee,
 Tot rez a rez li a colpee 12884
 Si que le costé n'adesa.
 Cil s'en fuit qui tot adés a
 Maudite l'eure que la vint.
 Lors encontra chevaliers yint 12888
 Que lor peres lor envoioit,
 Car durement li anuioit
 Quant il n'estoient repairié.
 Molt sont cil dolant et irié 12892
 Quant il virent lor damoiseil
 Livré a si felon maisel,
 Et lor cousin qui a perdu
 Le poing, dont il sont irascu. 12896
 Cil qui sont navré sans targier
 Crïent : « Seignor, alez aidier
 Nos freres que Gavains a mors.
 Bien s'est a nous ocirre amors ; 12900
 Vez coment nous a atornez. »
 A tant s'en est chascuns tornez
 Droit vers le tref toz eslaissiez
 Et ont les deus navrez laissiez. 12904
 Clers fu li jors et esbaudis ;

- Li biaux, li sages, li hardis
 Gavains les voit venir le cors.
 « Dame, fait il, chis grans secors 12908
 Que je voi chi venir ensamble
 Ma conpaignie desassamble
 De la vostre, ce poise mi. »
 Cele l'ot, si pleure et gemi : 12912
 « Lasse, fait ele, durfeüe
 Con jou ai corte joie eüe
 De chest chevalier de valour,
 J'avoie oblié la dolour 12916
 De mes freres por sa proeche
 Et de mes cousins la tristeche,
 Si l'aim vraiment de mon cuer.
 Gavain amis, je vous requeur 12920
 Que se vous eschapez de chi,
 Que vous par le vostre merchi
 Gardez mon cuer, je le vous doinz,
 Car vous ne serés ja si loinz, 12924
 Que mes cuers avec vous ne soit.
 Se mes cors sivir vous osoit,
 Il vous sivroit molt volentiers. »
 Dist Gavains : « Et je toz entiers 12928
 Sui et serai a vo comant. »
 Dist cele : « Et je plus ne demant. »
 A tant Gavains, li dols, s'abaisse,
 La damoisele acole et baise ; 12932
 Son elme prent a relacier,
 Puis prent la lance au fer d'acier ;
 La dame a Jesu Crist comande.
 Et cil viennent par mi la lande 12936
 Criant a haute vois : « Mors estes ;
 Se vous aviez quarante testes,

N'en porteriiez la pior.
 Fols estes se n'avez paor ; 12940
 Chier acaterez vos solas,
 Quant cheüs estes en nos las. »
 A tant desrengent qui ainz ains,
 Et lors point me sire Gavains 12944
 Le Gringalet qui tost li saut.
 « Amie, fait il, Dieus vous saut !
 Je m'en vois, Dius soit de vous garde. »
 La damoisele le regarde, 12948
 Qui quide qu'il se mete a voie.
 Del cuer et des oeus le convoie
 Et prie Dieu qu'il le desfende
 De mort, et sain et sauf li rende 12952
 Et a li encor le ramaint ;
 Cele molt dolente remaint,
 Gavain escrie qu'il s'en aille.
 Mais ne se prise une maaille 12956
 Gavains qui ne daigne fuir,
 S'avra joste ; par grant air
 Point le Gringalet et argüe
 Des esperons, la lance agüe 12960
 Baisse et feri si le premier
 Desor l'escu paint a or mier
 Qu'il li perche et le hauberc false
 Que le fer et l'anste li sause 12964
 El sanc del cors en liu de soivre
 Que l'ame del cors li desoivre ;
 Cil chiet et Gavains s'en passe oltre,
 Sa lance brandist, puis rencontre 12968
 Un autre, si le fiert de plain
 Si qu'il s'abat en mi le plain
 Jambes levees el chemin ;

- Ja mais n'enchieriront li vin 12972
 Por lui por boire qu'il en fache,
 Torble et noire devint sa fache,
 Car le cuer a crevé par mi.
 Molt en sont li autre engrami, 12976
 De doel quident le sens marir ;
 Mais n'ont cure d'aus esmarir,
 Car ne sont pas coart ne vain.
 Li doi premier fierent Gavain 12980
 De lor lances par tel vertu
 Qu'a poi qu'il ne l'ont abatu.
 L'escu fors de son cors li tolent,
 Et li pié des estriers li volent. 12984
 Durement l'ont desaïvé,
 Li uns par le resne noé
 Le prent, qui molt fu de grant pris,
 Puis dist : « Vassal, vous estes pris ; 12988
 Ne m'eschaperez que je sache. »
 A tant Gavains s'espee sache,
 Qui trenchans est et amouree,
 Et fiert celui sanz demoree 12992
 Par mi le front a la traverse
 Que le cervele li reverse
 Sor l'erbe, a tout le hanepier. .
 Lors s'est Gavains mis al frapier 12996
 Quanques il puet vers la forest,
 Et chil l'enchaucent sanz arest,
 Mais il nel porroient ataindre,
 Car anchois feroient estraindre 13000
 Lor chevaux de cor après lui
 Qu'il ne crient ne doute nului ;
 Se ses chevaus soz lui ne chiet
 Ou autrement ne li meschiet, 13004

Nes doute une foille de cols ;
 Et li Gringalés les grans sols
 L'emporte par mi un haut bois.
 Cil qui n'ont cure de gabois 13008
 Retornent vers le tref arriere,
 Chascun mort i ont mis en biere
 Et le tref erramment destendent.
 A tant s'en vont que plus n'atendent, 13012
 Si en mainent lor damoisele
 Qui moillie avoit la maissele
 De lermes, car durement pleure.
 Li chevalier en icele eure 13016
 Cuident que por ses freres soit,
 Mais de Gavain plus li pesoit
 Por che que de li s'est partis ;
 A poi que ses cuers n'est partis 13020
 D'ire et de doel et de destreche ;
 Sovent se tyre par la treche,
 Car de courous art et esprent ;
 Par le gorge sovent se prent 13024
 Si fort qu'a poi qu'el ne s'estaint,
 Et par tout ou ele s'ataint
 Se desront, deschire et depiece ;
 Et quant ce vient al chief de piece 13028
 À morir sovënt se deveure ;
 La mort maldist que tant demeure
 Quant piecha ne l'a devoree ;
 Sovent s'est a morir voee, 13032
 Si sera ses grans doels passez.
 « Avoi ! dame, ne voüs pensez,
 Dient li baron qui l'ont chiere,
 Por coi blechiez vo bele chiere 13036
 Ne depechiez vos beles mains ?

Ja por che vos cousins germain
 Ne vo frere n'erent vengié.
 Vilainement a demachié 13040
 Vous et vo pere et vo lignage
 Chil qui vous a fait tel damache,
 Mais, s'il peüst estre tenus,
 A son juïse fust venus. 13044
 Mals destorbiers et maus anuis
 Li doinst Dius ainz que past la nuis. »
 Si fera il prochainement,
 Se Dius n'en pense proprement. 13048
 Cil s'en vont qui lor dame maintent
 Et qui molt grant dolor demainent
 Por les mors et por les navrez ;
 De grant dolor ont abevrez 13052
 Lor cuers qui sont et triste et noir.
 A tant en vont vers le manoir
 Urpin de la Montaigne Irouse,
 Qui chief ot noir et barbe rousse ; 13056
 Sa façon fu fiere et diverse.
 Gavains, qui s'en vait le traverse
 De la forest, a tant alé
 Qu'il a un grant val avalé ; 13060
 D'autre part sor un mont choisist
 Un fort chastel qui trop bien sist,
 Grans fossez avoit tout entor ;
 En mi liu avoit une tour 13064
 Molt bien faite et bien ordenee,
 Entor estoit avironnee
 D'escus de diverse fachon ;
 Molt furent sage li machon 13068
 Qui le fisent qu'engien ne doute.
 Gavains vers le chastel s'aroute,

Que de mengier ot grant talent ;
 Il ne chevalche mie lent, 13072
 Mais tost por exploitier sa voie ;
 Mais a son grant anui s'avoie,
 Se Jesus ne li est amis.
 Tant est de l'errer entremis 13076
 Qu'il est venus droit a la porte,
 Voit le seignor qui se deporté
 En un prael avec sa gent.
 Gavains a salué molt gent 13080
 Le seignor come bien apris ;
 Li sires qui fu de grant pris
 Molt belement li respondi
 Et son salu bel li rendi : 13084
 « Sire chevaliers, Dius vous gart !
 Il m'est avis a mon esgart
 Que vo cheval avez coitié :
 Vous li avez pres acointié 13088
 Vos esperons a ses costez ;
 De pres li avés acostez,
 Car je en voi le sanc issir ;
 Mais s'il vous venoit a plaisir, 13092
 L'ostel aréz et a disner
 Vous ferai volentiers doner,
 Car il est pres, si con je quit ;
 Li mes estoient presque cuit 13096
 Orains, quant deduire ving chi.
 — Sire, la vostre grant merchi,
 Dist Gavains, ou n'a que reprendre,
 Car je ai bien mestier du prendre. » 13100
 A tant Gavains li biaux descent.
 Plus avoit el chastel de cent
 Que chevaliers que damoiseles.

Quant ont oïes les noveles 13104
 Que chevalier i a venu,
 Molt en sont joiant devenu,
 Car desirrant sont d'escouter
 Les aventures et conter 13108
 Des chevaliers qui par la terre
 Passent por aventure querre,
 Que la costume tels estoit
 El chastel que chascuns contoit 13112
 Qui laiens venoit hebergier,
 Quant ce venoit après mengier,
 Que il acontoit s'aventure,
 Quels qu'ele fust, plaisanz ou dure, 13116
 Qu'il avoit encontré le jor,
 Et la nuit après a sejour
 Puet estre laiens sanz mesfaire.
 Mais, se Gavains seüst l'affaire, 13120
 Ja ne meist laiens le pié.
 Uns vallés reçoit son espié
 Et uns autres l'elme et l'escu,
 Mais le cuer ara irascu 13124
 Gavains ançois que il s'en voise,
 Il n'ara talent qu'il s'envoie.
 Desarmé l'ont isnelement
 Et acesmé molt richement 13128
 D'un sorcot vert sor son porpoint,
 Dont bien furent assis li point,
 Qu'il vestoit desoz son hauberc ;
 Mais ains qu'il parte du heberc 13132
 Vous os bien dire par covent
 Qu'estre volroit a Bonivent.
 Les tables vont erranment metre
 Cil qui s'en durent entremetre, 13136

Et les napes blanches estendent,
 L'iaue donent, que plus n'atendent ;
 Et li sires a pris Gavain
 Molt cortoisement par le main, 13140
 Avec sa moillier l'a assis.
 Il orent mes ou cinc ou sis,
 Et si orent maint entremés.
 Et quant il fu et tanz et mes, 13144
 Les napes li seneschaus hoste,
 Li sires fait laver son hoste
 Premièrement ; quant ont lavé,
 Si se sont en estant levé, 13148
 Lor sieges eschangent et müent ;
 Mais li alquant ne se remüent,
 Et cil qui siet dalez s'amie,
 Sachiez de che ne dolc je mie 13152
 Qu'eslongier mie nel voldroit.
 Li sire, ensi come il doit,
 Lez mon seignor Gavain s'asist ;
 Par le main destre le saisist : 13156
 « Sire, fait il, ne vous anuit,
 Il vous covient, quanque anuit
 Vous avient, oiant toz, conter
 Et hui ausi sanz mesconter, 13160
 Si m'en donrez vostre fianche ;
 Et de che soiez asfianche
 Que chaiens est teus li usages. »
 Gavains, qui cortois est et sages, 13164
 Li respondi molt dolcement :
 « Sire, vostre comandement
 Ferai, ne mais ore esgardez
 Que vostre honor et moi gardez, 13168
 Que par droit faire le devez,

Puis que vous hebergié m'avez
 Et od vous ai but et mengié.
 Mais, s'il vous plaist, par vo congié 13172
 Me tairai, que je ne weil dire
 Chose qui me tort a mesdire,
 Que tel chose puis bien retraire
 Dont alguns averoit contraire, 13176
 Et moi torneroit a meschief ».

Et dist li sires : « Par mon chief
 Vous le direz, ce est noiens,
 Ainz que vous partez de chaiens. » 13180
 Gavains voit qu'autre ne puet estre ;
 Fiancé a de sa main destre
 Qu'il en dira la verité.
 Lors a, oiant toz, aconté 13184
 Coment il avoit el tref jut
 Ou la dame l'eüst dechut
 Et murdri d'un coutel trenchant :
 « Au premerain m'ala trichant, 13188
 Car ocis m'eüst de sa main,
 Ainz que venist a l'endemain,
 Mais le coutel par aventure
 Trovai desoz la couverture : 13192
 Le coutel pris et si l'ostai,
 Pres de la dame m'acostai,
 Mön bon en fis dont ele ot ire.
 Et lors vindrent por moi ocirre 13196
 Doi sien cousin, mais l'un ochis,
 L'autre colpai, ce m'est avis,
 Le poing destre, issi le navrai,
 Sifaitement m'en delivrai ; 13200
 Puis me couchai desoz les dras
 Avec la bele, bras a bras,

- Et molt dolcement l'acolai.
 Foi que je doi saint Nicolai, 13204
 Tant fis qu'ele s'umelia,
 De son dols parler me lia
 Si fort que ja mais en sa vie
 Ne sera jors que n'aie envie 13208
 De li veoir et de sentir.
 Adont m'endormi sanz mentir
 Dusque al demain la matinee.
 Aventure ne destinee 13212
 Ne volt pas que fuisse sozpris ;
 Cele qui en ses bras m'ot pris,
 Que j'aim de cuer et wel amer,
 M'esveilla et me fist armer, 13216
 El dist que si frere venroient
 Qui tout maintenant m'ocirroient,
 S'il en avoient poesté.
 De che dist ele verité 13220
 Que chascuns d'aus armez i vint ;
 Mais, la merchi Dieu, si avint
 Qu'au joster l'un mort abati,
 A l'autre tant me combati 13224
 Que d'un des bras le mehaignai ;
 Vers als ma vie gaaignai ;
 Conté vous ai che qu'il m'avint.
 Dont revinrent chevalier vint 13228
 Qui tantost me corurent seure,
 Bien fuissent venu au deseure
 De moi, che sachiez par verté,
 Se n'eüsse le dos torné. 13232
 Mais ainchois i fui molt destrois
 Que des vint en ochis les trois.
 Que valt che ? Fuïr m'en covint.

Conté vous ai che qu'il m'avint. » 13236
 Quant li sires Gavain entent,
 D'ire et de mautalent esprent,
 Tel doel a por poi ne marvoie,
 Il n'i a home qui le voie 13240
 Qui ne quide qu'il soit desvez.
 Il s'est errant en piez levez,
 Puis dist : « N'i a mestier celee,
 Ma fille avez despucelee, 13244
 Mes fius ocis et mes neveux,
 Mais a Dieu faz promesse et veus
 Que se jel puis de fi savoir
 Ne remanra por nul avoir 13248
 Qu'a chevaus ne vous face traire.
 Teus mos vous ai oïs retraire
 Dont il est raisons qu'i m'anuit,
 Mais hui toute jor et anuit 13252
 N'avez garde, ne mais demain
 Vous ocirrai je de ma main
 Ou orendroit tot sanz respit,
 Que molt me torne a grant despit 13256
 Quant une eure vous laisse vivre
 Que je le siecle n'en delivre.
 Mais sachiez que je sanz demeure
 Vous bouteraï el cors l'ameure 13260
 De ma bone trenchant espee,
 Ou la teste arez ja colpee. »
 S'espee huche, on li aporte.
 A tant sont venu a la porte 13264
 Cil qui les bieres aporтерent.
 Li serjant qui as portes erent
 Ovrent les portes, ses rechoivent,
 Et quant les bieres aperchoivent 13268

Si s'escrient tot a un fais :
 « Urpin, se tu or ne desfais
 Celui qui tes fius a ocis,
 J'a n'ait Dieus de t'ame merchis. » 13272
 Lors s'escrient, lor palmes batent,
 De doel a la terre s'abatent.
 Quant Urpins a les dis oïs,
 De doel est si fort esbahis, 13276
 Quant voit les bierres, mot ne sone.
 Laiens n'ot dame ne personne
 Qui de dolor ne soit pasmez.
 Li pere, qui les ot amez 13280
 Autant con lui sovent se pasme.
 Au revenir un poi de basme
 Li ont dedens le cors coulé,
 Et les dames ont acolé 13284
 Sa fille qui le cuer ot vain.
 Mais, quant ele a veü Gavain,
 Molt durement s'en esmerveille,
 Un petit li revint vermeille 13288
 La colors, si est revenue.
 Lors s'apense con la venue
 Gavain savoir coment porra,
 Que, s'ele puet, ja n'i morra. 13292
 Gavains le dolor voit c'on maine
 Et voit les bieres c'on amaine.
 Tantost con la porte passerent
 Et dedens le palais entrerent, 13296
 Les plaies escrievent des mors,
 Si que li sanz lor ist defors
 Que la terre en devint vermeille.
 Chascuns qui le voit s'en merveille, 13300
 Mais bien certainement savoient

Por le sanc que degouter voient
 Que chil qui ochis les avoit
 Estoit laiens. Quant Gavains voit 13304
 Le sanc, bien sot certainement
 Que che sont cil tot vraiment
 A cui il s'estoit combatus ;
 En grant peril s'est enbatus, 13308
 Se Damedieus ne le regarde.
 Gavains par le palais esgarde,
 Mais n'i voit arme ne baston ;
 Coiement a dit a larron 13312
 Que chil est fols, bien s'i acorde,
 Qui onques nule fois recorde
 Parole dont anuis li viegne :
 « Ja mais por tant que m'en soviegne 13316
 Ne conterai en liu estraigne
 Chose de coi on me destraigne,
 Ne dont je doie anui avoir,
 Ne ausi se por tout l'avoir 13320
 C'on porroit metre en une tour,
 Que ne venisse a mon atour,
 Que se je mes armes eüsse
 Et de mon hauberc armez fusse, 13324
 Ne fuisse pas en tel esmai,
 Et ne por quant merveilles ai
 De che que assali ne m'ont
 Que bien en sont devers le mont ; 13328
 N'ai espee, lance ne hache,
 Si n'i a cel qui ne me hache
 Si con des membres a colper ;
 Ne sai coment puisse eschaper. 13332
 Or soit de moi a Dieu plaisir,
 Que le meillor ne sai choisir,

- Mais por lasqueté que je fache,
 Si voie je Dieu en la fache, 13336
 N'en serai ensaigniez al doit.
 Tot avient quanque avenir doit,
 Chascuns a son terme trespasse. »
 Lors se rebrache et avant passe, 13340
 En mi la sale est arestez
 Plus fiers que uns lions crestez.
 Quant Urpins de pasmer revint,
 Envers Gavain corant s'en vint, 13344
 Si a trait del fuerre l'espee ;
 La teste li eüst colpee,
 Quant la damoisele avant salt,
 Et dist : « Sire, se Dieus me saut, 13348
 A ceste fois pas nel ferrez.
 Ja, se Dieu plaist, ne desferez
 L'usage qui est establis.
 Trop seroit vos pris affeblis 13352
 Se vous falsez vo sairement.
 Livrez le moi seürement,
 En ma prison le garderai
 Et demain le vous liverrai, 13356
 S'arez salve vostre fianche.
 Et de che soiez affianche
 Qu'assez le metrai a destroit.
 Et, se ja Dieus joie m'otroit, 13360
 S'il anuit que je puis m'eschape,
 Il est cheüs en male trape
 Puis qu'il ert entre mes mains mis ;
 Onques n'ait il piors amis 13364
 Que moi, assez avra torment
 Anuit. » Puis a dit coiemment :
 « En tel prison estera mis

- Con doit estre loiaus amis 13368
 Quant est avec sa douce amie. »
 Lors prent Gavain, ne targa mie,
 Par les chaveus petit le tyre :
 Ce fist ele par majestire 13372
 Qu'ele les voloit dechevoir,
 C'on ne s'en peüst perchevoir.
 Chascuns a dit, quant il l'esgarde :
 « Cist est cheüs en male garde. » 13376
 Einsi disoient tot ensamble.
 Li sires, qui de fin doel tramble,
 A fait les mors ensevelir,
 Et puis les a fait enfouir 13380
 Ens en l'eglise saint Organe.
 La bele, qui son pere engane,
 A apelé deus chamberrieres
 Qui molt sont desdaignans et fieres ; 13384
 Aporter fait pasteuz et vin,
 Issi con je pens et devin.
 Et Gavains menja molt a aise,
 Qui molt sovent acole et baise 13388
 La dame, que bien en a mes,
 Et ce est en liu d'entremés ;
 Bien est servis a son voloir :
 Du tot a mis en nonchaloir 13392
 La doutanché qu'il ont eüe,
 Quant il ot la dame veüe
 Que il aime tant et covoitte.
 Et la dame engigne et esploite 13396
 Qu'a delivre le puist avoir,
 Que plus l'aime que autre avoir.
 Quant mengié orent a loisir
 A lor buen et a lor plaisir, 13400

Andoi sont couchié en un lit,
 Bras a bras, par molt grant delit.
 Li uns baise l'autre sovent,
 Ne lor membre con blez se vent. 13404
 Entr'aus deus est faite l'acorde,
 N'i a haïne ne descorde.
 Les puceles les esgardoient,
 Qui l'uis de la chambre gardoient, 13408
 Coment andui bras a brás jurent ;
 Entre eles affichent et jurent
 C'on doit mius tel vie prisier
 Assez que testes a brisier 13412
 Ne que plorer ne dolouser.
 Bien doit pucele golouser
 A faire ami mignot et cointe
 Qu'ele peüst avoir acointe : 13416
 « Bien est ore ma dame a aise
 Qui son ami acole et baise,
 Et il li molt tres dolcement ;
 Mais n'i sai autre atouchement, 13420
 Voir del baisier est che assez.
 Bien s'est li vassaus respassez
 De son esmai et de sa doute,
 Et ma dame est garie toute 13424
 De son plor et de sa dolor.
 Or facent li autre la lor,
 Que ma dame n'a de doel cure. »
 Issi dusque a la nuit oscur 13428
 Jurent andoi, puis se leverent,
 Et maintenant lor mains laverent.
 Et les puceles s'entremetent
 De servir et la table metent ; 13432
 Pain et vin et viande aportent

Et a aus servir se deportent,
 Que molt lor plaist ce qu'eles voient,
 Por che volentiers les servoient. 13436
 Quant ont soupé, puis si se couchent
 Gavains et la dame en la couche,
 Tout nu a nu soz la cortine.
 La dame pas ne l'esgratine, 13440
 Ne fiert, ne ne pinche, ne mort
 Gavain, qui ne pense a la mort
 Ne tant ne quant, fors a deduire,
 Coment qu'il soit de lui conduire, 13444
 N'a salveté, n'a garandise,
 Qu'en lui n'a nule coardise ;
 Ne pense raison ne droiture,
 Il a tout mis en aventure, 13448
 Il n'i regarde nul conquest
 Et il dit tres bien qu'il li est
 Autant des rez con des tondus ;
 Lez s'amie gist estendus 13452
 Cui il baise et acole estroit,
 De che ne sont mie a destroit.
 A joie passent cele nuit,
 Il n'ont chose qui lor anuit, 13456
 Fors le jor qui vient qui lor grieve.
 Urpins, si tost que l'aube crieve,
 Est levez, ses homes esveille,
 S'il est dolans n'est pas merveille. 13460
 Chascuns se lieve, si s'atyre
 Por Gavain livrer a martyre ;
 N'i a celui qui ne le hache.
 Li sires a pris une hache 13464
 Qui trenchans fu, si fu danoise.
 La damoisele entent la noise,

Qui lez Gavain jut estendue ;
 Quant ele a la noise entendue, 13468
 Tot maintenant vest sa chemise,
 D'un bel engien s'est entremise :
 Gavain fait vestir et drecier,
 Puis li aporte un brant d'acier, 13472
 Cler et trenchant et bien forbi,
 Que li sires de Glimesi
 Avoit envoié a son pere
 Par chierté, qui fu son compere, 13476
 Puis li a dit : « Biaus dols amis,
 Chaiens avez molt d'anemis
 Qui trestot maintenant verront,
 Et sai c'ochirre vous volront, 13480
 Et vous soiez bien apensez ;
 Traiez le brant, vers moi passez,
 Et si me prenez par la treche
 Si que trop ne soie a destreche. 13484
 Samblant faites de moi trenchier
 Le chief, s'il vous welent touchier ;
 Bien croi que vous laisseront vivre
 Ainz qu'il ne m'aient a delivre. » 13488
 A tant apele Jolïete :
 Et sa compaigne Violete :
 « Or tost, si vestez vos chemises.
 Soiez sages et ademises 13492
 Et tot a mon comant ovrez.
 L'uis de me chambre arriere ovrez,
 Si sailliez fors eschavelees
 Et de vos covrechiez velees ; 13496
 Chascune con feme esmarie
 S'escrit en haut : « Sainte Marie,
 Eschapez est nostre prisons.

- Par mon chief, pas ne desprisons 13500
 Cest conseil », dient les puceles,
 Qui du faire furent isneles.
 Erranment sont a l'uis venues,
 En lor chemises totes nues, 13504
 Eschavelees, chiez covers ;
 Dont fu l'uis de la chambre overs,
 Si saillirent fors tot a hie,
 Si s'escriënt : « Aïe, aïe ! 13508
 Por Dieu, seignor, pensez du corre,
 Si alez ma dame rescorre,
 Que li prisons est eschapez
 Qui les chiez nous eüst colpez 13512
 Se nous ne fuissions afuïes,
 Si en somes molt esbahies.
 Ma dame velt le chief colper,
 S'ele ne le laisse eschaper, 13516
 Mais anchois se lairoit ocirre
 Ou boullir en pois ou en cyre
 Ou que la teste li colpast,
 Ce dist, ançois qu'il eschapast. » 13520
 Quant Urpins l'ot, d'air esprent ;
 En la chambre entre, a deus mains prent
 Sa hache, mais quant Gavain voit
 Qui sa fille saisie avoit 13524
 Par les treches et enbronchie
 Et, l'espee nue sachie,
 Samblant fait de colper la teste,
 Quant Urpins le voit, si s'areste, 13528
 Sa gent fait tenir coie tote ;
 Por sa fille est en si grant doute
 Que il ne set que devenir.
 Et quant Gavains le vit venir, 13532

- A Urpin dist : « De voir sachiez,
 Se je sui boutez ne sachiez
 Ne adesez, je vous affi
 Que vo fille de mort desfi. » 13536
 Li peres l'ot, si fu plains d'ire.
 Ne por quant li a pris a dire :
 « Certes, ja mar en parlerez
 Que ja par li garant n'arez, 13540
 Ne ja par li, par saint Nichol,
 Ne vous charra some de col
 Que ne vous ochie a martyre. »
 Quant Gavains l'entent, si s'atire 13544
 Por ferir la bele al cors gent,
 Mais por mil mars de fin argent
 Ne le ferroit dont eüst mal.
 En la chambre painte a esmal 13548
 Est venue corant la mere ;
 Molt li fu la parole amere
 Quant ele entent c'on velt ocirre
 Sa fille, plus gausne que cyre 13552
 Devint de paor et d'esmais ;
 En haut a dit : « Lasse ! ja mais
 N'avrai joie tant con je vive.
 Ha ! lasse, fait ele, chetive, 13556
 Con doit estre mes cuers destrois
 Quant j'ai perdu mes fius tous trois
 Et or verrai morir ma fille,
 J'aim mius assez que on m'eschille 13560
 Que je ma fille morir voie. »
 Il samble bien qu'ele marvoie
 Quant sa fille voit enbronchie,
 Et Gavain qui tenoit hauchie 13564
 L'espee ausi con por tüer.

Molt se prent a esvertüer
 La mere, qui crie as haus cris :
 « Sire, si m'aït Jesus Cris, 13568
 Se ma fille laissez touchier,
 D'un cotel a pointe d'acier
 Me ferrai el cuer demanois ;
 Si sera graindres li anois 13572
 Se vostre fille et moi perdez.
 Por amour Dieu garde prenez
 Coment en porrez traire a chief ;
 Se vostre fille pert le chief 13576
 Et je m'ochi, ce ert damages.
 Or soiez atemprez et sages,
 Et si aiez de nous merchis.
 Se chis vassaus estoit ochis, 13580
 Mahaigniez ou mors ou navrez,
 Ja por che vos fuis ne ravrez,
 Et si vostre fille ocise est
 Et il i muert, petit conquest 13584
 I arez : vous n'avez plus oir.
 Cil qui voit sa maison ardoir
 En resqueut, s'il puet, les tysons.
 Or entendez se c'est raisons 13588
 Et se je vous di bien et voir :
 Vous ne poez vos fuis ravoïr
 Por chose que on i travalt,
 Et que plus pert li hom mains valt ; 13592
 Se vos trois fuis perdus avez,
 Moi et vostre fille salvez,
 Tant i arez damage mains. »
 La damoisele tent ses mains, 13596
 Si dist : « Biaus dols pere, merci !
 Chis chevaliers qui me tient chi

M'ochirra ja, se mal li faites.
 Por Dieu, biaux dols pere, desfaites 13600
 Vers lui le faide et le discorde,
 Et si faites pais et acorde
 En tel maniere et en tel guise,
 Por Dieu, que je ne soie ocise. » 13604
 Quant Urpins l'ot, a poi ne fent :
 Haïne et corrous li desfent
 A faire pais, ne mais pitiez,
 Humelitez et amistiez, 13608
 Qu'il a vers sa fille, l'ensaigne
 A faire pais. A tant se saigne
 Et pense que il porra faire.
 Se Gavains velt de rien meffaïre, 13612
 Il set tres bien apertement
 Que Gavains par son hardement
 Sa fille anchois li ocirra,
 Que rescourre ne le porra ; 13616
 Mais d'un affaire li sovient
 Qui de grant hardement li vient,
 Car ire et corrous et haïne
 Dedens son cuer li enquerine 13620
 Une volentez merveilleuse
 Qui molt est fiere et perilleuse.
 A Gavain dist : « Vassal, atent ;
 Retien ton cop et si entent 13624
 Che que te wel dire et aprendre.
 Tu porras ja ton cheval prendre
 Et ton harnois entierement,
 Mais c'est par un atirement 13628
 Que de ta main fianceras
 Qu'en cel bois attendre m'iras
 Droit a le crois el fons d'un val,

- Et je armez sor mon cheval 13632
 Irai iluec a toi combatre ;
 Se vaintre me pués et abatre,
 Tu t'en iras tout asseür,
 Molt loialment t'afi et jur ; 13636
 Se vaintre te puis et mater,
 Nus ne te porroit rachater
 Que je ne te trenche le chief ;
 Et si te di bien de rechief : 13640
 Se tu me vains, ausi m'ochi,
 Ja ne t'en priërai merchi,
 Car je t'ocirrai se je puis. »
 Et Gavains li respondi puis : 13644
 « A foi, sire, Dius m'en deffende
 Et il me laist a vostre amende
 Venir par sa sainte bonté,
 Si que j'aie vostre amisté. » 13648
 La dame l'ot, si dist : « Biaus sire,
 Por Dieu et por le cors saint Sire,
 Acordez vous au chevalier.
 Donez lui vo fille a moillier 13652
 Par pais faisant et par acorde.
 — Ainz me lairoie a une corde,
 Ce dist Urpins, par le col pendre
 Que ma fille li laisse prendre, 13656
 Ainz l'ocirrai par mon effort,
 Car je ai droit et il a tort ;
 S'en seront vengié mi ami. »
 Et dist Gavains : « Ce poise mi 13660
 Que vous ne prendrez l'amendise,
 Car je fuisse a vo comandisse
 Si que vostre ami et li mien
 Le devroient torner a bien. » 13664

Urpins a dit : « Se Dius me saut,
 Ja n'en irez par autre salt :
 Ou je morrai ou vous morrez,
 Que ja el dire ne m'orrez. » 13668
 Lors fait ses armes aporter
 Et fait Gavain acreanter
 Que il l'ira el bos atendre.
 Lors li a fait ses armes rendre 13672
 Et son cheval tout enselé ;
 Ens en la chambre sont armé,
 Qui molt estoit et clere et bele.
 Adez pleure la damoisele 13676
 Qui por son pere se cremi
 Et si doute de son ami,
 Que liquels qui muire d'aus deus
 Ja mais jor n'ert ses cuers sans deus, 13680
 Ne ja mais tant come ele vive
 Ne venra de son doel arrive ;
 Molt est dolante et esmarie
 Et prie a Dieu le fil Marie 13684
 Qu'entr'aus deus mete bone amour.
 Tout maintenant sans nul demour
 Sont issu de la chambre fors.
 Urpins, qui estoit grans et fors, 13688
 Est montez desor son destrier ;
 Gavains n'i quist onques estrier
 Quant monta sor le Gringalet.
 Laiens n'ot serjant ne vallet 13692
 Ne chevalier nul si hardi,
 Car lor sires lor desfendi,
 Qui les sivissent tant ne quant,
 Dont molt sont dolent li alquant. 13696
 Lors sont du chastel avalé,

Tant ont sor lor chevaus alé
 Qu'a la crois vinrent en la lande
 El fons d'un val ; en tote Illande 13700
 N'ot si bele ne si honie.
 N'i ot qu'aus deus de compaignie
 En la lande ou il fist molt bel ;
 Chascuns se trait soz un aubel, 13704
 L'escu et la lance ou se fie
 Prent chascuns, l'uns l'autre desfie ;
 Les chevaus poignent et destendent,
 Qui plus tost corent et destendent 13708
 Que cers ne fuit quant chien le chachent ;
 Des piez devant la terre embrachent
 Si fort qu'il font en lor aler
 Des pierres fu estincheler. 13712
 A l'aprochier les lances baissent,
 Si grans cops se donent qu'il plaissent
 Les escuz, toz les ont fendus ;
 Li hauberc les ont deffendus 13716
 De mort, tant sont fort et serré ;
 En mi les pis sont enferré
 Si fort et de si grant ravine
 Cheü fuissent barbe sovine, 13720
 Se les lances ne fuissent fraites ;
 Et anchois qu'il eüssent traites
 Les espees, s'entrehurterent
 Si fort que des escus porterent 13724
 Les boucles ou sont li cristal.
 Li cheval changent lor estal,
 Si fort se hurtent que chancelent,
 Sor les quatre piez s'amoncelent ; 13728
 Si durement estordi furent
 C'une grant pieche coi s'esturent.

Quant revenu sont, si se trait
 L'uns vers l'autre et l'espee trait ; 13732
 Si s'entrefierent demanois
 Que ne lor valurent trois nois
 Li escu, ains les ont colpez ;
 Bien est de ferir acolpez 13736
 Chascuns que pas ne se refraignent ;
 Les helmes dequassent et fraignent
 Que toz les ont esquartelez,
 Et les escus enchantelez ; 13740
 A paines en ont tant d'entier
 Que mais lor puisse avoir mestier.
 Urpins de che qu'il ot se cuevre,
 Hardement et force recovre, 13744
 Car doels et ire l'en esforce
 Qui li done vertu et force ;
 Si fiert Gavain a le retraite
 De l'espee que il tint traite 13748
 Sor senestre desor le flanc
 Si qu'il li trenche l'auberc blanc ;
 Du quier et de la char li oste
 Plus de deus doie sor le coste, 13752
 Mais ne l'a pas navré parfont.
 A poi Gavains de doel ne font
 Quant il vit de son sanc la trache.
 Urpins li dist : « Ja vostre estrache 13756
 Ne vous venra ja mais en vie ;
 Certes mar eüstes envie
 De jesir od ma fille bele :
 Onques mais deduis de pucele 13760
 N'achata onques hom plus chier,
 Qu'a m'espee trenchant d'acier
 Vous volrai la teste colper.

Vous ne me poez eschaper 13764
 Ne que lassus au ciel salir. »
 Lors requeurt Gavain assalir.
 Gavains li dols, li bien apris,
 Quant vit son sanc, d'ire est espris, 13768
 Qui par le plaie hors li saut,
 Et voit Urpin qui si l'assaut,
 Qui de bataille le tient cort
 Et molt sovent sore li cort, 13772
 Et ot et voit qu'il li pramet
 Que, se il au desoz le met,
 Que il li colpera le chief.
 Urpins li queurt sus de rechief 13776
 Qui a l'estor se rabandone.
 Et me sire Gavains li done
 Par mi le chief du brant forbi
 Qu'il l'estona et aorbi 13780
 Si que cil ne pot veoir goute,
 Que li sans li file et degoute
 Es oeus et contreval la fache.
 Urpins ne set que d'ire face 13784
 Quant sent que el chief est navrez ;
 Al mieus que puet s'est recovrez,
 De che qu'il a d'escu se cuevre
 Et me sire Gavains se coevre, 13788
 Si fiert Urpin et Urpins lui.
 Les escus, qui furent a glui
 Sauté, ont toz si dehachiez
 Et les haubers ont si trenchiez 13792
 Qu'en plusors lius li sanz lor ist.
 Urpins mie ne s'esbahist
 Por plaie ne por blecheüre,
 Vers Gavain vint grant aleüre, 13796

Et Gavains contre lui acort ;
 Li uns l'autre sore recort,
 Ferir se quident, c'est avis,
 En estechant en mi le vis, 13800
 Mais il ne se sont adésé ;
 Les les mentons lor sont rasé
 Et lez les cols li brant d'acier.
 Li uns prent l'autre a embrachier 13804
 Por traire jus et por abatre ;
 Lors se comencent a debate
 De lor pomiaus, de lor espees ;
 Il ont les corroies colpees 13808
 De lor elmes dont li quartier
 N'estoient mie tot entier,
 Ains sont esquartelé et frait.
 Gavains Urpin a terre trait 13812
 Par force jus, tant l'a foulé
 Qu'a poi qu'il ne l'a afolé ;
 A molt grant paine se redrece,
 Vers mon seignor Gavain s'adreche. 13816
 Mais Gavains li est trestornez,
 D'une part del champ s'est tornez
 Si descendi de son cheval,
 Les regnes abat contreval, 13820
 Ses atache a un abrisel,
 En haut a un petit rainsel,
 Et puis envers Urpin repaire.
 Et dist Urpins : « Drois est que paire 13824
 Cortois cuers et fiers et hardis ;
 En vint mile n'en a pas dis
 Qui sifaitement descendissent
 Ne que a pié se desfendissent. 13828
 Certes grant vassalage a fait

Et s'il ne m'eüst tant mesfait
 Pais feïssons assez briement.
 Mais al cuer ai tel marrement, 13832
 Quant de mes enfanz me sovient,
 Si tres grans duels al cuer me vient
 Que je ne sai que devenir.
 Coment qu'il en doie avenir 13836
 N'ai talent de moi acorder,
 Je ne m'i porroie acorder ;
 Quant de ma fille me remort
 Et de mes fius que il a mort, 13840
 Toz li sanz me fremist et bout. »
 Lors requeurt seure tot debout
 Gavains et il lui de rechief.
 L'uns fiert l'autre par mi le chief, 13844
 Quanqu'il puet, sovent et menu.
 Lors resont bras a bras venu,
 Puis si se sont al luitier pris.
 Gavains, qui bien estoit apris 13848
 D'estor soffrir et de bataille,
 Saisist Urpins par le ventaille ;
 Tant le tyre, tant le debat
 Que devant soi adens l'abat ; 13852
 Ilueques l'a si fort estraint
 Que por un poi qu'il ne l'estaint.
 Urpins s'estent, qui fu plainz d'ire,
 Et Gavains li a pris a dire : 13856
 « Vassal, fait il, prie merchi. »
 Et dist Urpins : « Ançois m'ochi,
 Car je n'ai cure de plus vivre,
 Quant conquis m'as ; mais or delivre 13860
 Cest siecle de moi, bien feras
 Et mains d'anemis en aras ;

Car saches bien, se Dius me voie,
 Que se je au desoz t'avoie 13864
 Ausi con tu m'as orendroit,
 Ja proiere ne t'i voldroit
 Que ne te tolisse la teste.
 — Bien as denonchie ta feste, 13868
 Dist Gavains, et je t'ochirrai,
 Que ja ne t'en respiterai,
 Puis que tu ne me vels rover
 Merchi. Or puis je bien prover 13872
 Que tu n'as cure de ta vie,
 Et s'avoie molt grant envie
 Qu'a toi acorder me peüsse,
 Que ta pais et t'amour eüsse 13876
 Et ensement a nos amis.
 — Tu t'iez de noient entremis,
 Dist Urpins, je n'en ai que faire.
 Fais de moi che que tu dois faire. » 13880
 Einsi Gavains li preus detrie,
 Qui Urpin bonement otrie
 Qu'il avra merchi bonement,
 Se il velt dire solement 13884
 Qu'il soit outrez et prit merchis ;
 Mais il aime mius estre ocis,
 Dont a Gavain durement grieve.
 Le pan del hauberc li sozlieve, 13888
 Ja li boutast tot sanz demeure
 El cors de s'espee l'ameure,
 Quant il garde dalez un pin
 Et voit venir la fille Urpin, 13892
 Ki Bloiesine est apelee.
 Grant oirre vint par la valee
 Desor un cheval palefroi,

- Por son pere fu en esfroï ; 13896
 Quant ele le voit en tel point,
 Isnelement cele part point
 Et vient a Gavain, si descent
 Et prie merchis plus de cent, 13900
 Por Dieu, qu'il n'ochie son pere :
 « Gentius hom, or gardez que pere,
 Por Dieu saint, eüstes amie,
 Que por s'amour n'ociez mie 13904
 Mon pere, or en aiez pitez
 Et sa vie li respitez. »
 Gavains, qui bien ot et entent
 A coi cele parole tent 13908
 Que Bloiesine li a dite,
 Que por s'amour son pere quite,
 Se li a dit tot sanz demour :
 « Ma damoisele, por l'amour 13912
 Que vous ramenteü m'avez
 Vous quit vo pere, or l'en menez. »
 A tant Gavains li biaux se dreche,
 Et Urpins por la grant destreche 13916
 Qu'il ot eüe se pasma.
 Gavains, qui Bloiesine ama
 De qui ot fait ses volentez,
 L'a baisie, puis est montez, 13920
 Se li prie que li soviagne
 De s'amour et que ele viegne
 A la cort son oncle le roi,
 Et il prendra de li conroi 13924
 Qu'ele ert honoree et servie,
 Ses amis ert tote sa vie ;
 Cele l'otroia bonement.
 A tant s'en part isnelement 13928


Gavains qui a Dieu le comande,
Et cele a son pere demande,
Quant il revint de pamoisons,
S'il porra garir par poisons, 13932
Et il respont qu'il ne savoit,
Que si grant doel al cuer avoit
De ses fius et de lui meïsmes
Que il volroit estre en abisme 13936
Fondus, ne li chaut qu'il deviegne.
« Avoi ! peres, se biens me viegne,
Il meschiet sovent maint preudome.
Sire, par saint Pierre de Rome, 13940
Or pensez de vous conforter
Et si laissez le doel ester,
Que tot issi doit preudom faire ;
Il doit estre de tel affaire 13944
Qu'il se confort de son anui.
Ne tieng pas a sage celui
Qui fait par sa dolor nonchier
Ses anemis esleechier. » 13948
Urpins, quand sa fille entendi,
Est montez, que plus n'atendi,
Et sa fille erramment remonte.
Ne ferai pas d'aus lonc acontes : 13952
A lor chastel sont repairié
Ou si home sont tout irié ;
Entendu ont au desarmer,
Ses plaies li font acesmer. 13956
Mais d'aus vous lairai ore ester,
Si volrai de Gavain conter
Qui chevalche par la forest
Et tant a erré sanz arest 13960
Qu'a l'anuitier ensi avint

Qu'el bois de Claradeure vint
 A l'ermitage et al convers
 Ou la pucele as Dras Envers 13964
 Estoit entree por servir
 Dieu que s'amour puist deservir.
 La jut Gavains icele nuit ;
 Ne puet estre ne li anuit, 13968
 Car n'ot que mengier ne que boivre
 Fors sauvechons, glans et genoivre,
 Et iaue d'une fontenele
 Qui estoit joste une chapele, 13972
 Et ses chevaus si ot du fain.
 Assez ot et malaise et fain
 Gavains et si ot molt dur lit.
 Et ce li vint molt a delit 13976
 Que la pucele li conta,
 C'onques un mot n'i mesconta,
 Coment Perchevaus l'ot vengie
 Et coment il ot dessegie 13980
 L'ost qui a Montesclaire fu,
 Et celui ochis qui le fu
 Portoit en la geule au dragon
 Et getoit a si grant randon. 13984
 Quant me sire Gavains oï
 La pucele, molt s'esjoï,
 Car bien entent et set et voit
 Que Perchevaus li preus avoit 13988
 Assomé l'aventure estraigue
 Por coi il parti de Bretagne,
 Que voé ot qu'il i venroit.
 Après a dit : « Que me volroit 13992
 Li alers, quant a fin l'a traite
 Cil dont on a dite et retraite

Tantes bontez ; et ce est drois,
 Car il est chevaliers adrois 13996
 Et preus et vaillans et hardis
 Et loiaus en fais et en dis.
 Ne le me dist pas por doutance
 C'on ne li tornast a viltance. » 14000
 Sifaitement Gavains devise.
 Au matin, quant le jor avise,
 A mis et son frain et sa sele,
 Puis monte et a la damoisele 14004
 A pris congié. A tant s'en va,
 Et tant a erré qu'il trova
 Bien quatre mile chevaliers,
 Et autretant i ot moilliers, 14008
 Qui avec contast les puceles,
 C'on ot le roi conté noveles
 Que ses niez fu en prison mis ;
 Si ot mandé de ses amis 14012
 Des mius vaillans que pot avoir
 Par priere, par son avoir,
 Si avoit fait promesse et veu
 Qu'il iroit querre son neveu, 14016
 Ne ja mais jor n'en revenroit
 En Bretaigne, si raveroit
 Son neveu de prison osté
 Par priere ou par poesté ; 14020
 Querre l'aloit en tel maniere.
 Quant Gavains choisi sa baniere
 Et a veü les trez tendus,
 De fine joie est estendus. 14024
 Tant ala qu'en l'ost est entrez ;
 Des premiers qu'il a encontrez
 Fu tot maintenant conneüs ;

Chascuns crie : « Bien soit venus 14028
 Li buens, li biaux, li preus, li gens,
 Qui doit estre de totes gens
 Prisiez et loez par droiture!
 — Et Dius vous doinst bone aventure, 14032
 Ce dist Gavains, a toz ensamble ! »
 Sor le Gringalet qui tost amble
 S'en est venus al tref le roi ;
 Li rois le vit, a son conroi 14036
 Le reconnut ; sus est salis
 Me sire Yvains et Brandelis
 Et Lancelos et Saigremors
 Et Keus qui quidoit qu'il fust mors, 14040
 Gisflés et Karados Briesbras.
 Li rois l'acole entre ses bras,
 Si le baise molt dolcement,
 Et tot li baron ensemment ; 14044
 Descendus est, desarmé l'ont.
 La roïne et les dames font
 Joie de lui, n'est pas merveille ;
 La roïne li appareille 14048
 Reube vaire qui bien li sist,
 Et li rois al souper s'asist ;
 Encoste lui s'asist Gavains.
 Li rois, qui fu de joie plains, 14052
 A fait les barons asseoir
 Si que chascuns le pot veoir.
 Après souper Gavains conta
 Coment ses bons amis l'osta, 14056
 Perchevaus, de la prison fors
 Qui tant estoit orible et fors.
 Molt a bel les mos recorder
 Coment Perchevaus acordez 14060

Estoit as fuis au chevalier
« Qui vo terre vint chalengier,
Quant vo colpe d'or emporta
Et Yonés le raporta, 14064
Quant ocis l'ot d'un gavelot. »
Et quant li bons rois Artus l'ot,
Molt par est joians de l'acorde
Que Gavains, ses niez, li recorde ; 14068
Son neveu baise et si l'acole.
L'endemain s'en vont vers Nicole
Si main qu'il virent ajorner :
La volra li rois coroner 14072
Por festoier et dus et contes.
Chi endroit s'areste li contes
De Gavain et du roi Artu
Qui Dieus doinst honour et vertu 14076
Et les defende de tout mal ;
Si parole de Percheval.



LIBRARY

SEP
18
1986

OF TORONTO

UNIVERSITY

- 14*. — GORMONT ET ISEMBART, fragment de chanson de geste du XIII^e siècle, 2^e éd. revue, par ALPHONSE BAYOT; XIV-71 pages. 4 fr. »
- 15*. — LES CHANSONS DE **Jaufré Rudel**, 2^e éd. revue, par ALFRED JEANROY; XIII-37 pages. 3 fr. 50
16. — BIBLIOGRAPHIE SOMMAIRE DES CHANSONNIERS PROVENÇAUX, par ALFRED JEANROY; VIII-89 pages. 3 fr. 40
17. — **Bertran de Marseille**, LA VIE DE SAINTE ENIMIE, poème provençal du XIII^e siècle, éd. par CLOVIS BRUNEL; XV-78 pages. 3 fr. »
18. — BIBLIOGRAPHIE SOMMAIRE DES CHANSONNIERS FRANÇAIS DU MOYEN AGE par ALFRED JEANROY; VIII-79 pages. 3 fr. 40
- 19*. — LA CHANSON D'ASPREMONT, chanson de geste du XIII^e siècle, texte du manuscrit de Wollaton Hall, 2^e éd. revue, par LOUIS BRANDIN, t. I, vv 1-6156; XII-208 pages. 9 fr. »
20. — GAUTIER D'AUPAIS, poème courtois du XIII^e siècle, éd. par EDMOND FARAL; X-32 pages. 1 fr. 95
- 21*. — PETITE SYNTAXE DE L'ANCIEN FRANÇAIS, par LUCIEN FOLLET, 2^e éd. revue; VIII-304 pages. 10 fr. »
- 22*. — LE COURONNEMENT DE LOUIS, chanson de geste du XII^e siècle, éd. par ERNEST LANGLOIS, 2^e éd. revue; XVII-170 pages. 9 fr. »
23. — CHANSONS SATIRIQUES ET BACHIQUES, éd. par A. JEANROY et A. LÅNGFORS; XIV-145 pages. 7 fr. 50
24. — LES CHANSONS DE **Conon de Béthune**, éd. par AXEL WALLENSKÖLD; XXIII-39 pages. 3 fr. »
- 25*. — LA CHANSON D'ASPREMONT, 2^e éd. revue, par LOUIS BRANDIN; t. II, vv 6155-11376, II-211 pages. 10 fr. »
26. — PIRAMUS ET TISBÉ, poème du XIII^e siècle, éd. par C. DE BOER; XII-55 pages. 3 fr. »
27. — LES POÉSIES DE **Cercamon**, éd. par ALFRED JEANROY; IX-40 pages. 2 fr. 50
28. — **Gerbert de Montreuil**, LA CONTINUATION DE PERCEVAL, éd. par MARY WILLIAMS, t. I, vv. 1-7020; V-215 pages. 8 fr. »
29. — LE ROMAN DE TROIE EN PROSE, éd. par L. CONSTANS et E. FARAL, t. I; IV-170 pages. 8 fr. »
30. — LA PASSION DU PALATINUS, mystère du XIV^e siècle, éd. par GRACE FRANK; XIV-101 pages. 6 fr. »
31. — LE MARIAGE DES SEPT ARTS, par **Jehan le Teinturier d'Arras**, suivi d'une version anonyme, poèmes français du XIV^e siècle, éd. par ARTHUR LÅNGFORS; XIV-35 pages 2 fr. 75
32. — **Alain Chartier**, LE QUADRILOGUE INVECTIF, éd. par E. DROZ; XII-76 pages. 4 fr. »
33. — LA QUESTE DEL SAINT GRAAL, éd. par ALBERT PAUPHILET; XVI-304 pages. 14 fr. »
34. — **Charles d'Orléans**, POÉSIES, éd. par Pierre CHAMPION, t. I; XXXV-291 pages. 14 fr. »
35. — MAISTRE PIERRE PATHELIN, éd. par RICHARD T. HOLBROOK; X-132 pages. 8 fr. »

36. — **Adam le Bossu**, LE JEU DE ROBIN ET MARION suivi du JEU DU PELERIN, éd. par ERNEST LANGLOIS ; x-94 p. 6 fr. »
39. — **Jongleurs et Troubadours Gascons des XIII^e et XIII^e siècles**, éd. par ALFRED JEANROY ; vii-78 pages.. 3 fr. 50
40. — **Robert de Clari**, LA CONQUÊTE DE CONSTANTINOPLE, éd. par PHILIPPE LAUER, xvi-132 pages..... 6 fr. 50
41. — **Aucassin et Nicolette**, éd. par MARIO ROQUES : xxxvi-99 pages.. 7 fr. »
42. — **LES CHANSONS DE Guilhem de Cabestanh**, éd. par ARTHUR LÅNGFORS ; xviii-97 pages.... 7 fr. »
43. — **LETTRES FRANÇAISES DU XIII^e SIÈCLE : Jean Sarrasin**, LETTRE A NICOLAS ARRODE (1249), éd. par ALFRED L. FOULET ; xi-24 pages 2 fr. 25
44. — **Eneas**, éd. par J. J. SALVERDA DE GRAVE, t. I ; vv. 1-5998 ; xxxvi-183 pages..... 12 fr. »
45. — **LA CHANSON DE SAINTE FOI d'AGEN**, éd. par ANTOINE THOMAS ; xxxviii-88 pages 10 fr. »
46. — **LES POÉSIES DE Jausbert de Pucibot**, éd. par WILLIAM P. SHEPARD ; xviii-94 pages..... 7 fr. »
47. — **PROVERBES FRANÇAIS ANTÉRIEURS AU XV^e SIÈCLE**, éd. par JOSEPH MORAWSKI ; xxiii-145 pages..... 9 fr. »
48. — **Jean Bodel**, LE JEU DE SAINT-NICOLAS, éd. par ALFRED JEANROY ; xvi-93 pages 5 fr. »
49. — **Rutebeuf**, LE MIRACLE DE THÉOPHILE, éd. par GRACE FRANK ; xiii-41 pages..... 3 fr. 25
50. — **Gerbert de Montreuil**, LA CONTINUATION DE PERCEVAL, éd. par MARY WILLIAMS, t. II, vv. 7021-14078..... 6 fr. »

Pour paraître en 1925 et 1926 :

Première série : Textes.

Chrétien de Troies et ses continuateurs, Gerbert de Montreuil, LA CONTINUATION DE PERCEVAL, éd. par MARY WILLIAMS, t. III.

Jean Renart, GALERAN DE BRETAGNE, éd. par LUCIEN FOULET.

Renault de Beaujeu, LE BEL INCONNU, éd. par G. PERRIE WILLIAMS.

Charles d'Orléans, POÉSIES, éd. par PIERRE CHAMPION, t. II.

LE ROMAN D'ENEAS, éd. par J.-J. SALVERDA DE GRAVE, t. II.

AMADAS ET IDOINE, éd. par J.-R. REINHARD.

LE SIÈGE DE BARBASTRE, éd. par J.-L. PERRIER.

Chrétien de Troies, GUILLAUME D'ANGLETERRE, éd. par M. WILMOTTE.

Deuxième série : Manuels.

PETITE SYNTAXE DU MOYEN FRANÇAIS, par LUCIEN FOULET.

LA MUSIQUE DU MOYEN AGE, par TH. GEROLD.

LES ARMOIRIES EN FRANCE AUX XIII^e ET XIII^e SIÈCLES, par MAX PRINET.

DEC 10 1986

BJNDING INSTRUCTIONS FROM
CATALOGUE DEPT.

Bind	front cover in	<input type="checkbox"/>
	back cover in	<input type="checkbox"/>
	both covers in	<input checked="" type="checkbox"/>

Mend

Tip in

Paste plates

ET
—
RY
—

PQ
1445
P35
1922
V.2
C.1
ROBA

